

The image shows a dark, textured surface, possibly a wall or floor, with several glowing, white-outlined symbols. On the left, there are two large, vertical, elongated ovals that look like stylized eyes. In the center, there is a wide, horizontal, irregular shape that resembles a smiling mouth or a wide-open eye. To the right, there are two more vertical, elongated shapes that look like stylized eyes. The symbols are composed of a granular, light-colored material against a dark, textured background.

藏文大藏经

FAYROUZ2006
www.dvd4arab.com

التقديم لـ د. احمد خالد توفيق

عن المسرح وأبواب وأقسامه، أخرس

بقلم: د. أحمد خالد توفيق

عندما عرفت الصديق العزيز محمد عادل منذ بضعة أعوام، بدا لي شاباً مليئاً بالحيوية والحماس، وأدركت أنه من الطراز الذي يضخ الطاقة فيمن حوله، وأنه ولابد يرأس عدة جمعيات في دراسته الجامعية.. الخ. يومها أخبرني أنه أعد مسرحية عن قصتي "خلف الباب المغلق" التي كانت إحدى حلقات الرعب في سلسلة ما وراء الطبيعة. يومها بدت لي الفكرة غريبة جداً وشبهه مستحيلة. إن نفحة المونولوج الداخلي والوصف عالية جداً في كتاباتي، ومن الصعب التخلص منها ما لم تتخلص من نصف القصة على الأقل أو تتجأّل للمونولوج الداخلي بدورك، وهو حل يتناقض مع الدراما عامة.

لكنه أرسل لي النص وقرأته، وأدركت على الفور أنه بذل جهداً لا يمكن وصفه في تحويل سبع قصص شبه منفصلة بطريقة البورتامونتو التي أحبها، والتي تربطها قصة واحدة هي ما يطلقون عليه "الدثار" أو wraparound. حولها إلى نص متكامل متجلانس. ولم تفتني ملاحظة أنه درس الشخصيات وال العلاقات جيداً جداً، ولعل الشخص صارت حية في ذهنه يكلم بعضها البعض.

أشياء كهذه تشعرك بالفخر ولا شك.. شعرت بفخر مماثل عندما رأيت الجهد الذي بذله بعض الشباب الموهوب في ميت عمر عندما حولوا نصاً شبه مجنون هو "الاسم شكسبير" إلى مسرحية.

لكن كانت لي بعض التحفظات على إعداد محمد عادل، منها أن أحداث

القصص الفرعية تأتي سرداً على لسان الأبطال وبطريقة "الإبلاغ". أعتقد أن هذا يخالف قاعدة مهمة في كتابة السيناريو لشخصها "ديفيد سوain" في كتابه الشهير عن كتابة السيناريو قائلاً: "بدلاً من سرد ما حدث، دع المشاهد يرى الشيء اللعين!". وكان رد محمد منطقياً هو أن هذا يلقي على فريق التمثيل عبء نفقات هائلة لا قبل لمسرحية بها. هكذا تركت له الحرية كاملة؛ لأنّه اختار وسيطاً لا أفهم فيه ولا أزعم أنّ عندي الخبرة الكافية به. لقد قرأت الكثير جداً في السينما ورأيت الكثير من الأفلام، لكنني في المسرح لم أقرأ إلا الأعمال الشهيرة فقط، وقرأت دراسات دريني خشبة الممتازة التي تعلمك كيف تكتب مسرحية.. هذا لا يكفي طبعاً لأنّ تضع بصماتك على عمل تطلب كلّ هذا الجهد والعرق. حضرت بعض البروفات المسرحية عندما كنت طالباً في الكلية، ولا أخفي أنتي فهمت ما يطلقون عليه جنون المسرح وأنت ترى العمل يولد وينمو يوماً تلو يوم، حتى اللحظة الأخيرة التي يقفون فيها أمام الجمهور بثياب وماكياج العرض الكاملين، والديكور من خلفهم والأضواء تسقط عليهم. عندها كنت أشعر برجلة قشعريرة.. نعم، أفهم كيف يصيب جنون المسرح الناس وإن كنت لا أعتبر نفسي خبيراً به، لهذا قررت ألا أتدخل على الإطلاق. وبالمثل لم أتوقف أمام تفاصيل صغيرة مثل أن يصير رفعت متزوجاً أو ألا يكون أصلع.. هذه أمور شكلية طبعاً.

لم يتوقف محمد عن تلميع النص وتنقيحه لعدة أعوام، وأعتقد أنه أرسله لي أربع أو خمس مرات. وفي النهاية عرفت أنه سيصدر النص مكتوباً عن دار ليلى. لا أخفي عليك أنتي أشفقت عليه من التجربة لأنّي لا اعتقد أن المسرحية المكتوبة رائجة في مصر، برغم إنتي أحب هذه الطريقة جداً. في ذهني أخلق المسرح والممثلين على ذوقى الخاص، وأنتوقف أمام الفقرات التي ترافق لي، وأسترجع المواقف من جديد.

لاحظت أن أهم ما قام به محمد هو إلغاء الفصلية الشديدة التي تميز العمل

الأصلي، بل ذوب كل هذا في بونقة واحدة، وقد حرك دثار القصة إلى مقدمة الأحداث بحيث صار الموقف الرئيس هو موقف أبطالنا المحاصرين في بيت مغلق، بينما تنداعى القصص كنوع من الذكريات التي تستكمل من حين لآخر على حده. لكن يظل أسلوب الإبلاغ هو المسيطر.

قرأت المسرحية كعمل منفصل عنني بالكامل.. وكما يقول أندريه موروا: "لقد ارتكبت الخطيئة، لكن هذا كان في بلد آخر مع امرأة أخرى ! .. اليوم هذا طفلي .. صحيح أنه يختلف كثيراً عنني ولا يعرفني. فقط أشعر برجفة وفخر خافت عندما أعرف أنه كان نتيجة عمل كتبته منذ أعوام ..

كل الشكر لمحمد على هذا العمل الممتع. أتمنى له حظاً سعيداً في القراءة والتمثيل . فإن نجح نجاحاً مدوياً فهو فضل الإعداد الجيد الجاد المرهق، وإن لم يلق نجاحاً لا سمح الله فهذا يعود لعيوب في فكري ذاتها، ولأنني "قد ارتكبت الخطيئة، لكن هذا كان في بلد آخر مع امرأة أخرى " ! ..

د. أحمد خالد توفيق

حمدًا لله ! ..

مقدمة ٢ بد منكما ...

هذا ما قلته بعد انتهاءي من هذا العمل، الذي استغرق عامين بالتحديد، ففي العام الأول قمت بكتابته في 48 صفحة ك مجرد اعداد لقصة من قصص "د / أحمد خالد توفيق"، لتصبح مسرحية، تقدم على خشبة مسرح كلية الإعلام بجامعة القاهرة - وهي التي تخرجت منها من قسم الصحافة - وقمت بعرضها على الأستاذ "عمر الشيخ" - وهو مساعد مخرج للعديد من الأعمال كفيلم "أحلى الأوقات" ومسلسل "الشارد" - فأعجبه النص جداً، بل وأعجبته طريقة كتابتي، وهذا ما جعله يقترح علي أن أقدم جديداً في النص، والغريب أنه عندما أرسلت نفس هذا النص للدكتور "أحمد خالد توفيق"، وجدت رأيه مشابهاً لرأي الأستاذ "عمر" ...

لتبدأ بعدها رحلتي الثانية - عامي الثاني - لكتابة هذا النص، وهو النص الموجود بين أيديكم الآن - وعندما قرأه "د. أحمد خالد توفيق" وجدت رده يصف العمل بالجهود الضخمة، وحمدًا لله فقد أشاد بالعمل جداً، ووجدت رأيه أن العمل الآن بعيد كل البعد عن قصته الأصلية، بالطبع ليس بعيداً عن الحدث الأساسي الموجود في القصة، وإنما في طريقة المعالجة وتقديم سيناريو وحوار ورؤى مختلفة تماماً عن القصة الأصلية ..

لتبدأ رحلتي الثالثة في محاولة عرض هذا العمل على خشبة المسرح، ووجدت صعوبات جمة، فالأستاذ "عمر" مشغول بالعديد من الأعمال، فلجلأت لمخرج آخر في نفس الكلية، ووجدته يطلب مني اختصار هذه الصفحات، وهو شئ صعب جداً نظراً لأن اختصار أي جزء من المسرحية سيهدم بها الكثير من الأشياء الهامة جداً، وعرضت أخرى لم تتم، ولم أجد بعد هذا كله سوى نشر النص، وعرضته بالفعل على عدة جهات، ووجدت

أن أفضل العروض هو تقسيم تكاليف الطباعة والنشر لنصفين، وبالطبع الكلفة كبيرة جداً، هذا بجانب قلة عدد الذين يقرأون، بجانب أن النص المسرحي - للأسف - ليست له شعبية تدفع القارئ لشرائه..

بعدها هناك جهة وعدتني بنشره مطبوعاً بدون أن تتكلمني شيئاً، لكن لا أعلم بالتحديد متى سيحدث هذا، وبعدها احدى الجهات عرضت علي نشره الإلكتروني، وهذا أيضاً لم يحدث، وفي النهاية "رسي الحوار" على "دار ليلى"، والتي تحمسـت - أخيراً - للعمل..

رحلة هذا العمل الآن ثلاثة سنوات.. كتابة ونشر.. في خضم هذا بالطبع كنت أكتب العديد من الأشياء الأخرى، لأن الحياة لا تتوقف أمام أحد، وقريباً سيظهر عمل آخر خاص بي بعيداً عن أسماء أخرى..

الكثيرون أشادوا بالعمل، سواء أصدقاء أو كاتب النص الأصلي، وأيضاً كانت لهم ملاحظاتهم، لكن يبقى رأيكم انتم هو الفيصل بالنسبة لي، لذا ليس أمامي سوى ترككم، وأن أتمنى لكم قراءة ممتعة..

محمد عادل

Mido_cinema@hotmail.com


عن قصة "وراء الباب المغلق" د. أحمد خالد توفيق معالجة و سيناريو و حوار محمد عادل

أغانٍ

خايف من الدنيا
الدنيا كلها أبواب

كلمات / طارق رفعت
الرسوم الداخلية

بريشة / محمد علي



الغموض ..

الغموض يغلف كل ما حولك ..

يفتح الستار ..

ظلم ..

غموض ..

بيان على اليمين ..

ثلاثة أبواب في العمق ..

مقدان وثيران على جانبي المسرح ..

أريكة في المنتصف ..

الغموض ..

الظلم ..

اضاءة خافتة ..

الغموض يكتنف كل ما حولك ..

المطرب يدخل من أحد الأبواب الموجودة على اليمين .. لكن مهلاً .. إنه يدخل بظهره .. لا أفهم شيئاً !! هل تفهم أنت ؟ .. يحدجنا بنظراته الشاردة .. المخرج يدخل من الباب الآخر الموجود على اليمين .. يبدو واثقاً من نفسه .. مستهير إذا أحسنا القول .. يداه في جيبه .. نظرة ساخرة يرمي بها .. لا يزال اللا منطق هو سيد الموقف ..

لا يزال الغموض هو المتحكم في كل شئ حولنا ..

ناهد تخرج من أحد الأبواب الثلاثة ..

فستان سهرتها جذاب للغاية .. جذاب لدرجة أنك لا تراه، بل ترى ما تحته ..

لحم ودم.. تنتبه ناہد لنظر اتنا، فتستر نفسها بمحاولة وضع ذراعيها حول جسدها.. لكن هيئات !.. اللحم يغطيه مزيد من اللحم.. هل صنع هذا فارقا؟!..

الممثلة تخرج من أحد الأبواب الثلاثة ..

فستان بسيط.. أنيق.. لكن.. لم هذا الشال الذي تغطيه حول نفسها؟!.. ولم نظرة الخوف التي ترمقنا بها؟!.. هل قمنا بفعل شئ لها؟!.. هل أخفاها إلى تلك الدرجة؟!..

لا أعرف !.. الغموض.. الظلام.. اضاءة خافتة.. موسيقى ناعمة، حزينة.. يشق هذا كله الشاعرة.. تخرج - كعاده زميلاتها - من أحد الأبواب الثلاثة.. لا توحى هويتها بأي شئ.. لكن بالله عليكم لم هذا الكشاف الذي تحمله، وتنيره في وجوههن؟!.. في عيوننا؟!.. الم تبيهها أحد إلى أن هذا الفعل يعتبر قلة نوق، تستحق عليه الضرب بالرصاص.. يا الله !!!.. هذا الضوء الصادر من الكشاف يزعج الحاضرين أيضا.. يزعجنا لدرجة الجنون..

لكن هذا لم يمنعنا من رؤية الكاتب.. الوحيد الذي يدخل من اليسار.. نظرة حزينة.. انكسار.. يرمقنا بتلك النظرة.. أوراق شجر تساقط من بين يديه ..؟!..

الغموض لا يزال هو سيد كل شئ..

لكن يا الهي !!!.. كيف اجتمع تلك المجموعة الغريبة مع بعضهم البعض؟!.. إنهم كالتماثيل التي تعبر عن حالة ما.. لكن دون كلمة.. دون صوت ..

الغموض أصبح بارداً ككل شئ حولك..

فجأة نجد رفعت يمسك بمدخل.. يا الله !!!.. كم أحب هذا الرجل.. يكفي أنه

أتسى من بيننا .. من داخلنا .. مشعل يكسر حدة البرد القارس الذي يكتنفنا من
كثرة الغموض المحيط بنا .. يقف رفعت في المنتصف .. يتجمع الكل حوله ..
الكل يتحرر مما هو فيه .. الجميع ينظر إلى المشعل بدفعه .. يابيهار .. بحب ..
توهج العيون ينطق بكل تلك المشاعر مجتمعة ..

الجميع يمسكون بيد رفعت التي تطبق على المشعل .. أيدى عديدة حول
مشعل واحد .. هل سيستطيع المشعل الواحد أن يحمل الدفع والأمان إلى كل
هولاء؟! ..

الموسيقى أعلى من محدلاتها ..

الكل يأخذ المشعل من يد رفعت ليتجهون به للخارج ..

يتركونه وحيداً .. وحيداً .. بدون معين .. بدون مرشد ..

اضاءة مركزة على رفعت .. رفعت ينظر إلى الأفق .. يمد يده وكأنه يحاول
أن يلمس شيئاً ما ..

شئ بعيد المنال ..

الضوء يخفت .. من الواضح أن الظلام قد أعلن انتصاره ..

ومن الواضح أن الغموض ليس خصماً هيناً لأنه لا يزال سيد الموقف ..

الكتاب المقدس

المشروع الأول



** ينار المسرح.. الستار مغلق.. نجد مقعدين وثيرين على جانبي المسرح.. وعند أحدهما يجلس شخص، بل رجل لا يُميزه شيء سوى "روب دي شامبر" فوق قميص، وبنطلون، وبعض خصلات الشعر البيضاء.. أمام الرجل طاولة صغيرة، يكتب عليها شيئاً ما.. تتدفق الأفكار لرأسه، بينما صوت تلك الأفكار يدوي في جنبات المسرح **

ص رفعت: كنا سبعة ..

تبينت وجههم، وثيابهم، وأهواهم.. لكننا اجتمعنا في تلك اللحظات، التي لا تنسى..
كنا سبعة ..

أربعة رجال، وثلاث نساء.. حاول الرجال أن يتصرفوا كما يليق ب الرجال مهذبين.. لكن ظروف الرعب التي مررنا بها، جعلتنا نفقد ميراث الحضارة في لحظات، وصارت قواعد اللياقة ترقاً لا يتحمله الموقف..
كنا سبعة ..

وهو رقم تفاعلنا به الثقافات على أنواعها.. لكننا تمنينا لحظة لو ينخفض هذا الرقم قليلاً، وللهذا أسبابه..
كنا سبعة ..

لكن الإطمئنان لم يكن ثامتنا..

زوجة رفعت: "تصبح من خارج المسرح" "رفعت" العشاء جاهز

** رفعت يُكمل الكتابة، ولا يرد على زوجته **

زوجة رفعت: "تظهر على المسرح" "رفعت"!.. أنت مش ساميوني ولا إيه؟!

رفعت: "وكانه استيقظ فجأة" نعم !!!.. أنتي كنتي بتقولي حاجة؟!

زوجة رفعت: "تبسم" يا ترى إيه اللي واحد عقلك؟

رفعت: "مبتسمًا" لا أبداً.. عادي زي ما أنتي شايقة

زوجة رفعت.. هو انت كنت بتكتب "تحبه ناحية رفعت.. ثم سك الأوراق" "سبعة.." باب !؟.. يا ترى القصة دي من أي نوع ؟؟
رفعت.. تقدري تقولي عليها قصة رعب
** لحظة صمت **

زوجة رفعت.. بصوت ضعيف.. رعب !؟!
رفعت.. يعني حبيت أبدأ الكتابة في المجال ده
زوجة رفعت.. كوييس
** لحظة صمت.. الزوجة تبدو مضطربة قليلاً **
زوجة رفعت.. تحب أحضر لك حاجة معينة على العشاء؟
رفعت.. "يمسك بيدها ليقبلها" أي حاجة من إيدك ه تكون حلوة
** تجلس زوجة رفعت على ركبتيها بجوار رفعت، الذي لا يزال ممسكاً
بيدها **

زوجة رفعت.. "تبتسم لرفعت بطريقة باهتة" تعرف يا "رفعت" أنا نفسي في
إيه بعد العشاء؟.. نفسي نخرج في أي حلة.. إحنا بقالنا فترة كبيرة
مخرجناش فيها سوا
رفعت.. نخرج يا ستي.. ولا مهمك.. وبعدين هو أنا يعني يكون فين؟.. مهو
أنا جنبك على طول

** لحظة صمت.. الزوجة تنظر إلى عيني رفعت.. تنہض.. تبتسم بطريقة
باهتة للزوج **
زوجة رفعت.. أتعنى
** لحظة صمت **

زوجة رفعت.. أنا رايحة أحضر العشاء

** تهم الزوجة بالإنصراف، في اللحظة التي يهم فيها رفعت بالكتابه..
تفق قليلاً لتعاود النظر إلى رفعت.. يُلاحظ رفعت بعد قليل أنها تحدق به **
رفعت، في حاجة يا "أثريا"؟

زوجة رفعت: "بعد لحظة صمت" لا أبداً بتأكد إنك كويس.. أصل بقالنا فترة
طويلة مكناش فيها كويسين زى النهاردة

** يبتسם رفعت الذي لا يجد أي شئ يقوله.. تبتسم الزوجة لرفعت
وتخرج.. ينظر رفعت قليلاً إلى المكان الذي خرجت منه الزوجة.. تتركز
الإضاءة على رفعت، ويعاود الكتابة.. صوت أفكاره يدوي في جنبات
المسرح **

ص رفعت: أعرفكم بنفسي.. "الدكتور رفعت إسماعيل" ..

أعمل جراح بإحدى المستشفيات.. يقولون أن الأطباء ما هم إلا حفنة من
الأوغاد يمتصون دماء مرضاهم.. لكنني لم أكن أبداً من ذلك الطراز..

كل ما أطلبه من الدنيا هو الهدوء والعمل كطبيب.. أكتب أحياناً.. أرافق
العالم في أحيان أخرى بمجهز دون التدخل فيه لا من قريب ولا من بعيد..
لكني لم أكتب تلك القصة لأحدث القراء عن ظروف حياتي، أو لأطلب منهم
قرضاً يباع في الصيدليات بعنوان "كيف يمكن أن تكون سعيداً؟" ..

جنت هنا لأسرد قصتي..

بدأت القصة في خريف عام 1971.. والفصول في مصر قد تتشابه، وقد
تختلف.. لكن شيئاً واحداً يميزها هو الرائحة.. رائحة الأسفلت المبتل في
الشتاء.. رائحة حبوب اللقاح، وزهور البرتقال القادمة من أرض محروقة؛
هذا هو الربيع.. رائحة العرق، ورائحة أنسام الليل الرحيم في الصيف..
لكن الخريف له رواح عديدة.. سيرحدّثك التلميذ عن رائحة ورق تغليف
الكتب، ورائحة الممحة في الحقيبة الجلدية الجديدة.. وسيحدّثك الموظف

عن رائحة الجوافة التي لا تفارق الثلاجة.. وستحدثك المراهقة دامعة العينين عن رائحة الحزن ذاتها.. وسيحدثك آخر عن رائحة المساء المبكر..

الخريف ! يا لعذوبته.. يا لقوته !

** يترك رفعت القلم، ويسترخي في جلسته.. يتذكر الأحداث، وصوت الأفكار لا يزال يدوي، مع خفوت الإضاءة المركزة عليه، لنصل إلى مرحلة الإظلام التام **

ص رفعت، في إحدى أمسيات الخريف.. اتصل بي زميل قديم هو "الجراح الدكتور / جابر إبراهيم"، يدعوني إلى قضاء سهرة الخميس في داره بالمقطم.. في الحقيقة لا أعرف الكثير عن هذا الرجل.. أتعرف بهذا.. إنه أستاذ جامعي.. يقوم بتدريس الجراحة لطلبة الطب، ولديه عيادة هي نافورة مال في واحد من أرقى أحياء القاهرة.. نشأت بيننا صدقة من طراز سطحي لا يخلو من المجاملة، ولم أتخيل قط أن علاقتنا يمكن أن تكون أعمق كي يدعوني لقضاء أمسية في داره.. لكن الإغراء كان قوياً، فالرجل يملك فيلا في المقطم يُقال أنها أروع منظر يمكن أن تراه في حياتك، وقائمة المدعوين لا يأس بها.. كما أن العمر يمضي وانا لم أر كل شئ بعد.. ما زالت هناك أشياء أخرى تحتاج إلى أن أراها قبل أن أغمض عيني في رضا و أموت..

** يفتح الستار.. يضاء المسرح تدريجياً.. نكتشف معها عدم وجود رفعت وكذلك الطاولة الصغيرة التي يكتب عليها.. مع اضاءة المسرح نتبين مكان الحفل.. حفلة فخمة.. يوجد العديد من الأشخاص، يتبادلون الحديث بصوت هامس.. على اليمين بابان أحدهما يدخل ويخرج منه ضيوف الحفل، والأخر يدخل ويخرج منه الخدم حاملين الأطعمة والمشروبات.. المقعدان الوثيران انضما للحفل.. هناك أريكة في منتصف المسرح يجلس عليها أشخاص، وبجانبهم أشخاص آخرين.. الضيوف موزعين على مكان الحفل..

في العمق ثلاثة أبواب مغلقة.. لا تزال أفكار رفعت تدوى في جنبات المسرح، ويظهر بنفسه على المسرح - وهو يرتدى بدلة - من خلال الباب الذي يدخل ويخرج منه ضيوف الحفل ويقتاده خادم.. يترك الخادم رفعت الذي يتأمل كل شئ، وأفكاره لا تزال تتواتى **

ص رفعت، في الثامنة من مساء الخميس.. فتح لي الباب خادم يرتدى طربوشًا وحزامًا عريضاً من نفس اللون فوق جلابيه الأبيض، وبأدب اقتادني إلى قاعة فسيحة، تتناثر فيها الأرائك في فوضى منظمة.. ثمة موسيقى راقية قادمة من مكان ما، أو أضاءة عادمة كاضاءة حفلات العرس لا يميزها شئ.. عدد من القوم يجلسون أو يقفون، غارقين في محادثات فاتتني بدايتها بالطبع.. ومن الواضح أن الجميع مستمتع بوقته في ظل هذا الحفل..

ناهد: "تقاطع أفكار رفعت" أهلاً أهلاً يا "دكتور رفعت".." أنا "ناهد" حرم "الدكتور جابر".." أكيد بنتقول إزاي عرفتك؟!.. وهل يخفى القمر يا دكتور؟.." انت النهاردة أشهر من نار على علم واستحالة أي شخص يقدر يعمل حفلة بتضم نجوم المجتمع بدون ما بيعتلك كارت دعوة

رفعت: "بابتسامة" ده شرف ليها يا هانم.. ويا ترى فين "الدكتور جابر"؟"
ناهد: "بضحكه أرستقراطية" ها ها ها.. آه قصدك بعلی.. هو في الحقيقة مش هنا.. طلبوه في المستشفى.. وزى العادة سبني لوحدي في الحفلة بدون صديق.. بس أكيد هيرجع.. هو يعني ليه بيت تاني غير هنا؟.. عموماً اتفضل.. اتفضل يا دكتور.. يا شباب أحب أقدملكم نجم من نجوم المجتمع
"الدكتور رفعت إسماعيل"

الجميع: أهلاً.. أهلاً يا دكتور.. تشرفنا

* * بيدلهم رفعت التحية.. وسرعان ما تتجه به ناهد لخمسة ضيوف،

يتوسطون مكان الحفل.. بعضهم يجلس على الأريكة، وبعضهم بجانبها **
 ناهد: "ياستعراض" افضل.. افضل يا دكتور.. تعالى اقدمك نجوم حفلنا
 الليلة.. طبعاً مش زي نجمك يا دكتور.. في البداية أحب أعرفك على جميلة
 جميلات السينما المصرية.. "ممثلتنا الجميلة هiam" .. طبعاً مننساش مطربينا
 الحبوب.. "المطرب الشاب سمير الصياد" اللي أجمع عليه النقاد إنه خليفة
 "عبد الحليم حافظ" .. أحب أقولك يا "دكتور رفعت" إن حفلتنا النهاردة
 فيها كل النجوم.. مش نجوم الفن بس.. لا.. كمان معانا نجوم الصحافة
 والأدب.. أعرفك بكتابنا الصحفي المشهور.. "الكاتب محمود عوني"، وهو
 من المعارضين لإتجاه الإسلام واللاحربي.. وأكيد مش هنسى صديقة
 عمري.. "الشاعرة نادية فهيم" .. آآه.. جينا بقى لأكبر واحد في الحفلة.. في
 السن وفي المقام.. "مخرجنا السينمائي حسين أبو النجا" ..

** رفعت يتبادر معهم التحية **

ناهد: "تنظر إلى رفعت" دول يا دكتور أهم ضيوفنا الليلة.. ويا ريت تستمتع
 بحفلتنا

رفعت.. ده أكيد يا هاتم

** تنظر ناهد إلى ما خلف رفعت، لتجد أحد الأشخاص المهمين الذين
 وصلوا إلى مكان الحفل **

ناهد.. طب أستاذتك يا دكتور

رفعت: "بهلوء" افضل

** شرع ناهد لترحب بالضيف.. الضيوف يعودون للحديث.. رفعت يتأمل
 ما حوله، وتعود أفكاره لتكمل باقي الأحداث **

ص رفعت.. أعترف أنتي وجدتها حفلة لا يأس بها.. برغم أنتي وطوابط
 أدمي، لا يظهر بين تجمعات البشر.. إلا أنه قد تحرك في نفسي ذات الطفل

الذى لدى كل منا، والذى يسره الجلوس مع المشاهير... .

المثلة هيام: "تقاطع افكار رفعت، وبابتسامة عنية" يا قري واقف لوحدك ليه؟

** يلتفت رفعت إلى هيام ولا يجد ما يقوله، ومن ثم يبتسם لها **

الممثلة هيا مصطفى: "بطريقة طيبة" معقوله الدكتور مش لاقى ونیس؟!

رفعت: لا أبداً.. أنا بس محبتش أفرض نفسى على حد

المثلة هيام: "يصرّح" طب ينفع أفرض نفسى عليك؟

** رفعت والممثلة هیام یضحكان **

رفعت، بالمناسبة أخبار السينما معكى، إيه؟

المثلة هيام: "تطلق تنهيله حارة كانها لا ترى الخوض في مثل هذا الحديث" ه تكون أخبارها معالياً ايه؟ يعني مفيش جديد.. مفيش غير إني بحضر أنا والأستاذ "حسين أبو النجا" فيلم حديد

رفعت: من الواضح إنك مش راضية

الملائكة هياام: "وكانها سادة فلين، تنطلق بسرعة" ومين اللي راضي يا دكتور؟!..
ما انت عارف حال السينما دلوقتي.. أكيد بتقرى أو بتسمع عن انحدار
السينما اليومين دول

رفعت: "وكانه نصر حقيقة" فعلاً عندك حق

الممثلة هيا مصطفى: "ياس، وبنيرة ياس"، نفسى السينما تتحرر من اللي هي فيه

** في منطقة أخرى بمكان الحفل، تضم الكاتب محمود عونه، واثنين

آخرین

الكاتب محمود لازم البلد تتحرر من اللي هي فيه

شخص /، لكن السيدات بياكده إيه مش هيحارب

الكاتب محمود: "موجهاً كلامه لشخص 1" يا "صلاح" بيـه.. كده أو كده لازم
السداد يحرر البلد من الصهاينة.. ياما إيه بقى لزمه؟!
* الشخص 2. بس يجيب منين السلاح اللي يحارب بيـه؟

الكاتب محمود: "بنفاذ صبر" يتصرف يا أخي.. والله لو كنت أنا في شبابي
لسبت الجنان ورحت حاربت مع ولادنا

ناهد: "تظهر فجأة، وتقطّعهم" ووالله لو أنا كنت في حفلة زي دي عمرى ما
كنت هتكلّم عن السياسة أبداً

** الثالثة يضحكون.. تغادرهم ناهد وتجه لأحد التجمعات.. تقطع سيدة
سيرها واتجاهها إلى ذلك التجمع **

السيدة دولت: الحقيقة يا "ناهد" انتي النهاردة زي القمر
ناهد: "ياستعراض" ميرسي يا "دولت" هانم.. "تشير إلى نفسها وإلى دولت" وطبعاً
القمر بقوا قمرین

** تضحك ناهد، ومعها دولت **

السيدة دولت: لا بجد يا "ناهد" .. انتي النهاردة قمر.. العقد اللي انتي لابساه
هيأكل من رقبتك حته.. ولا الفستان.. ولا الجزمة.. إيه ده كلـه ! .. إيه ده كلـه
!.. الحقيقة لبسك النهاردة Tres Tres elegant

ناهد: "بغور واستعراض" طبعاً !.. انتي عارفة إن جوزي "الدكتور جابر"
عمره ما يعز عليا حاجة أبداً.. وكل ما أقوله إني نفسى في حاجة يجبها على
طول.. ده مستعد يجلبي لين العصفور.. انتي عارفة هو بيحبني قد إيه

السيدة دولت: يا بختك ! .. انتي الحقيقة بقيني النهاردة من الطبقة الـ High

Standard

ناهد: "تحاول أن تكتب جماح غضبها" النهاردة؟!.. بقينـت؟!

السيدة دولت.. قصدي انتي كل يوم يا حبيبي.. كل يوم.. كل يوم بتشتبي فيه
إنك من الـ High Class

ناهد: "بغضب" هو أنا محتاجة إثبات؟!

السيدة دولت: لا أبداً.. قصدي.. بصي بقى الحقيقة إن "شكريه" هاتم بتقول
عليكي كلام أياي.. وحش خلاص.. بتقول إنك يعني مش من الطبقة الراقية
ولا حاجة

ناهد: "يلاستخفاف" "شكريه" هاتم هي اللي قالتلك كده؟!.. على فكرة دي
متغاظة مني عشان جوزها كانت عينيه هتطلع عليا يوم ما شافني.. تعرفي
طلب مني إيه ليتلتها؟.. طلب مني "بضحكة خبيثة" ها ها ها طلب مني ها ها
ها.. متهيألي انتي فاهمني.. بس اوعي تقولي لـ "شكريه" لحسن ترزل
السيدة دولت: عيب.. هو أنا أقدر

** ناهد و دولت تضحكان.. لا يزال رفعت يتحدث مع الممثلة هيا م **
الممثلة هيا: "بتوتر" مش عارفة يا دكتور.. حاسة إني مخنوقة
رفعت: مخنوقة؟!.. في حد ضايك في الحفلة؟

الممثلة هيا: "يلابسامة عصبية" لا أبداً.. يعني أنا أساساً بتختنق من أي مكان
مغلول حتى العربية مبسقهاش إلا لو كانت كل شبابكها مفتوحة حتى لو كان
في عز البرد.. تعرف لولا الباب اللي بيدخل ويخرج منه الضيوف لكن
روحت وسبت الحفلة من أساسها
رفعت: غريبة؟!.. طب وإيه السبب؟

الممثلة هيا: "بصوت حالم" أحيايًا بحس إني نفسى أطير زي أي عصفور
وأنسى أي ماضى أو ذكرى مؤلمة.. "تستدرك" قصدي إن كل فنان محتاج
يطير وينسى أي فيلم وحش عمله قبل كده

رفعت: كلنا بنحاول ننسى أي ماضى أو ذكرى مؤلمة مش الفنان بس..

صدقيني كلنا.. كلنا بنحاول ننسى

** الممثلة هيا م بتتسم على استحياء وتنظر إلى رفعت، فلا تجد ما تقوله.. في نفس الوقت تحاول إخفاء مشاعرها.. في منطقة أخرى بمكان الحفل يتحدث المخرج حسين أبو النجا مع أحد الأشخاص **

الشخص 3: يا ترى يا Mon Cheri الفيلم الجديد ه تكون مين بطنته؟

الخرج حسين: ه تكون "هيا م" هي بطلة الفيلم

الشخص 3: "يخت" ويا ترى الفيلم ده زى بقية أفلامك؟.. يعني هيتكلم برضه عن بنت الحارة الشهمة اللي بتقع في حب ابن الأكابر.. بس لو القصة كده استحالة تكون "هيا م" هي بنت البلد.. الدور ده ميلقش عليها خالص

الخرج حسين: مهو عشان كده غيرنا القصة يا إكسلانس

الشخص 3: بجد؟!.. طب إزاي؟!

الخرج حسين: خلينا القصة عن بنت الأكابر اللي بتقع في حب ابن الحارة الشهم الشجاع.. "يخت" ده غير شوية تحابيش من اللي قلبك يحبهم

الشخص 3: "ضاحكا" ههههههه.. انت الحقيقة متغلبش يا Mon Cheri

الخرج حسين: Of Course يا إكسلانس.. Of Course

** المخرج حسين والشخص 3 يضحكان.. في مكان آخر يضم المطرب سمير والشاعرة نادية **

الطرب سمير: "بياس" يا مدام "نادية".. أرجوكي افهميني.. أنا بحاول أشرحلك من الصبح بيان الأيام دي من الصعب جداً إنني أغنى قصايد

الشاعرة نادية: "يخت" صعب ليه؟!.. مهو أنا موجودة وانت موجود.. ايه بقى اللي صعبها؟!

الطربر سمير: "في قمة اليأس" أحوال الشعب هي اللي مصعيهاها.. نكسة ٦٧ مش مخلية الشعب فاضي يسمع الأغاني بتركيز وخصوصاً لو كانت قصايد.. الشعب عايز أغاني تخرجه من اللي هو فيه.. وأنسب أغاني لكده هي أغاني الحب والمرح

الشاعرة نادية: "لا تزال على حالة الغضب" يعني خلاص؟!.. الشعب المصري ميقاش شعب ذواق.. طيب بدمتك دواويني إيه العيب اللي فيها؟؟؟
الطربر سمير: "لا يزال على ياسه" والله ملهاش عيب.. بس كل وقت وله آذان
الشاعرة نادية: "بغضب" آه.. قصدك يعني إن الزمن راح علينا خلاص.. وبقى الزمن للشعراء والملحنين الشباب.. ولا عشان كوني ست وصعب إن أي مقني شاب زيـك يقول إن سر نجاحـه واحدـة ست

* * المطرب سمير يغلي من الغضب *

الشاعرة نادية: "بعتاب ونورة" طب يمكن عشان أنا ست فمش عايز تتعامل معـيا.. يعني يمكن سعادتك مقتـتش بـدواـين واحدـة ست.. طب تقدر تقولـي إـيه السـبـب فـي سـيـبانـك لـمـلـحنـكـكـيـبـرـ وـعـظـيمـ زـيـ الأـسـتـاذـ "عـزـتـ عـبدـ الـحـمـيدـ" .. دـهـ ياـ أـخـيـ الرـاجـلـ مـتـغـاظـ منـكـ، وـعـمـالـ يـقـولـيـ إنـكـ اـنتـ مـتـضاـيقـ منهـ، وـهـوـ مـسـتـعـدـ يـصـالـحـكـ.. يعني حتى اـنـتـواـ ياـ مـعـشـ الشـبـابـ بـقـيـتوـاـ رـأـضـيـنـ لـلـكـبـارـ.. لاـ وـكـمـانـ بـتـرـفـعواـ عـلـيـهـمـ

* * ينقلب وجه المطرب من النقيض إلى النقيض، يرتجف، ويسقط الكوب من يده *

الشاعرة نادية: "يـانـهـاـشـ" إـيهـ ياـ أـسـتـاذـ "سمـيرـ"؟؟؟ مـالـكـ؟؟؟ حاجـةـ
الـطـرـبـ سـمـيرـ: "يـنـظـرـةـ خـوـفـ، وـدونـ أنـ يـنـظـرـ إـلـىـ الشـاعـرـةـ" مـفـيـشـ حاجـةـ.. مـفـيـشـ حاجـةـ

* * نقاطـعـ فـتـاةـ حـدـيـثـهـما~ *

الفتاة: "تنظر إلى الشاعرة" مساء الخير.. أزيك يا مدام "نادية؟؟"
 الشاعرة نادية: "تلتفت إلى الفتاة، وترك الطرب بمفرده" أهلاً "سالي".." مساء
 النور.. أنا الحمد لله يا حبيبتي.. انتي إيه أخبارك؟

** تتحدث الفتاة مع الشاعرة، ويتحدث الجميع مع بعضه البعض، عدا
 المطرب الذي يقف وحيداً.. يخفت صوت الضيوف، ونجد أنهم يحركون
 شفاههم دون أن ينطقوا بكلمة، والمطرب ينظر إلى الأفق البعيد بخوف، و
 يتذكر صوتاً ما **

ص امرأة، تعرف يا "سمير" أكثر حاجة بتعجبني في شكلك إيه؟.." الشامة
 الزرقة.." أية متسنغربيش.." أنا كل ما أبصلها بحس بانجذاب ناحيتها.. رهبة
 في نفس الوقت.. خوف منها.. معرفش.." هي عاملة زي النار.." النار اللي
 بتجذب كل اللي بي Shawfواها بلونها البرتقاني الجميل.." وبتخوف أي حد يقرب
 منها أو يلمسها

المطرب سمير: "غمغماً لنفسه" الحمد لله إنه قالك السبب ده أساساً

الشاعرة نادية: "تلتفت ناحية المطرب" انت بتقول حاجة يا أستاذ "سمير"؟

ناهد: "قطع الحوار الدائر" وهو قادر يقولك حاجة؟!!.. أو انتي مدiale فرصة
 يتكلم حتى.." توجه كلامها إلى المطرب" على فكرة يا حبوب.." الدكتور رفعت"
 و "هيام" نفسها قوي يقدعوا معاك.." هما طلبوا مني كده

** المطرب ينتقل بنظراته بين الشاعرة وناهد، ومن ثم لا يجد مفرأً
 سوى التوجه إلى رفعت والممثلة **

ناهد: "توجه كلامها إلى الشاعرة" صحيح مسمعيش آخر إشاعة؟

الشاعرة نادية: "تحاول إلا تلتفت عينها بعيني ناهد" إشاعة إيه؟

** ناهد تنظر إلى الشاعرة.. نظرة كلها شك **

ناهد: لما اتأكد يا روحي.. لما اتأكد.." توجه كلامها إلى ضيوف الحفل" مش

معقوله جمهورنا هيقدع الوقت ده كله بدون فرفشة وطرب.. دلوقتي أكيد
كلنا متشوقين نسمع كروان الشباب "سمير الصياد"
** يصفق الجميع.. المطرب متعدد **
الطرب سمير، لكن.. أصل أنا..

ناهد، "نقاطع الطرب، وتتجه ناحيته" إيه يا حبوب؟!.. انت مش عايز شباب
الحفلة يهياصوا ولا إيه؟!

الجميع، "في الحاج" يلا يا "سمير" .. عاوزين نسمع حاجة
الطرب سمير، حاضر.. حاضر.. أمري الله

** المطرب سمير يغنى، وكأنه يتذكر ذكرى بعيدة **

الطرب سمير، اللي شفته.. قبل ما تشوفك عينيا.. عمر ضاليع.. يحسبوه
إزاي علينا

** الجميع يصفق.. تتركز الإضاعة ببطء على المطرب.. يتوقف المطرب
عن الغناء، وينظر إلى الأفق البعيد، يتذكر شيئاً ما.. شئ غامض **

الطرب سمير، "في شرود" اللي شفته !!

** يخفت الضوء تدريجياً حتى نصل إلى مرحلة الإظلام التام **

اظلام

المُتَّكِّفُ الْمُتَانِي



* * يضاء المسرح تدريجياً.. لا يبقى في الحفل سوى خمسة أشخاص هم من قامت ناهد بتعريفهم لرفعت.. تضييف إليهم رفعت وناهد ليصبح في مكان الحفل سبعة أشخاص.. تقوم ناهد بتوديع أحد الضيوف عند الباب، وتتبادل معه بعض الكلمات.. يظل رفعت في سجن أفكاره، وما زال صوته يكمل باقى الأحداث *

ص رفعت: لا أدرى متى ولا كيف من بنا الوقت بهذه السرعة.. لكنني نظرت إلى ساعتي لأجدتها الواحدة بعد منتصف الليل.. كان عدد لا بأس به من الحاضرين قد انصرف بالفعل، والغريب أن "الدكتور جابر" لم يظهر بعد.. حفل في داره يوشك على الانتهاء، وبرغم هذا لم نره لحظة واحدة.. نقلت خواطري إلى "مدام ناهد"، والتي كانت واقفة على الباب تودع أحد الضيوف

ناهد: "وكأنها ترد على أفكار رفعت" انت عارف يا دكتور قد إيه جوزي مشغول.. حضرتك برضه دكتور وانت سيد العارفين بين الدكتورة ملهمش مواعيد ثابتة

رفعت: لكن

ناهد: "مقاطعة" أرجوك يا دكتور متقلقش واستمتع بحفلتنا الليلة.. ده غير كمان إني محضرة مفاجأة جباره بس مستتبية الوقت المناسب رفعت: في الحقيقة يا هاتم من الصعب إني أستنى "الدكتور جابر" أكثر من كده.. أنا متشكر أوي على الدعوة وعلى الوقت اللطيف اللي قضيته في حفلتك النهاردة.. لكن للأسف زي كل الأوقات الحلوة اللي بتخلص بسرعة عشان كده يا ريت تسمحيلي أمشي

ناهد: أولاً يا دكتور مفيش داعي للاستعجال لأن النهاردة الخميس وبكرة الجمعة يعني أجازة.. ثانياً مفيش حد هيمشي قبل ما جوزي يرجع.. It Is

Impossible

رفعت: بس يا هاتم

* ناهد: "بتتجاهل" متهيألي آن الأول انى أقولكم على مفاجأة الليلة..
* المفاجأة الجباره

الجميع: "بغضول واند هاش" مفاجأة !!

ناهد: "ياستعراض" أيوة مفاجأة ! .. بس مش مفاجأة عاديّة دي مفاجأة
هالية.. بس استتوا.. احنا كام واحد اتبقى في الحفلة؟.. واحد.. اثنين..
خمسة.. ستة.. سبعة.. تمام.. كل شئ تمام.. Show Time

الممثلة هيام: "بغضول وتندر" ما تقولي بقى ايه هي المفاجأة يا "ناهد"؟?
** الجميع في ترقب **

ناهد: مفاجأة الليلة

** الجميع في ترقب **

ناهد: مفاجأة الليلة هي إننا كلنا مش هنمشي من هنا

** الجميع في صدمة **

رفعت: سبعة مش هيمشوا من هنا !!!.. هي دي فزوره ولا ايه؟!

** يتكلم الجميع في وقت واحد لمعرفة حقيقة الأمر **

ناهد: أرجوكم.. أرجوكم اهدوا شوية، وادوني فرصة أشر حلكم.. الحقيقة
إننا كلنا هنا محبوسين لحد ما جوزى يرجع.. الخدامين كلهم مشيوا وآخرهم
قفل الباب بالمفتاح.. الشبابيك كلها متعدمة بالحديد.. أما التليفون هو
دلوقتي مش شغال لأن في واحد من الخدامين قطع السلك من برة

** الجميع في صدمة أشد **

الخرج حسين: "بغضب" قصدك ايه؟.. مساجين؟!

** الجميع في حالة غضب **

ناهد.. أرجوكم.. استروا بس

** لا يزال الجميع على حالة الغاضب **

ناهد: "متجاهلة غضب الجميع" عموماً دي تعليمات جوزي.. وأنا هنا مسجونة زبي زيكم، ولو قعدتم بهدوء أكيد هقدر أشرح الموقف بالضبط

الكاتب محمود: "بغضب" هو لسه في شرح؟!

** يزداد غضب الجميع **

ناهد: يا جماعة.. اهدوا.. أرجوكم اهدوا.. الحقيقة إن جوزي عنده تفسير الموقف وهو اللي هيفرسه بنفسه

الشاعرة نادية: "بإندهاش" جوزك اللي هيفرسه !!

الطرب سمير: "بإندهاش ممائل" هو "الدكتور جابر" هنا؟!

ناهد: حقيقي آسفه.. أنا قصدي إن صوت جوزي هو اللي هيفرس الموقف.. "الدكتور جابر" سابلني شريط كاسيت، وطلب اني مشغلوش إلا لما يوصل عدد الضيوف لسبعة.. وأنا شايفة إنه جه الوقت عشان نسمع تفسير "الدكتور جابر"

** تتجه ناهد، لإحضار الشريط.. تضعه في الكاسيت.. الكل يتبادل النظارات.. الكل في ترقب.. فجأة ينقطع التيار الكهربائي **

الممثلة هياام: "تنتفض واقفة.. بربع" أنا عايزة أمشي من هنا

ناهد: Don't Worry "هياام".." متقلقيش.." فيه مولد احتياطي.." اهدي أرجوكي عشان نسمع الشريط

** يسطع ضوء المسرح فجأة.. "الدكتور جابر" على المسرح.. الجميع

يستمع إلى الشريط، بينما روح "الدكتور جابر" تطوف بهم **

جابر: مساء الخير.. في البداية أحب أوكدلكم إن الشريط ده بيتسمع لأول مرة، ويا ريت "زوجتي العزيزة ناهد" تسامحني عشان بدللت الشريط اللي سمعته بشريط تاني، وكنت متأكد إنها مش هتلaci فرصة عشان تسمع الشريط الجديد

** ناهد في صدمة **

جابر: طبعاً كلكم عارفين صوتي.. بس محدش قدر يلاحظ إن في بحة غير طبيعية فيها.. لاحظتها "ناهد" مرة، وقعدت أقولها كلام كتير أوي عن البرد وعن الإلتهابات اللي عمرها ما بترحم حد حتى الدكاترة.. لكن للأسف مش دي الحقيقة.. "ناهد".." أنا عندي السرطان، وطبعاً لازم أي واحد يجيشه المرض ده يقول الجملة المشهورة: يا ريتني كنت بطلت شرب السجائر من زمان.. لكن للأسف الوقت فات

** ناهد في صدمة، وتمتزج الصدمة بالدموع **

جابر: سافرت برة عشان أتعالج وعملت كل شئ ممكن.. تحاليل.. أشعة.. لكن الدكاترة قالولي إن قطر العلاج فاتني.. طبعاً أنا كنت عارف كل ده بحكم كوني دكتور.. ده غير إني كمان عارف إن في عملية بتعمل في الحالات دي، لكن نجاحها مش مضمون.. يعني نجاحها ميتجاوزش 1 %

** الكل لا يفهم شيئاً.. لا تزال الصدمة مسيطرة على ناهد، ولا تزال دموعها هي سيد الموقف **

جابر: الليلة مش هكون في مصر.. لما تسمعوا الشريط ده هكون واحد أول طيارة مسافرة برة.. طبعاً هعمل العملية، لكنني عارف إن الموضوع تحصيل حاصل، وإنني أكيد ميت.. أنا سامعكم بتسألو عن السبب اللي خلاني العب معакم اللعبة دي.. أقولكم إن في حفلة في بيتي.. وطبعاً تيجوا وأنا مكنش موجود.. وتلاقوا نفسكم فجأة مساجين.. أكيد "ناهد" قالتلكم إن

الخدامين رجعوا لبيوتهم وإن آخر واحد منهم قفل الباب.. ده غير إنه قطع سلك التليفون عشان يقطع معاه الأمل في إنكم ممكن تخرجو من هنا.. طبعاً كل ده معروف "إننا هد" وبسبب غباوتها قبلت تشاركتني فيه متصورة إنها لعبة، لكن عمرها ما فكرت أو شكت لحظة واحدة إن هدفي الوحيد من اللعبة دي مش التسلية.. لا.. هدفي الوحيد هو الإنقاص

** الكل في حالة دهشة **

جابر: أيوة الإنقاص.. في الحقيقة أنا باكرهكم.. باكرهكم.. باكره وشوشكم اللي بتدخل بيتي عشان تتسلل وتتبسط.. والحقيقة إنه لو لا أهمية وجودكم عشان البرستيج لكنت طردتكم من بيتي.. لا ومش بس كده.. ده أنا كنت ممكن أقتلكم بأقرب عملية مبيعد للصرافين.. أنا بتعنى إن محدثش منكم يتضاعف لأن كلامي ده ميقصدش حد معين لأن ربنا هو اللي وحده عالم مين السبعة اللي فضلوا في بيتي لحد دلوقي.. عشان كده بسأل.. يا ترى "الشاعرة العبرية نادية فهيم" موجودة؟.. لو كانت موجودة أحب أبلغها إني بكرهها.. وبكره أنعرتها وحبها للأدب والشعر، وهي في الحقيقة أغبى من الحمار الحصاوي

** النظارات مركزة على الشاعرة نادية.. الشاعرة تشتعل كبركان من الغضب **

جابر: أهو ده أول تخمين.. طب جينا بقى لتناني تخمين.. عشان كده بسأل.. يا ترى المخرج الوسخ "حسين أبو النجا" موجود؟.. أنا عارف قد إيه وساخته عشان كده أنا بكرهه، وعارف كوييس إنه هو كمان بيكرهني

** تنتقل النظارات إلى المخرج حسين.. المخرج ليس أفضل حالاً من الشاعرة **

جابر: أديني أهو نشتنت.. ويا ريت نشاني صاب.. عموماً أنا متأكد من

حاجة واحدة بس.. مراتي هنا.. مهما كان الستة اللي هنا.. أكيد "ناهد" هي السابعة

** النظرات الآن موجهة إلى ناهد.. لا تزال صدمة ناهد هي سيد الموقف **
 حابر: في الحقيقة "ناهد" بالضبط عاملة زي الكاتلوج.. وكاتلوج "ناهد" مش زي أي كاتلوج.. لا.. ده كاتلوج خاص جداً.. كاتلوج بيشرح بالضبط إزاي ممكن زوجة تعذب وتدمّر جوزها طول حياته.. وإزاي تقدر تستعبده، وتخلية يشتغل ليل نهار زي التور في ساقية.. ومش كده وبس.. لاب.. دي كمان بتحسسه قد إيه هو فاشل، وقد إيه هي مستحملاه، والفلوس اللي بيدھالها أقل بكثير أوي من اللي هي تستحقه.. وعشان كده البيت بقى عذاب، وبقيت أغرق في الشغل عشان أنسى الغوله اللي أنا متجوزها.. طبعاً بقى غنى، واتصورت إن "ناهد" ممكن تعقل وتهتم ببيتها وجوزها، لكن للأسف ظني مطلعش في محله.. تصورووا إني أول ما اغتنيت لقيت "ناهد" اتحولت وقلبت 360 درجة، وبقى فيه "بابي" و "مامي" و "pardon" وغيرها كتير.. عملت فيها سيدة مجتمع، ونسيت إن ليها بيت وزوج كانوا الأولى بالرعاية والإهتمام.. في الحقيقة في شخص واحد بس في الحفلة دي عمري ماكرهته.. "الدكتور رفعت إسماعيل"

** تتركز النظرات على رفعت.. رفعت محاولاً سبر أغوار الحديث **
 حابر: يا ريت يا دكتور تكون مسامحي لو لسه مشتش.. صدقني أنا عمري ماكرهتك.. ممكن بس تقول إني مش طايقك.. ويمكن السبب في كده إلack بتحب الأوكسجين، أما أنا بحب ثاني أكسيد الكربون.. انت بتحب الوحدة والإلتواء والغرلة.. وأنا بحب الإختلاط والمرح والفكاهة.. عشان كده يمكن كل ما أشوفك تفكري بكانن وحيد الخلية.. كانن من المريخ.. متھيألي ده أدق تعبير ممكن أوصفك بيـه.. وده في حد ذاته كان سبب رئيسي

في إن أرواحنا عمرها ما تلاقت على أرضية واحدة.. لكن بالرغم من الأسباب دي كلها إلا إني كنت محتاجلك في الحفلة عشان العدد يكون كبير، وأضمن إنه هيفضل ست ضيوف أغبياء في آخر الحفلة.. عموماً لعبة حبسكم اليتلا ليها قواعد، ويا ريت محدث يخرج عنها.. في الأول خلونا نحلل الموقف.. إنتم مساجين هنا.. الباب الرئيسي مفتوح.. لا.. متفكروش تكسروا الشبابيك لأنها كلها متدعمة بالحديد.. أنا سامع واحد منكم بيقول نكسر الباب، وعشان كده بقوله اطمئن.. أنا بنفسي أتأكد إن أبواب الفيلا استحالة تتكسر.. ممكن اللي يكسر هو عظمكم وبس.. لكن في فرصة للخروج من الأزمة دي.. لأن في 3 أبواب وراكم مفتوحين.. لا.. لا.. أرجوكم مفيش داعي للاستعجال وادوني فرصة أشرح لكم لأن مفيش غير باب واحد بس هو اللي ممكن تخرجوا منه، والإثنين الباقيين هيقضى عليكم.. الباب الأول هو باب المكتب.. الباب الثاني هو باب أوضة السفرة.. الباب الثالث هو باب السينما.. وطبعاً مش هقولكم أنه باب فيهم هو باب النجاة.. طبعاً "ناهد" مكنش عندها الوقت الكافي لدخول الأوض دي.. للأسف أملكم في الخروج معذوم.. لكن ممكن تفكروا وتناقشوا بعض لغاية لما توصلوا لإجابة، وبعدها تختاروا الباب اللي اتفقتم عليه، ويا ريت تختاروا الباب الصح لاتكم لو اخترتو الباب الغلط هتموتوا موته رهيبة هتكتب عنها الجرائد لشهر قدام.. موقفكم ده عامل زي أي موقف في حياتنا.. الكل قدامه بابين.. باب يوصل للشهرة والنجاح.. وباب يوصل للموت والدمار.. المشكلة في الاختيار.. والمشكلة الأكبر هي إننا مانخترش الباب الغلط.. أديني أهو اخترت بابي، وكانت النتيجة سرطان وكره من غير حدود ليكم وللي زيكم.. لكن يا ترى إنتم بقى هتختاروا أي باب؟.. الأمل للأسف ضعيف، لكن فيه فرصة.. لأن سبعة عقول بخبراتها وتجاربها وأنس... "يقف جابر لحظة، ويبتسم برعن فمه، ويغمز بعينيه للجمهور.. الكل مندهش

من توقف جابر عن الاسترسال.. يننظر جابر إلى الضيوف، ليكمل حديثه "سبع عقول بخبراتها وتجاربها مع الباب المفتوح أكيد ولازم توصل للجواب الصحيح.. أكيد بتسألوني: اشمعنى رقم سبعة بالذات؟.. سؤال جميل، وأنا أحب الأسئلة الجميلة.. رقم سبعة مهم جداً في حياتي.. أكيد هتسغريوا لو عرفتم إني مولود يوم سبعة في شهر سبعة سنة 1917.. رقم سبعة مهم جداً في الأديان، وفي قصص شعوب العالم.. عشان كده فكرت إني لازم العب لعبتي على آخر سبع ضيوف.. أنا عارف إنكم دلوقتي بتشتمني، وبتدعوا من قلوبكم إن ربنا يخرب بيتي.. لكن عمري ما كنت مهمتهم بيكم لا قبل موتي ولا بعده عشان كده هموم راضي وسعيد لإني نفذت انتقامي زي ما أنا متصور بالضبط.. سلام يا بهوات.. وبتمثالكم حظ سعيد في اختيار باب النجاة

** خرج جابر.. الصمت.. التوتر.. الخوف.. ربما كل تلك المشاعر مجتمعة **

رفعت: "في شرود" صدید !.. "الدكتور جابر" ضغط على دمل كبير في روحه.. لوث كلامه ولوثنا معاه بالصدید الكاتب محمود : "يثور في وجه ناهد" جوزك يا مدام راجل مجنون.. مجنون رسمي.. والغريبة إن مفيش حد لاحظ جنانه ده الممثلة هيا م": "برعب" لا.. لا.. مستحيل ده يحصلنا.. أرجوكم قولولي إن اللي بيحصل ده حلم فظيع.. كابوس لازم نصحى منه رفعت: "يحاول المهدوء" نهدى.. نهدى شوية يا جماعة.. قولولي في حد منكم قال لأهله إنه موجود هنا

المطرب سمير: "يحاول التماسك" في الحقيقة أنا مقولتش لحد إني هكون موجود هنا.. ده غير إن الخدام عارف إني مليش مواعيد ثابتة

رفعت: "يسأل الكاتب محمود" هي المدام تعرف إنك هنا؟
 الكاتب محمود: "بعصبية" للأسف لا.. هي مع الولاد في العجمي
 ومتعرفش إني هنا

الخرج حسين: "يسأل رفعت" وانت يا دكتور؟

رفعت: مراتي متعرفش إني هنا

الممثلة هياام: "بتوتر، وتتجه ناحية الأبواب الثلاثة" بقولوكوا إيه.. اللعبة
 دي بدأت توترني.. تعالوا بقى نخرج من هنا

ناهد: "تحاول التماسك، وتمسك بالممثلة" أرجوكي اهدى يا "هياام" .. ده
 باب السينما.. ودي من الأبواب اللي اتكلم عليها "جابر"

الممثلة هياام: "بعصبية، وتحاول الإفلات من ناهد" أنا ميهمنيش إيه اللي
 قاله جوزك الغبي.. المهم إني هخرج من هنا.. ولدوقتي حالاً

ناهد: "تصرخ في وجه الممثلة" اهدى

* الكل ينظر إلى ناهد.. خوف.. ناهد على حافة الانهيار *

ناهد: "تصرخ، وتهز الممثلة بعنف" أنا قلتاك اهدى

رفعت: أنا مش قلت اهدوا.. أنا حاسس إن الموضوع ده هزار ومحاولة
 لإختبار أعصابنا

ناهد: "بصارارة" مستحيل.. لو كنت تعرف جوزي كويس كنت عرفت إن
 عمره مابيهرز في الحاجات دي.. وإنه لما يقول أنا ناوي أقتلك.. بيبقى أكيد
 هيفتك

* لحظة صمت.. رفعت ينظر إلى الجميع *

رفعت: "يحاول الهدوء" طيب.. خلونا نفك بطريقة منطقية، وحيث إننا
 بنواجه موقف حقيقي بيبقى لازم نشغل عقولنا

الكاتب محمود: "بنفاذ صبر، واستنكار" هو إ هنا لسه هنشغل عقولنا؟؟!!
إ هنا بـنواجه موقف عمر ما حد فينا واجهه في حياته قبل كده

رفعت: "يحاول التركيز" خلونا بـس نفكـر.. إيه اللي ممكن نلاقيه لو
فتحنا الباب الغلط؟

** لحظة صمت.. و.. خوف.. الكل يتـبـادـلـ النـظـرات.. الكل في حالة توتر **
الطرب سمير: عمرنا ما هـنـعـرـفـ أـبـدـاـ

رفعت: بالضبط.. بـسـ الحلـولـ السـهـلـةـ كـتـيرـ.. كلـبـ متـوـحـشـةـ.. قـبـلـةـ تـفـرقـعـ
فيـناـ

الطرب سمير: لكن يا "دكتور رفت" كل اللي حضرتك قلت عليه
محسنـيـ إنـنـاـ فـيـ قـصـةـ خـيـالـيـةـ مـلـهـاـشـ أيـ عـلـاقـةـ بـالـوـاقـعـ

رفعت: تمام جداً، وده معناه إن في احتمال كبير إن "الدكتور جابر"
بيهـزـرـ معـانـاـ.. بـسـ هـزـارـ تقـيلـ شـوـيـةـ

ناـهـدـ: "تصـرـخـ" مـسـتـحـيلـ.. أناـ قـلـتـكـ إنـ جـوزـيـ عمرـهـ مـاـبـيـهـزـ

** لـحظـةـ صـمـتـ أـشـبـهـ بـالـدـهـرـ.. الكلـ فيـ حـالـةـ تـوـتـرـ.. الكلـ يـنـظـرـ إـلـىـ
الـشـاعـرـةـ وـهـيـ تـدـخـنـ.. لـفـافـةـ التـبـغـ تـهـزـ بـيـنـ أـنـامـلـهـاـ.. باختـصارـ الجـمـيعـ مـثـلـ
لـفـافـةـ التـبـغـ التـيـ فـيـ يـدـ الشـاعـرـةـ **

الممثلة هـيـاـمـ: "تجـلسـ بـبـطـءـ عـلـىـ الأـرـيـكـةـ.. فيـ شـرـوـدـ.. خـوـفـ" يعني
إـيهـ؟؟!!.. مشـ هـنـخـرـجـ مـنـ هـنـاـ؟؟!!

** يـظـلـ المـسـرـحـ فـجـأـةـ، تـرـكـ الإـضـاءـةـ عـلـىـ المـمـثـلـةـ التـيـ تـجـلسـ عـلـىـ
الأـرـيـكـةـ.. المـمـثـلـةـ تـرـتـعـشـ، وـتـنـظـرـ إـلـىـ الـأـفـقـ الـبـعـيدـ.. تـنـفـضـ.. تـتـذـكـرـ شـيـئـاـ مـاـ
**

صـ رـجـلـ: "بـخـبـثـ، وـجـنـونـ" تـعـالـيـ يـاـ كـنـكـوتـةـ.. خـايـفةـ منـ ليـهـ؟؟!!.. خـايـفةـ
منـ عمـوـ؟؟!!.. عمـوـ جـايـبـكـ شـيـكـولـاتـةـ.. مشـ عـايـزةـ تـيجـيـ ليـهـ؟؟!!.. طـبـ أـجيـلـكـ

أنا.. تعالى يا أموره.. "يتحول الصوت إلى لهجة قاسية" تعالى بقى
 ** هناك يد تلتف حول عنق الممثلة في الظلام.. الممثلة تصرخ بأعلى
 صوتها **

الممثلة هيام: "في حالة بكاء هستيري ك كما الأطفال" لا.. لا يا عمرو.. بعد
 عنـي.. عـشـان خـاطـر بـنـاتـك الـحـلوـين.. وـالـنـبـيـ ياـعـمـوـ ياـعـمـتـيـ اـنـتـيـ فـيـنـ ياـعـمـتـيـ؟.. بـاـبـاـ رـاحـ فـيـنـ ياـعـمـتـيـ؟.. حـراـمـ عـلـيـكـ ياـعـمـوـ.. حـراـمـ عـلـيـكـ.. حـراـمـ
 عـلـيـكـ

** يُضاء المسرح مع صرخ الممثلة لنكتشف أن اليد التي تلتف حول
 عنقها ما هي إلا يد الشاعرة **

الشاعرة نادية: "وهي تحتضن الممثلة في حنان" مالك يا "هيام"؟.. في
 ايـهـ؟.. مـالـكـ؟.. مـالـكـ؟

رفعت: "يوجه كلامه لناهد بعصبية" معدكيش قرص مهدئ؟
 ناهـدـ: "لا تدرـيـ كـيـفـ تـتـصـرـفـ" مـفـيـشـ ياـ دـكـتـورـ.. مـفـيـشـ غـيرـ الـأـكـلـ
 وـالـشـرـبـ.. الفـيلـلاـ دـيـ بـسـ لـلـحـفـلـاتـ.. لـيـنـاـ شـقـةـ تـانـيـةـ.. "تبـكـيـ" الفـيلـلاـ دـىـ
 "جاـبـرـ" مـخـصـصـهاـ عـشـانـ تـنـقـمـ منـنـاـ ياـ دـكـتـورـ.. تـنـقـمـ منـنـاـ

** ترتمي ناهـدـ فـيـ حـضـنـ رـفـعـتـ.. رـفـعـتـ يـرـبـتـ عـلـيـهـاـ وـلـاـ يـدـرـيـ ماـ الـواـجـبـ
 فعلـهـ.. المـطـربـ يـتـبـادـلـ النـظـرـاتـ معـ المـخـرـجـ وـالـكـاتـبـ.. الـجـمـيعـ كـالـتـماـثـيلـ التـيـ
 لاـ تـدـرـيـ بـدـورـهـاـ ماـ الـواـجـبـ فعلـهـ **

الـكـاتـبـ مـحـمـودـ: "فيـ شـرـودـ" يـعـنيـ مـفـيـشـ أـمـلـ.. مـفـيـشـ فـائـدةـ
 المـخـرـجـ حـسـيـنـ: الـظـاهـرـ مـفـيـشـ غـيرـ حـلـينـ.. يـأـمـاـ نـفـضـلـ هـنـاـ.. يـأـمـاـ نـخـتـارـ بـابـ
 مـنـ الـأـبـوـاـبـ التـلـاثـةـ وـإـحـنـاـ وـحـظـنـاـ

** رـفـعـتـ يـجـلـسـ نـاهـدـ، وـيـهـدـئـهـاـ.. يـنـظـرـ رـفـعـتـ إـلـىـ المـخـرـجـ **
 رـفـعـتـ، يـبـقـىـ هـنـسـتـيـ هـنـاـ.. فـيـ اـحـتمـالـ كـبـيرـ انـ أيـ بـيـاعـ اوـ مـحـصـلـ كـهـرـبـاـ

أو ضيف يجي ويخطب الباب وساعتها... . . .

المطرب سمير: "يُقاطع رفعت.. بِإِسْتِيَاءٍ" لكن كل ده بيحتاج لوقت.. على الأقل ده مش هيحصل إلا الصبح.. أو ممكن ميحصلش خالص رفعت: "يحاول تهدئة الطرب" افهمني.. إحنا سبعة وكلنا مشهورين، فمش معقوله غيابنا ميثرش الناس وأجهزة الأمن

الخرج حسين: أنا متفق مع "رفعت" .. إحنا هنفضل هنا.. نكمل حفلتنا..
البيت مليان أكل وشرب .. "يَبْتَسِم بِمَرَارَةٍ" حتى الطرب موجود هنا
** يبتسم المطرب بطريقة عصبية **

الخرج حسين: "يُكَمِّل" لكن المشكلة لحد إمتهى هنفضل هنا؟.. الأكل والشرب هيخلصوا هيخلصوا.. وإن ممتناش من انتقام "جابر" هنموت من الجوع والعطش

** يتتبادل الجميع نظرات.. الجميع في حالة توتر.. تقف الشاعرة بعد أن هدأت من روع الممثلة **

الشاعرة نادية: مفيش غير إننا نقعد هنا.. هو ده الحل لناس في ظروفنا..
محدش بيسأل عنهم، ولا حد بيهمه فين بيأتوا ليتلهم

** يتتبادل الجميع النظارات عدا الممثلة التي لا تزال على حالة الشرود،
يهزون رؤوسهم علامة الموافقة.. يجلس الجميع.. الكاتب يفك ربطه عنقه..
رفعت يخلع سترته.. باختصار الكل يأخذ راحته، ويتحرر مما يُثقل كاهله..
يتأمل الجميع الأبواب في شرود، وفضول **

رفعت: "شرود.. فضول" يا ترى إيه الرعب اللي ممكن نلاقيه ورا الباب؟

** يتتبادل الجميع النظارات.. يبتعد الجميع بنظراتهم عن بعضهم البعض..
الكل لديه تخيل خاص عن الموجود وراء الباب المغلق **

الشاعرة نادية: "في شرود" أكيد مفيش حد فينا إلا وكانت ليه تجربة رهيبة

مع باب مفتوح.. الباب الفاصل بين عالمين.. بين الجهل والمعرفة.. بين الرعب والخذلان.. بين الانتظار ونهاية الانتظار

رفعت: "يَهُبْ وَاقْفًا، وَكَانَهُ تذَكِّرْ شَيْئًا" بالضبط !

** ينظر الجميع إلى رفعت في تساؤل **

رفعت: "نَاظَرَا إِلَيْهِمْ" فكرروا معايا كده.. سبع عقول بخبراتها وتجاربها مع الباب المفتوح أكيد ولازم توصل للجواب الصحيح.. يا ترى "الدكتور جابر" يقصد إيه؟

** ينظر الجميع إلى رفعت في تساؤل ممزوج بالغباء.. رفعت ينظر إلى الجميع محاولاً أن يشركهم معه في الحديث بنظرات عينيه.. من الواضح أنه لا جدوى من النظارات **

الكاتب محمود: "يتأمل رفعت" ممكن تكون جملة عادية جداً.. ممكن يكون "جابر" حب ينهي كلامه بطريقة درامية

رفعت: "يَفْكِرُ فِي الْأَمْرِ" تفكير؟!

الخرج حسين: أنا مع "محمود" في اللي قاله.. متناساش يا "رفعت" إن كلام "جابر" عن الأبواب اللي بتوصلنا للنجاح أو للفشل انتقال بشكل فلسفى رفعت: "يَنْظُرُ إِلَى الْخَرْجِ، وَلَا يَزَالْ يَفْكِرُ" مستحيل.. مستحيل كلام "جابر" عن التخطيط الرهيب لحبسنا الليلة يكون مجرد كلام فلسفى.. عمر مادي كانت فلسفة.. دي اشارة.. بس اشاره غامضة شوية

الطرب: "بِنَفَادِ صَبَرٍ" طب بذمتك هو يقصد إيه؟

رفعت: "لَا يَزَالْ يَفْكِرُ" مهو ده اللي بحاول أوصله.. يقصد إيه بالجملة دي.. "جابر" يقصد إن ده هو الحل؟

** لحظة صمت **

الشاعرة نادية: "تقاطع لحظة الصمت" حل لإيه بالضبط؟

* رفعت ينظر إلى الشاعرة في شرود **

رفعت: "في شرود" حل لخروجنا من هنا

* يصمت الجميع.. النظارات هي التي تتحدث بدلاً منهم **

ناهد: حل لخرجنا من هنا أحياء ولا أموات يا "رفعت"؟

** لحظة صمت *

رفعت: "يتأمل ناهد في شرود" مش عارف.. مش عارف.. أنا بحاول أفهم
يقصد إيه من جملته دي

* يصمت الجميع ليتركوا لرفعت حرية التفكير.. رفعت يدور حولهم..
يعود إلى منتصف تجمعهم ليتوقف فجأة **

رفعت: "يحاول الإمعان، وتخيل شئ ما.. ينظر إلى الجمهور" حاولوا
تخيلوا الباب.." وكأنه يلمس شيئاً أمامه" باب.. لو فتحنا الباب.. أي
باب.. نفتح باب في شقة هيوصلنا لأوضة.. نفتح باب المصلحة هيوصلنا
لماكتينا.. نفتح باب الطيارة هتوصلنا لأي حنة إحنا عايزين نروحها.. الباب
يقدر يوصلنا للي إحنا عايزيته.. طب يقصد إيه بسبع عقول؟ ؟

* يتبدل الجميع نظرات عدم الفهم.. رفعت ينظر إلى الشاعرة.. يذكر
شيئاً ما *

رفعت: لو عايزين نقول لحد مبيفهمش إنه يفهم كلامنا نقوله إيه؟

الشاعرة نادية: بنقوله أفهمني

رفعت: "يحاول التركيز للوصول إلى الحل" لا.. لما نقول لحد يشغل مخه
معانا نقوله ..

المطرب سمير: "يكمel جملة رفعت" فتح مخ

رفعت: "يناظر إلى الطرف" بالضبط.. "يعود إلى تركيزه" نفتح الباب..
نفتح مخنا.. نفتح الباب.. نفتح مخنا.. نفتح الباب.. نفتح مخنا.. "يعد على
أصابعه" في هنا كلمة "نفتح" مرتين.. يبقى عشان نفتح الباب لازم نفتح
مخنا في الأول

** يتبدل الجميع النظارات، ويحاولون فهم ما يقوله رفت، ومن ثم
يقتربون منه**

ناهد: "بأمل" كمل يا "رفعت" .. كمل
رفعت: "ينظر إلى الكاتب.. في شرود" مخنا.. مخنا.. بيكون جواه إيه
يا "محمود"؟؟

الكاتب محمود: هيكون جواه إيه يعني؟؟

رفعت: "بنفاذ صبر" يا "محمود" ..

الكاتب محمود: "يُقاطع رفت في ذكاء" أية فهمتك.. فهمتك.. جوه
عقلنا معلومات وخبرات و... .

رفعت: "مقاطعاً في شرود" المعلومات

** يتبدل الجميع نظارات عدم الفهم، لكن بها القليل من الأمل **
رفعت: "يُكمل، وينظر إلى الجميع في شرود" عشان نفتح عقولنا اللي
هيخلينا نفتح الباب لازم يكون في معلومات عن اللي بنتعرضله دلوقتي
الخرج حسین: "منْهَا" معلومات؟!! أنا افتكرت "جابر" قال كل حاجة
تخلينا نفك نخرج من هنا إزاي

رفعت: "ياستيء" لا.. مش دي المعلومات اللي أنا بقصدها.. "محاولاً
التركيز مرة أخرى" أنا قصدي معلومات من نوع تاني خالص.. معلومات
ممكّن تفتح عقولنا على حقيقة الوضع اللي إحنا فيه

الشاعرة نادية: أنا فهمتك يا "رفعت" .. وأنا عندي المعلومات دي
 رفعت: "ينظر إلى الشاعرة" وأنا برضه
 الكاتب محمود: وأنا كمان
 المطرب سمير: "بغيط" وأنا مش فاهم حاجة

الشاعرة نادية: "وهي تنظر إلى الطرب" المعلومات اللي يقصدها
 "رفعت" مش المعلومات اللي ادهانا "جابر" في الشرطي.. لا.. قصده
 المعلومات أو بمعنى أوضح المواقف اللي شبه الموقف اللي إحنا فيه.. على
 أساس إن المعلومات بتكون نتيجة مواقف اتعرضنلها في حياتنا.. جايز أي
 موقف منهم يقدر يوصلنا للحل الصحيح

الخرج حسين: "بنظرة غباء" والله العظيم أنا ما فاهم ولا كلمة من اللي
 بتقوليه ده

- ناهد: "توجه حديتها إلى رفعت" أرجوك يا "رفعت" .. وضح اللي انت
 تقصد

رفعت: "ينظر إلى ناهد.. لا يزال يفكر" أنا قصدي إن موقفنا ده شبه
 مواقف كثيرة.. يعني مثلاً وضعنا ده ممكن نلاقيه في مجال الأدب
 ناهد: "بس هشة الأدب؟"

رفعت: "ينظر إلى الأفق البعيد" موقفنا ده بيشبه الموقف اللي اتعرض
 ليه خطاب "بورشيا" في مسرحية "تاجر البندقية" "شكسبير" .. كان كل
 واحد منهم عشان يتجوز الأميرة "بورشيا" لازم يختار صندوق من ال 3
 صناديق.. الأول من الذهب.. الثاني من الفضة.. الثالث من الرصاص.. وفي
 صورة للأميرة موجودة في صندوق واحد بس من الصناديق الثلاثة..طبعاً
 كل الخطاب افترضوا إن صورة الأميرة موجودة يا في الصندوق الذهبي يا
 في الصندوق الفضي، لكن بطل المسرحية هو الوحيد اللي فهم اللي تقصد

الأميرة فاختار الصندوق الرصاص.. وكان هو الصندوق المطلوب
الشاعرة نادية: "تُفَكِّر هِيَ الأُخْرَى" يمكن يكون هو ده الحل.. أقل الأبواب
في الجمال هو الحل.. ممكن تستبعد باب السينما لإنه باب متميز عن البابين
الثانيين.. لكن المشكلة إن باب المكتب وباب أوضة السفرة زي بعض.. يعني
في النهاية قادمنا بابين مش عارفين نختار أي واحد فيهم
ناهد: "بِإِسْتَهْزَاءٍ" طبعاً ده لو كان استنتاج سعادتك صحيح
** الشاعرة تنظر إلى ناهد نظرة نارية **

الكاتب محمود: في برضه قصة "ستوكتون" المشهورة عن الأسير اللي
قدامه بابين.. باب وراه أميرة جميلة.. والباب الثاني وراه نمر محبوس..
المشكلة إن "ستوكتون" نفسه منهاش القصة.. ده غير إنه أعلن إنه
عاجز، ومقدرش يحط نهاية القصة، وخلی النهاية مفتوحة
رفعت: "يَتَنَاهِ" مش عارف.. المسألة شكلها معقد
** يصمت الجميع.. رفعت لا يزال يُفَكِّر **
رفعت: "يَنْظُر إِلَى الشَّاعِرَةِ" انتي ليه قولتي إن مفيش حد فينا إلا وكانت
ليه قصة مع باب مفهول؟
** تنظر الشاعرة إلى رفعت **

الشاعرة نادية: "بعد لحظة صمت" يعني مفيش حد فينا إلا وحصلته
حاجة وهو صغير مع باب مفهول.. اتحبس في أوضة ظلمة عشان عمل
حاجة غلط.. أو اتفقل عليه باب الأسنسير وهو لوحده.. يعني كل اللي
أقصده مفيش حد فينا إلا وكان له موقف من المواقف دي
** ينظر رفعت إلى الشاعرة، يعاود التفكير، يتذكر فجأة شيئاً **
رفعت: استتوا الحظة

الطرب سمير: "ياستياء.. فضول" خير؟!

رفعت: "يُكمل وكأنه لم يسمعه" إن عقولنا بتخزن حاجات كثيرة.. بتخزن المعلومات والخبرات والتجارب.. لكنها بتخزن حاجة مهمة جداً.. عقولنا بتخزن الأسرار

الكاتب محمود: "ينظر إلى الخرج في خوف" أسرار !!

رفعت: "ينظر إلى الكاتب" أية أسرار.. الأسرار اللي عمرها ما بتخرج برة عقولنا وبتدفن معانا يوم ما نموت.. المعلومات ممكن أي حد يلاقيها في الكتب.. الخبرات والتجارب معظمنا اتعرضلها تقريباً وخصوصاً مع الباب المفتوح زي ما قالت نادية.. لكن ناقص الأسرار.. الأسرار الموجودة برضه في عقولنا..

ناهد: "بحروف" أنت تقصد إيه يا "رفعت"؟!

رفعت: "ينظر إلى ناهد" الحقيقة مش عارف دماغي هتوصلنا لفين.. بس لو كان كلامي مضبوط يبقى جملة "جابر" اللي وقف عندها، ولمح بيها تبقى "سبع عقول بخبراتها وتجاربها وأسرارها مع الباب المفتوح أكيد ولازم توصل للجواب الصحيح".." يبقى الحلة اللي وقف عندها في الجملة دي.. هي الإشارة.. هي الحل للوصول لبر الأمان

ناهد: "بحروف" تقصد إيه يا "رفعت"؟!

رفعت: "ينظر إلى ناهد بفزع" مش أنا اللي أقصد.. ده "جابر" اللي يقصد

** يصمت رفعت قليلاً، ويراقب وجوههم المتوتة **

رفعت: "يُكمل.. بصوت خافت" يقصد إن أسرارنا تطلع للنور.. كاتنا في فيلم سينما "مشيراً إلى الجمهور" والجمهور هو اللي يحكم

ناهد: "بحروف.. تشير إلى الجمهور" قصدك "جابر" هو اللي يحكم

** القلق هو سيد الموقف.. ينظر رفعت إلى ناهد.. الكل يتبادل النظرات

**

الطراب سمير: "بخوف.. قلق" يا ترى "جابر" يقصد إيه بده كله؟

** يظلم المسرح فجأة.. الإضاءة تتركز على الممثلةجالسة على الأريكة.. الممثلة ترتعش.. عيناهما تذهبان للأفق البعيد.. صوت يتعدد في جنبات المسرح **

ص امرأة قاسى: أنا قلتلك كذا مرة متعمليش الكلام ده
ص فتاة: "بكاء" خلاص يا عمنو.. مش هعمل كده تاني.. أرجوكي يا عمنو متشنديش.. متودنيش الأوضة الظلمة.. بلاش يا عمنو.. علشان خاطري بلاش

ص امرأة قاسى: الدخلي.. أصلك لازم تتربى

ص فتاة: "بكاء، وتحاول فتح الباب" خلاص يا عمنو.. مش هعمل كده تاني.. خلاص.. علشان خاطري.. علشان خاطري.. والنبي يا عمنو.. والنبي صوت عقارب الساعة وهى تتحرك.. تتحرك.. الممثلة ترتعش أكثر..
* البكاء الهستيري *

ص فتاة: "بخوف" أرجوكي يا عمني.. افتحي الباب.. أنا خايفة.. خايفه..
الأوضة ظلمة أوي يا عمني.. حرام عليكى، والنبي افتحي الباب
* هناك صوت باب خارجي يفتح، ليس باب غرفة الفتاة.. صوت بكاء..
وقع أقدام.. ضرب.. أنين *

ص فتاة: عمني.. عمني ردى عليا يا عمني.. أنا خايفة.. عمني.. أنا خايفه يا عمني.. عمني ي ي ي ي ي
* يتعدد صوت الفتاة.. يسطع ضوء المسرح فجأة *

رفعت: محدث فينا يعرف سبب معظم الأفعال الغريبة اللي بنعملها في حياتنا.. بيقى هنعرف "جابر" يقصد إيه بده كله؟!!

* لحظة صمت *

رفعت: "يكمـل" كل اللي أقدر أقوله إن الحل في خروجنا من الأزمة دي في ايدينا.. الحل في خروجنا من الأزمة دي نابع من أسرارنا

المطرب سمير: "يبتعد عنهم.. توتر" أسرارنا؟!! إيه الكلام الفاضي ده؟!

* تلتفت الشاعرة إلى المطرب، ومن ثم تقترب منه.. تدير وجهه ناحيتها.. تنظر في عينيه.. الآخرون يتبادلون النظارات.. اندهاش مما يروه أمامهم بين المطرب والشاعرة *

الشاعرة نادية: "تنظر في عيني المطرب.. بصوت كالفحيج" تفتكر يا "سمير" محدث فينا وراه أسرار حتى انت؟!

- * لحظة صمت تلتقى فيها عينا المطرب بعيني الشاعرة.. نظرة الشاعرة المتحدية، ونظرة المطرب المذعورة.. يشيح المطرب بوجهه، ويبعد عنها

**

الشاعرة نادية: تقدر تقولي ليه الكوبية وقفت من ايدك لما جبتاك سيرة الملحن "عزت عبد الحميد"

* يتوقف المطرب فجأة.. ظهره ناحية الشاعرة.. يلتفت إليها، وفي عينيه نظرة هلع.. لحظة صمت *

المطرب سمير: "بحوف" التي عايزه تعرفي إيه يا "نادية"؟!

* الشاعرة تتوجه مرة أخرى إلى المطرب، وتقف في مواجهته.. تلتقى العيون **

الشاعرة نادية: "بصوت كالفحيج" أبداً.. كل اللي عايزه أعرفه إيه اللي حصل.. نعرف سر الليلة اللي خلتاك تنفصل عن "عزت"

المطرب سمير: "بصوت خائف، غاضب" أنا معنديش أسرار

** لحظة صمت.. لا تزال الشاعرة على نظرتها المتحدية تجاه المطرب الذي لا يجد شيئاً أفضل من نظرته المذعورة لي رد بها على نظرات الشاعرة.. يتقدم رفعت ببطء، ويقف بينهما، وينظر لهما **

رفعت: متهيالي في حاجة لازم توضح

المطرب سمير: "يبعد عن الشاعرة ورفعت" مفيش حاجة

الشاعرة نادية: "ياصرار" لا في

المطرب سمير: "يواجه الشاعرة.. بغضب" مش معقوله حكاية مطرب وملحن تهم حد هنا.. دي حكاية عادية جداً وتحصل مية مرة في اليوم الشاعرة نادية: "ياستهزاء" حكاية عادية جداً!! طب تقدر تقولي ليه لما سألك عليها في الحفلة الكوبائية وقعت من ايدك؟.. مع إنها زي ما انت بتقول حكاية عادية جداً

المطرب سمير: "يشيخ بوجهه عن الشاعرة.. بتوتر" الكوبائية وقعت غصبن عنى

الشاعرة نادية: "ياصرار.. استهزاء" غصبن عنك؟!! طب تقدر تقولي إيه سبب نظرة الخوف اللي كانت في عينيك لما كلمنتك في الحكاية دي ؟؟ ** لحظة صمت.. المطرب لا يزال على توتره **

الشاعرة نادية: "تكملي حديتها، وتتنظر إلى عيني المطرب" أنا أكثر واحدة أقدر أقرى العيون لأن.. لأن.. .

** تتصمت الشاعرة فجأة.. يتجمد الجميع عند آخر حركة.. عينا الشاعرة تبتعدان عن عيني المطرب.. عينا الشاعرة بهما نظرة غريبة.. نظرة خوف.. تتذكر.. تنظر الشاعرة إلى الأفق البعيد **

ص رجل، لاتك عشان بنتي فاقدر اقرى وشك كوييس.. أقدر اقرى عينيك.. أنا عارف إنك خايفه، وأنا مبلومكيش على خوفك لأن الخوف ده من حبك ومن حقوق الناس اللي في ظروفك.. أنا عارف إنك وحيدة، لكن في نفس الوقت عندي شعور إنك مش لوحده.. مش عارف أقولك إزاي حاسس بالشعور ده.. يمكن عشان أنا أبوكي فحاسس باللي انتي فيه، لكن صدقيني الإحساس ده عمرى ما ارتحله أبداً، ولا حتى ارتحت من اللي بتعملية في نفسك دلوقتي

** تعود الشخصيات مرة أخرى إلى الحياة بعد توقف الصوت **

الشاعرة نادية: "تكمel كلامها بشروط، دون أن تنظر إلى الطرب" لأن كل ده باین على وشك

الطرب سمير: "مبتعداً عن الشاعرة، وبتوتر" انتم عاليزين تعرفوا إيه؟..
دي حكاية متهمش حد منكم
ناهد: لا تهم

** يصمت الجميع فجأة.. تعود الشاعرة إلى أرض الواقع بعد جملة ناهد التي كان لها مفعول السحر.. يلتفت الجميع لينظروا إلى ناهد **

الطرب سمير: "ينظر إلى ناهد.. بخوف" قصدك إيه؟

ناهد: الحقيقة أنا فاكرة كوييس إن جابر كان بيتابع أخبارك انت و"عزت".." قصدي يعني الإشاعات اللي انتشرت عن سبب انفصالكم عن بعض.. الحقيقة كان مستغرب من كون دويتو خنائي مشهور زيك انفصلوا عن بعض.. كان دائمًا بيكلمني عن الموضوع ده.. وكان دائمًا بيحطلي ألف تصور وتصور عن سبب انفصالكم.. وكان ما بيفوتش جرناان بيتكلم عنكم إلا ويمسكه عشان يشوف المكتوب

** الكل ينظر إلى ناهد في اهتمام عدا المطرب الذي ينظر إليها في خوف**

المطرب سمير: "بخوف" انتي عايزه إيه يا "ناهد"؟
 ناهد: "بصوت خافت" أنا اللي عايزه أقوله إننا ما دمنا في لعبة
 "جابر" .. وما دام حكايتك كانت من اهتمامات "جابر" يبقى .. "صمت" ..
 يبقى لازم نتكلم عنها

** لحظة صمت .. الكل ينظر إلى المطرب **

الكاتب محمود: "ينظر إلى الجميع" مش غريبة إن واحد زي "جابر"
 بثقافته الواسعة دي يهتم بحكاية هايفة زي حكاية "سمير" مع "عزت" !!
 ناهد: "وهي تنتظر إلى الخرج" الحقيقة هي فعلاً حاجة غريبة وأنا كنت
 زيك مستغرية كده .. لكن متنساش إن أي إنسان مهما كان علمه وثقافته إلا
 وكانت ليه نقط ضعف .. ومتابعة "جابر" لحكايات هايفة زي دي من نقاط
 ضعفه .. وما دام "جابر" بيهم بأسرارنا زي ما قال "رفعت" يبقى هو
 بيهم بنقط ضعفنا لأن عمرك ما هتلaci واحد بيختبي سر إلا وبيختبي حاجة
 مش حلوة عن نفسه، وما دمنا بنتكلم عن نقاط ضعف "جابر" يبقى أكيد
 ولازم نتكلم عن نقاط ضعفنا

الشاعرة نادية: "بابتسامة بها نبرة سخرية" يظهر يا "ناهد" إنك بدأتي
 تشغلي مخك

ناهد: "وهي تنظر إلى الشاعرة" أنا فعلاً بدأت أشغل مخي يا "نادية" ..
 ومن الليلة

** تتبادل الشاعرة وناهد النظارات **

الخرج حسين: "ينظر بخوف لناهد وهي تبادله النظارات" يعني انتي يا
 "ناهد" تقصدني إن "جابر" رسلنا نلعب دور شهرزاد؟
 المطرب سمير: "في عصبية" أنا مليش دعوة بالكلام السخيف ده
 رفعت: "يمسك بالطرب من كتفيه، وينظر إلى عينيه" إحنا هنا مش

في ألف ليلة وليلة عشان نقول دور شهرزاد متابوش غير واحدة ست..
لا.. احنا هنا في لعبة "جابر"، ومتهميالي إن الدور ده بينطبق على الرجال
كمان.

** لحظة صمت.. يتبادل الكاتب والمخرج النظارات.. نظرات سريعة **
رفعت: "يُكمل كلامه" "سمير" .. إحنا هنا معاك في نفس المركب..
صدقني إحنا مش عايزين نفرض عليك حاجة، لكن المشكلة إن "جابر" هو
اللى فارض علينا الوضع ده.. مش إحنا اللي فارضينه على نفسها
المطرب سمير: "بصوت خافت، خائف" مش جايز استنتاجك غلط
رفعت: وممكن يكون صح.. يعني في احتمال
المطرب: طب ما نقدر هنا.. نقدر بدون ما نحكى خالص
** لحظة صمت.. رفعت ينظر إلى المطرب **

رفعت: صدقني يا "سمير" .. أنا مش عارف إزاى الاستنتاج ده وصلى..
لكن كل اللي أعرفه إننا لازم نخرج من هنا بأي طريقة وإلا هيحصلنا حاجة..
أنا.. أنا مش عارف إذا كان اللي برة أحسن من اللي جوة.. أكيد الدنيا برة
وحشة.. لكن.."ينظر إلى الممثلة" .. لكن هنا أوحش كتير

** يظلم المسرح فجأة.. الإضاعة تتركز على الممثلة.. الممثلة لا تزال
على حالة غريبة من الخوف والشروع.. تنظر إلى الأفق البعيد.. تتذكر شيئاً
ما.. صوت يتربّد في جنبات المسرح **

ص رجل: انتي النهاردة أحسن كتير
ص فتاة: تفتكرا يا دكتور؟!

ص رجل: أنا مش هقول إنه مستحيل.. لكن أقدر أقول إنه صعب.. لكن أكيد بمرور الأيام حالتك هتحسن.. الزمن أكتر واحد يقدر يشفى أي جرح

ص فتاة، قصدك يقدر ينسى

** لحظة صمت **

ص رجل، ها مقولتش فكري تشتفلي إيه لما تكبري؟

ص فتاة، ممثلة

ص رجل، هايل.. ويا ترى إيه الدور اللي بتحلمني تمثلية؟

** لحظة صمت **

ص فتاة، دور واحدة متقداش عليها باب

** لحظة صمت **

ص فتاة، واحدة متحطتش ورا باب مفتوح

** يسطع ضوء المسرح مرة أخرى **

رفعت: "يُكمل كلامه في مواجهة المطرب" يمكن غيابنا يثير الناس وأجهزة الأمن.. لكن لحد إمتي هنفضل هنا لغاية لما أجهزة الأمن تلاقينا؟.. شكلك بتقول أي عابر سبيل ممكن بييجي هنا.. أنا زيك يقول كده.. لكن عابر السبيل ده هييجي هنا فين؟.. بييجي في حنة مقطوعة زي دي؟ وإمتي؟.. انت قولتها.. قلت ممكن محدث بييجي خالص.. المشكلة يا "سمير" مش مين اللي بييجي؟ ومين اللي هيحكى؟.. المشكلة إمتي هنخرج من هنا؟.. إمتي؟.. إمتي؟

** لحظة صمت.. الكل يتبادل النظارات.. رفعت ينظر إلى المطرب.. المطرب يتبادل نظارات مذعورة.. يبتعد المطرب عن رفعت، ويتجه ببطء إلى ركن المسرح.. يقف.. ينظر إلى الأفق.. يتذكر الماضي البعيد **

المطرب سمير: منكرش إني مكتنش معجب بالأستاذ "عزت عبد الحميد" .. ومُعجبش بييه ليه؟.. كانت عنده كل المؤهلات اللي تخلي أي حد يُعجب بييه ..

فيالله الفخمة اللي في هي الزمالك.. الوسامه اللي تخلي كل الستات توصله..
 الشعير الأبيض الناعم زي خيوط الفضة.. النظرة الأستقراطية اللي مقدرش
 يخبيها ورا النظارة.. الشامة الزرقة الغريبة فوق حاجبه اليمين.. باختصار
 كان الأستاذ في نظري عبقرى.. كان عامل زي نجمة في السماء.. نجمة تخلي
 كل الناس رافعة راسها عشان توصلها فوق.. فوق كل الناس.. فوق كل
 الدنيا.. مكنتش عايز أكون زي الناس اللي بتبعن على النجمة من تحت..
 كنت دائمًا بفك أطلع فوق عنهم.. أبقى نجمة برضه.. نجمة متقدرش الناس
 توصلها حتى لو رفعت رقبتها لفوق.. فوق

** يظلم المسرح بهدوء.. تتركز الإضاءة على الممثلة.. عينا الممثلة
 مليئة بالدموع.. ابتسامة حزينة.. موسيقى ناعمة تتبع من لا مكان.. تنظر
 إلى الأفق، وتتذكر صوًتاً قادماً من الماضي البعيد **

ص رجل: "حالم" أنا بحبك.. بحبك أوي يا "هيام".." بأغير عليكي من كل
 حاجة.. من الهوا الطاير.. من القمر.. مع اني ميشوفكش قمر..
 مستغريبيش أوي كده.. أيوة مبقوش عليكي قمر.. بقول عليكي نجمة..
 القمر ممكن نوصله من بعيد نلاقيه عامل زي طفل نايم.. هنلاقيه ملاك صغير
 بلونه الأبيض وشكله الجميل.. لكن لو قربنا للملائكة هنلاقيه قلب شيطان..
 القمر عامل زي البنى آدميين.. أشكالهم بتكون حلوة وبمهرجة.. لكن لو
 عشنناهم هنلاقى كل ده راح، ومبقاش غير فجوات وصخور باردة مش
 موجودة غير على سطح القمر

** يسطع ضوء المسرح تدريجياً.. تخفت الموسيقى القادمة من لا مكان..
 يتحرك رفعت ناحية المطراب **

رفعت: "يستحث المطراب" كمل يا "سمير".." كمل
 ** المطراب ينظر إلى رفعت وكأنه في دنيا غير الدنيا.. يعود إلى أرض

الواقع.. يبتعد عن رفعت.. يتحرك ببطء أثناء سرد حكايته، ليتجه إلى الركن الآخر من المسرح **

المطرب سمير: كان اسمى من أول يوم قابلته فيه هو "سمير الصياد" .. هو اللي اختارلي الاسم الفنى ده.. وفى يوم دعاني لدخول فيلاته، وبالاخص صومعته اللي بينتاج فيها الألحان.. كانت صومعته زي ما تخيلتها بالضبط.. أكثر من عود متعلق على الحيطان.. صورة كبيرة ليه وهو بيضحك.. خمس أجهزة تسجيل من ماركات مختلفة.. وبعض قصارى الزرع موجودين هنا وهناك.. في البداية قعدنا نتكلم عن أحوال الفن والفنانين، وفجأة قطع كلامنا جرس التليفون.. لاحظت إن الأستاذ مهمتهم أوyi باللي بيكلمه لدرجة إنه محسش بوجودي أصلًا.. وفي الوقت ده قعدت أبص للأوضة اللي أنا قاعد فيها.. كانت أوضة كبيرة جداً.. تقدر تقول إنها بحجم دور العدة.. لكن كان في باب فى الركن.. مش عارف السبب اللي خلاي بعدهش عينيا من عليه.. فجأة قطع تفكيرى انتهاء مكالمة الأستاذ واستاذنى إنه يقوم

الخرج حسين: "مقاطعاً" طبعاً فتح الباب.. دخل الأوضة وقف الباب على نفسه

المطرب سمير: "في شرود" فعلًا

** يظلم المسرح فجأة.. تتركز الإضاءة على المطرب.. يفتح أحد الأبواب الثلاثة الموجودة في العمق لنجد شخصاً محاطاً بضوء أحمر.. هالة حمراء..
الهالة الحمراء لا ثمين ملامحه **

المطرب سمير: "يكمـل" للحظة شوفت ضوء أحمر غريب بيخرج من الأوضة.. في الوقت ده كنت بتمنى أشوف عملية خلق الألحان عند الأستاذ.. طبعاً ده كان مشهد الواحد يستحق يشوفه.. عشان كده قعدت أستنى الأستاذ، وأحاول أسمع أي حاجة بتحصل ورا الباب المفتوح.. سمعت صوت

غريب.. صوت حد بيغرق.. حد بيحاول يطلع لسطح المية من تاني.. الصوت ده اتكرر حوالي عشر مرات، وفجأة سمعت صوت حاجة كبيرة أوي بتنقع على الأرض.

** يُغلق من هو مُحاط بالضوء الأحمر الباب بعنف.. ينفض الجميع.. لا تزال الإضاءة مركزة على المطرب.. وتتركز الإضاءة على ناھد في جملتها

**

ناھد، دي حاجة غريبة فعلاً

** تتركز الإضاءة على رفعت أيضاً **

رفعت، الظاهر القصة دي مش هتخرج عن ناهيتنين ياما

** يسطع ضوء المسرح فجأة مع جملة الشاعرة، وهي تتوجه ناحية رفعت **

الشاعرة نادية، "مقاطعة" أرجوك يا "رفعت".." إحنا هنا مش في ندوة ثقافية بنتبادل فيها الآراء.." إحنا هنا في أزمة

رفعت، عندك حق

الكاتب محمود، "بنفاذ صبر" أرجوكم يا جماعة.." كفاية كلام وخلونا نسمع حكاية "سمير".." متوجهها ناحية المطرب" كمل يا "سمير".." إيه اللي حصل بعد كده؟"

** المطرب يطلق زفة حارة.." يبتعد عن الكاتب، ويتجه ناحية الممثلة، ويقف ورائها **

المطرب سمير، "وهو يتحرك" طبعاً بعد الصوت اللي سمعته قلت على الأستاذ، وخطبت عليه أكثر من مرة.." لكن مكنش فيه أي رد.." وبعد فترة لقيت الأستاذ بيخرج من الأوضة.." كان شكله طبيعي جداً.." كان عادي جداً.." لكن.. لكن كان في شئ غير عادي.." يمكن يكون كان في حاجة في وشه

وراحت.. أو شئ جديد على وشه ومظهره.. لكن.. لكن كان كل ده مجرد احساس.. شعور مقدرش أفسره يومها
 ** لحظة صمت.. الكل يتبدل النظارات **

ناهد: "نقطاخ لحظة الصمت" طب ايه اللي حصل بعد كده؟
 المطرب سمير: "يتوجه لناهد، وما طلبا شفتيه" مفيش.. قعدنا نكمي كلامنا عن الفن.. والظاهر إن كلامنا مخلصش ومتش هيخلاص.. ومن يومها عرفت إني والأستاذ هنبقى أصحاب بالرغم من كوني مبتدئ في المجال بعكسه هو المحترف.. لكن ده ممنعش أروح بيت الأستاذ أكثر من مرة.. وكنا نقدر نتناقش ونتكلم عن كل شئ وأي شئ.. والظاهر إني عجبته فلحنلي أغانيتين علمه مع الناس.. وبعدها بدأت شهرتي تزيد.. كانت الناس مبهورة بيها.. وكنت حاسس إني بدأت أحقق جزء من أحلامي وهنبقى نجم كبير.. وفعلاً صدق اللي قال إن الأستاذ هو الحل السحري للمبتدئين بشرط إنك تعجبه في الأول.. وحط مليون خط تحت كلمة "تعجبه" دي رفعت: قصدك إيه؟

** لحظة صمت.. المطرب ينظر إلى رفعت **

المطرب سمير: "يطلق تنهيدة حارة" مش عارف يا "رفعت".." مش عارف

** يبتعد المطرب عن ناهد.. يتحرك حتى يصل إلى منتصف المسرح **
 المطرب سمير: "أثناء تحركه" لكن مش شايف إن كل حاجة بتمشي في مصلحتي.. فجأة اختارني الحظ عشان يقدملي كل شئ في الدنيا.. كل شئ بدون أي تفسير.. قعدت أسأل نفسي ليه الأستاذ اختارني أنا بالذات؟!.. ليه الود ده كلله؟!.. طب نفترض إن صوتي عجبه طب إمتي بس سمعه عشان يعجبه؟.. ده مطلبش مني يسمع كوبليه واحد حتى.. أسللة كثيرة أوي قعدت

أسألها لنفسي.. لكن للأسف كانت الأسئلة بدون اجابات
 ** لحظة صمت.. الكل يتبادل النظرات **

الطربر سمير: "يكمـل كلامـه" لاحظت حاجة تانية غريبة على الأستاذ..
 ليه في كل مرة لما يحتاج يألف لحن جديد كان يدخل الأوضة إيهـا؟..
 وبعدـها يمرـ الوقت، وألاقيـ الأستاذ راجـعـي بالإـجـابةـ، والإـجـابةـ دانـماـ جميلـةـ
 ومبـتكـرةـ.. "مـاـذاـ يـدـهـ، كـأنـهـ يـتخـيلـ أـنهـ يـلـمـسـ شـيـئـاـ ماـ.. يـلـمـسـ بـابـاـ" إـيهـ
 الليـ بـيـعـملـهـ الأـسـتـاذـ بالـضـبـطـ وـرـاـ الـبـابـ المـقـفـولـ عـشـانـ يـوـصـلـ لـلـحنـ جـديـدـ؟ـ؟ـ؟ـ!
 ** تـجمـدـ الشـخـصـيـاتـ فـجـأـةـ عـدـاـ نـاهـدـ.. نـاهـدـ تـنـظـرـ إـلـىـ الجـمـهـورـ.. بـالـأـصـحـ
 إـلـىـ الأـفـقـ.. تـتـذـكـرـ شـيـئـاـ ماـ **

صـانـثـىـ: أـنـتـيـ مـبـتـسـمـعـيشـ الإـشـاعـاتـ الليـ بـتـتـقـالـ منـ وـرـاكـيـ.. "تنـظـرـ إـلـىـ
 الشـاعـرـةـ" لـكـنـ صـدـقـيـ فـيـ نـاسـ كـتـيرـ شـافـوـهـ.." تـعـودـ بـنـظـرـاتـهاـ إـلـىـ الأـفـقـ"
 أناـ عـارـفـةـ إـنـكـ مـمـكـنـ مـتـصـدـقـيـشـ وـهـتـحاـولـيـ تـقـلـىـ عـلـيـكـيـ الـبـابـ وـتـقـولـيـ دـيـ
 مجـرـدـ إـشـاعـاتـ.. لـكـنـ صـدـقـيـنـيـ الإـشـاعـاتـ دـيـ حـتـىـ لـوـ لـفـيـتـ بـاـكـ مـقـفـولـ
 هـتـعـدـيـ بـرـضـهـ.. هـتـعـدـيـ حدـودـ بـيـتـكـ عـشـانـ تـحـاـصـرـكـ مـنـ جـوـهـ.. هـتـعـدـيـ مـنـ
 تـحـتـ عـقـبـ الـبـابـ

** تـعـودـ الشـخـصـيـاتـ مـرـةـ أـخـرىـ لـلـحـيـاـ.. نـاهـدـ لـاـ تـزالـ عـلـىـ شـرـودـهـاـ **
 نـاهـدـ: "فـىـ شـرـودـ" دـيـ حـاجـةـ غـرـيبـةـ فـعـلـاـ

الـشـاعـرـةـ نـادـيـةـ: بـسـ اـنتـ وـاثـقـ إـنـ الليـ وـرـاـ الـبـابـ دـهـ مشـ Toiletـ؟ـ.. فـيـ
 كـتـيرـ مـنـ النـاسـ بـيـقـولـواـ إـنـ إـلـهـامـ بـيـجـيـ لـلـعـظـمـاءـ فـيـ الحـمـامـ
 ** نـاهـدـ تـخـرـجـ مـنـ شـرـودـهـاـ، وـتـعـودـ إـلـىـ أـرـضـ الـوـاقـعـ **

الـطـرـبـ سـمـيرـ: طـبـاـ وـاثـقـ.. النـاسـ عمرـهـاـ مـاـ تـشـرـأـ فـيـ الحـمـامـ.. طـبـ لوـ
 اـفـتـرـضـنـاـ إـنـ دـهـ حـمـامـ.. طـبـ قـولـيـلـيـ فـيـ حـدـ عـاـقـلـ يـخـلـيـ نـورـ الحـمـامـ أحـمـرـ؟ـ
 ؟ـ!!ـ.. طـبـ لوـ فـرـضـنـاـ إـنـ دـهـ كـلـهـ مـمـكـنـ يـحـصـلـ فـيـ حـمـامـ.. طـبـ تـقـدـريـ

تفسيريلي إيه الصوت اللي أنا بسمعه كأن في حاجة بتقع؟.. معقوله في
انسان بيلعب ويختبط في حيطان الحمام؟!!

الخرج حسين: "مغفهه" ده شئ غريب

الكاتب محمود: يبقى انت أكيد فتحت الباب

المطرب سمير: "مندهشاً" وعرفت إزاي؟!

رفعت: الفضول قتل القطب.. ده اللي قاله الإنجليز من زمان

المطرب: "في شرور" فعلاً فتحت الباب

لحظة صمت.. الكل يتداول النظرات.. المطرب يعود بذاكرته إلى الوراء

**

المطرب سمير: اليوم ده عمرى ما هنساهم أبداً.. الأستاذ كالعادة سبني
لوحدى عشان يدخل الأوضة إياها ويفكر فى لحن جديد.. قعدت فترة مستني
أسمع أي حاجة.. ولما ما سمعتش صوت حد في الأوضة.. قلت دي فرصتي
عشان أدخل وأعرف إيه اللي ورا الباب المفتوح.. فتحت الباب.. كانت
الأوضة ضيقه جداً.. باردة جداً زي القبر.. الحيطان كلها مطلية باللون
الأحمر، وعليها زخارف غريبة.. لكن أغرب شئ في الموضوع هو إن
الأوضة كانت فاضية.. مكنش فيها أي حد خالص.. وفجأة شوفت اللي خلى
شعر راسي شاب.. شوفت حاجة في مركز الأوضة.. حاجة بتتجسد.. راح
واخد شكل انسان.. انسان شعره فضي.. انسان ملوش غير اسم واحد..

الأستاذ "عزت عبد الحميد"

** يشهق الجميع **

الشاعرة نادية، معقوله؟!

المطرب سمير: "يكملا، وكأنه لم يسمعها" قفلت الباب ورجعت لمكاني
وأنا برتعش، ومش عارف أكلم حد.. وفجأة اتكلكتني فكرة واحدة.. الأستاذ

مش انسان.. الأستاذ "عزت عبد الحميد" مشبني آدم.. طب لو مشبني آدم هيكون إيه؟.. مقدرتش أفرمل أفكارى.. ولو كنت فعلاً ذكي كان أول تصرف أعمله إني أمشي من هنا.. لقيت الأستاذ طلع فجأة من الأوضة.. وراح قعد جنبي.. طبعاً كنت خايف زي ما انت بتخاف من أي ثعبان.. ده حتى الثعبان كان، لكن يا ترى الأستاذ يبقى إيه؟.. وبدون مقدمات راح سأله سؤال غريب.. انت بتؤمن بالجن؟

** يشهق الجميع **

الطرب سمير: "يُكمل" سؤال غريب جداً في لحظة حاولت أتمالك أعصابي، وقلتله إن الجن مذكور في القرآن.. لكنه كان مصدر على السؤال وحطهولي في شكل تاني.. انت بتؤمن بقدرة البشر على تسخير الجن؟.. بصحته ومكتنث عارف أقول إيه؟!! لكنه سبقني في الكلام ومدنيش فرصة للرد

رفعت: "ينظر إلى الطرب" أنا عارف هو قالك إيه

** ينظر الجميع إلى رفعت باندهاش.. المطرب ينظر إلى رفعت في خوف

**

رفعت، زمان كان العرب بيفكرروا إن الشعراء بيجلهم الإلهام من جن "وادي عقر"، وبعدها الكلام كتر عن جنية الموسيقى وشيطان الشعر.. لكن السؤال هل كل الكلام ده مش حقيقي؟

** صمت.. المطرب لا يزال ينظر إلى رفعت، وفي عينيه رعب بلا حدود

**

الشاعرة نادية، أرجوك يا "رفعت"...

الطرب سمير: "يقطّعها" عندك حق يا "رفعت"

** لحظة صمت.. الكل ينظر إلى المطرب.. ترقب **

الطرب سمير: "يكملاً" وبالطريقة دي يقدر أي ملحن نص لبة يتحوال لعقبري..
لو عرف إزاي يتصل بيهم.. هو ده بالضبط اللي قاله.. قالى إن العملية دي
عاملة زي نوبة صرع.. زي الموت تقريباً.. أو زي خروج الروح من جسمك
ورجوعها مرة تانية

ناهد: "في خوف" ويا ترى الموقف انتهى على كده؟.. مجرد شرح؟

** المطرب ينظر إلى ناهد لفترة طويلة.. بالأصح ينظر إلى الجميع..
تنجه نظراته إلى الأفق البعيد **

الطرب سمير: "مُعْمِمًا، وفي عينيه نظرة خوف" يا ريت.. يا ريت

** لحظة صمت.. المطرب يتذكر صوٹاً تذكره من قبل أثناء الأحداث **
ص امرأة.. تعرف يا "سمير" أكثر حاجة بتعجبني في شكلك إيه.. الشامة
الزرقة

الخرج حسين: "مُقاطعاً لأفكار المطرب" طب ليه اختارك يا "سمير"؟

** الكل ينظر إلى المخرج.. المطرب ينظر إلى المخرج.. توتر.. خوف
**

الخرج حسين: "مُكملًا" ليه لمعك وخلاك مطرب مشهور؟

** لحظة صمت.. المطرب ينظر إلى المخرج.. يتجه إليه.. يقف أماماه..
العيون تتلاقي.. يزيح المطرب خصلات من شعره فوق حاجبه الأيمن **

الطرب سمير: لإلهي زيه

** يتجمد المخرج من هول الموقف.. يبتعد لا ارادياً عن المطرب **

الطرب سمير: ليَا نفس العالمة

** ينظر الجميع إلى بعضهم البعض.. قلق.. توتر **

الطرب سمير: الشامة الزرقة فوق حاجبي اليمين

** لحظة صمت.. المطرب ينظر إلى الجميع **

الطرب سمير.. قالى إن العلامة دي هي اللي بترشح المختارين للإتصال..
ومفيش حاجة بتتميز المختارين غير العلامة دي

** لحظة صمت **

الكاتب محمود: "يُقاطع لحظة الصمت.. بقلق" وعملت إيه لما عرفت؟
الطرب سمير: "شارد" مفيش.. هربت من هناك.. بالضبط زي ما هربت من
بلدنا زمان وجيit على هنا.. أهو كله هروب.. مرة هروب من أرضي
وناسي.. ومرة هروب من نفسي ومن حقيقتي.. "شارد" كله هروب
* المطرب ينظر إلى الأفق البعيد *

الشاعرة نادية: "تفكر" لكن مش جايز كل اللي حصل مجرد هزار.. لعبة حب
الأستاذ "عزت" يلعبها عليك.. مش جايز بنى سرداد في الأوضة.. يعني
هو راجل غني ويقدر يعمل كده.. ولا انت إيه رأيك يا "سمير"؟..
"سمير"؟!.. "سمير"؟!

* المطرب في واد آخر.. الشاعرة تتحدث إليه، وهو لا يسمعها..
بالأصل يذكر صوًّا من الماضي البعيد *

ص فلاحه.. انت ليه يا ولدي دانماً مستعجل؟!.. انت ليه متديش لنفسك
فرصة؟!.. انت لسه أرض بكر.. والأرض البكر محتاجة دانماً وقت وجهد
عشان تطرح زرعها.. انت ليه يا ولدي قلبك قاسي على أمك؟!.. ليه دانماً
بتفكر تهملنا وتسيب أرضك وزرعك وممالك.. انت ليه يا ولدي
بتفكر تهرب؟!.. ليه يا ولدي؟!.. ليه؟!.. ليه؟!

الشاعرة نادية: "تحاول إفادة الطرب" "سمير".."سمير".." رد عليا..
"سمير".."انت رحت فين؟!"

* يلقي المطرب بوجهه ناحية الشاعرة ببطء شديد.. ينظر لعينيها..

نظراته خاوية.. تنظر الشاعرة إليه.. فلق.. الكل يتداول النظرات.. توتر **
 الشاعرة نادية: "يقلق" كنت بقولك مش جايز الأستاذ "عزت" يكون بنى
 سرداد في الأوضة؟!

** ينظر المطرب في عيني الشاعرة للحظة بدت كأنها دهر.. يعود
 بذاكرته إلى أرض الواقع.. يبتعد عنها بخطوات قليلة **

الطرب سمير: في الأول قلت كده.. لكن في خاطر غريب مر عليا وخلاتي
 أكذب اللي قلته.. لو صدقنا إن الأستاذ "عزت" ممكن يبني سرداد في
 الأوضة.. طب والتجسد اللي شفته؟.. إزاي اتغيرت ملامحه وهو بيطلب
 مني إني أبقى معاهم بالسرعة دي وكأني قدام أعظم ممثل في الكون؟..
 مش عارف ليه في حاجة جوايا مخليني مصدقه، وإن اللي قاله فعلًا
 الحقيقة.. عمومًا القصة لو صحيحة أو مجرد كذبة.. ده مش هيمعن الخوف
 اللي حسيته قبل كده، واللي نسه بحسه لغاية دلوقتني "ينظر إلى الأبواب الثلاثة"
 كل ما أشوف أي باب مفتوح

** لحظة صمت.. الكل يتخيّل القصة في ذهنه **

ناهد: "وكانها تخاف ان تسأل" هو فعلًا "عزت" ليه شامة زرقة فوق حاجبه
 اليمين؟

الطرب سمير: "منتنه" أيوة.. بس عشان تلاحظيها لازم تكوني المعجبة بيده
 رقم واحد زيبي.. أو زي ما كنت

رفعت: "في شرود" الباب ده وصلنا لممررين.. ياما ممر يوصلنا "لوادي
 عبقر" ..

الشاعرة نادية: "وكانها تكمل جملة رفعت" أو هزار تقيل حبتين
 ** لحظة صمت.. رفعت يُفكِّر.. يتوجه رفعت بحديثه لناهد **
 رفعت: إيه رأيك في القصة دي؟

ناهد: "بترر" الحقيقة مش عارفة.. لكن كل اللي أعرفه عن "جابر" إنه عمره ما كان خيالي.. كان راجل واقعي جداً.. وكان بيرفض الأحلام البساذجة.. ومتهمي إن مش هو ده السر اللي ممكن يفهمه.. والدليل على كلامي إنه كان دائمًا بيترأ على قصص الخيال والخرافات والأساطير.. كان معتر جداً برأيه في النقطة دي

رفعت: يعني عمره ما كان حالم أو رومانسي ويفكر بطريقة خيالية؟
 ناهد: عمره ما فكر بالأسلوب ده.. أما بالنسبة لموضوع الجن المذكور في القرآن.. يعني على أساس تدين "جابر".."جابر" كان متدين جداً.. ده حتى ناقشني في موضوع الحجاب، وكان رأيه إني لازم اتحجب.. يعني مكنش عنده نقص في الدين.. بيقى أكيد النقص أو السر ده مش هيهمه في حاجة

المثلة هياام: "تضيع يدها على أذنها.. بخوف" أرجوكم كفاية
 كلام بقى.. أرجوكم خرجوني من هنا.. أنا خايفه.. أنا خايفه

الشاعرة نادية: "تحتضن الممثلة" أرجوكي متخفيش.. كلنا هنا جنبك
 وهنخرجك من هنا صدقيني

* * ترتجف الممثلة، ومن ثم تحضنها الشاعرة بقوة *

رفعت: "بطريقة فجائية" "الدكتور جابر" كان سعيد معاكي يا "ناهد"؟

* * تنظر ناهد لرفعت.. ذهول.. تصمت ولا ترد *

رفعت: "ياصرار" خلينا نقول السؤال بطريقة ثانية.. يا ترى انتي كنتي سعيدة مع "الدكتور جابر"؟

* * ناهد لا ترد *

رفعت: من فضلك يا "ناهد" اتكلمي.. أرجوكي اتكلمي.. ممكن دي نقطة
 نقص في حياة "الدكتور جابر"

الكاتب محمود.. فعلاً.. "ناهد" انتي لازم تجاوبي حالاً.. لانه ممكن يكون
ده الحل ونخرج من الأزمة

** ينظر الجميع لناهد في اهتمام.. المخرج هو الإنسان الوحيد الذي
يبعد بنظراته عن ناهد.. ناهد تتذكر صوتاً من عليها أثناء الأحداث **
ص انتى: انتي مبتسمعيش الإشاعات اللي بتنتقل من وراكي.. لكن
صديقيني في ناس كتير شافوهم

ناهد: "في شرور" أنا مش ساكتة يا "محمود" .. الحقيقة أنا بفكري في اجابة
السؤال.. صعب أوي واحد يسألوك ويقولك انت بتحبني وتجاوبيه.. في حاجات
صعبه ان أي واحد يجاوب عليها.. لكن أقدر أقول إني كنت في مرات كثيرة
بتمنى إن "الدكتور جابر" ميرجعش البيت.. ده أنا حتى كنت بتمنى إنه
يفضل في شغله على طول، وإنه بيعتلي فلوس شغله بحواله بريدية

** الجميع ينظرون إليها.. الذهول هي أدق كلمة للتعبير عما شعر به
الضيوف من صراحة ناهد **

ناهد: لكن أقدر أقولكم إن عمر ما "الدكتور جابر" حس بنقص في
حياته الاجتماعية لانه قدر يكملها قبل ما يجيئه السرطان

الكاتب محمود: قصدك إيه؟

ناهد: "وكانها لم تسمعه" في الحقيقة نسيت إني أقدملكم ضيفة فوق
العادة.. طبعاً هي صاحبتي.. صديقة عمري

** يمتنع وجه الشاعرة، وتنتظر لناهد بخوف **

ناهد: هي فعلاً صديقة عمري.. لكن زي ما بيقول المثل: المصائب
مبتجيش غير من القراب.. أو من الحباب.. متفرقش.. أحب أقدملكم
"الشاعرة الأستاذة نادية فهيم" صديقة العمر، والزوجة الثانية "الدكتور
جابر"

** يفاجئ الجميع بالخبر.. تقف الشاعرة لنترك الممثلة **

نادية فهيم: "بخوف" انتي بتقولي ايه يا "ناهد"؟؟

ناهد: "توجه حديثها إلى الشاعرة" زمان.. زمان وأنا عندي شك، و كنت دائمًا بقول إنه متجوزك بس محدث عارف.. لكن للأسف يا مدام سركم انكشف بدليل الإشاعات اللي كترت من حواليكم.. مش عجبك الدليل ده؟.. طب تقدري تقوليلي ليه هو دائمًا بيغزوك في حفلاتي؟.. مرواحك ليه كل شوية العيادة.. معرفتك بكل شئ عنه..

الشاعرة نادية: "مقاطعة" "ناهد" .. أرجوكي.. اديني بس فرصه اشرح لك ناهد: الوقت فات من زمان على الشرح يا "نادية" هاتم.. صدقيني أنا مش زعلانة منك، بالعكس أنا زعلانة عليكي.. زعلانة عليكي لانه قدر يخدعك.. قدر يخليكي تتجوزيه، وهو أصلًا بيكرهك.. عارفة ليه هو اتجوزك؟.. عشان يكمل بس النقص اللي عنده.. هو حسبها صح.. قال أنا عندي الهانم المهتمة بشياكتها وأناقتها.. والثانية المهتمة "برانبو" و "سارتر" و "لوركا" .. يبقى كده كمل النقص.. وكل ما يزهق من الحفلات يروح للمجمع اللغوي.. وكل ما يزهق من المجمع اللغوي يرجع تاني للحفلات

الشاعرة نادية: "بكاء" بس يا "ناهد" .. أرجوكي كفاية

ناهد: صدقيني دور "فاتن حمامه" اللي انتي بتعمليه دلوقتي ميخاش عليا.. بالعكس اللي يليق عليك أكثر دور "هند رستم" ولا أقولك..

المطرب سمير: "يُقاطعها.. بصرخة" بس كفاية.. "نادية" هتروح مننا..

أرجوكي كفاية

** ناهد تنظر للمطرب، والدموع تغمر وجهها.. الشاعرة تبكي، وهي منهارة على الأريكة.. الكل في حالة ذهول مما حدث **

المثلة هيا م: "لا تزال على شرودها" يا ترى باب مين اللي هيتفتح المرة دي؟

الشاعرة نادية: "بكاء" حد فيكم جرب مشاعر ست متطلقة.. حد فيكم عاش وحدتها.. حس بالملها.. حس بالمل المكتوب في بطاقتها كلمة مطلقة.. كانها شتيمة أو وصمة عار بيحاول المجتمع إنه يداريها في أوراقه.. طبعاً أي واحدة متطلقة هتحاول تقاوم في الأول.. هتروح مليون جمعية.. وهتسمع مليون شكوى عن أحوال الستات.. شكاوي.. اقتراحات.. وفي الآخر طزززززز في كل ده.. أيوة طز.. عارفين ليه؟.. لأن الجمعية مش هتقدر تحميكي وانتي راجعة بالليل، والناس كلها بتتص عليكي وعايزه تنهش في لحمك.. لأن الناس لسه منهوش في لحمك لما بيجببوا سيرتك كل شوية.. الجمعية مش هتحميكي من محاولة أي راجل يدخل عليك بالحنجل والمنجل عشان يقضى معاكى وقت لطيف زي ما بيقول.. المتطلقة مش هتقدر توقف في وش أي راجل وتقول زي ما قال "رانبو" أنا انسانة ثانية.. مش هتقدر تقوله روح شوف واحدة من الشارع تقضى معاك وقت لطيف بدلالي.. صدقوني مش هتقدر تقولها إلا لما تكون في عصمة راجل.. وحيث إننا في مجتمع مبيعرفش فيه غير بدور الرجال وعمل الرجال وشخصية الرجال وارادة الرجال.. فكان لازم الأقى أي فرصة وأتشعبط في أي راجل.. وتبقى الشاعرة المتطلقة زي أي بنتاعة فعل لما تقول: ظل راجل ولا ظل حيطة.. أنا عمري ما جريت ورا أي راجل.. القدر بس هو اللي خط "جابر" في طريقي.. أنا كنت عارفة إنه كان بيسغلني عشان يكمل النقص اللي عنده.. لكن جحيم "جابر" ولا جحيم مجتمع مبيبصش غير على جسمى.. "موجهة حد فيها إلى ناهد" أنا مخدتش منك جوزك.. أنا مخدتش منك أي حاجة.. بالعكس انتي اللي خدتني كل حاجة.. فيلا.. عربية.. برسنج.. باعتبارك حرم الدكتور المشهور "جابر إبراهيم".." وأننا.. أنا اللي

تركت على الرف زي زى البطاقي اللي بتتركن وبتستنى صاحبها لما
يلجي

رفعت: كفاية يا "نادية" .. أرجوكى "كفاية"

الشاعرة نادية: "تكمـل، وكأنـها لا تسمـعه" كنت فعلاً أغبـى من الحمار
الحصـاوي زـى ما قال "جاـبر" لإـي مـحاولـتـش أـضـغـط عـلـيـه عـشـان أـخـد حـقـيـة
فيـه زـى ما خـدـتـي يا "ناـهـد" .. أنا اللي اـتـرـكـتـ على الرـف .. أنا الشـرـيفـة
الـطـاهـرـة اللي عمرـها ما غـلـطـتـ معـهـ .. عمرـها ما غـلـطـتـ معـهـ يا
"ناـهـد" .. مشـزـى نـاسـ كانواـ بـيرـوـقـواـ معـ رـجـالـةـ وـشـابـ فيـ النـوـادـيـ .. مشـ
زيـكـ يا "ناـهـد"

ناـهـد: "بغـضـبـ، وبـكـاءـ حـارـ" آخرـسيـ

** تـصـفـ نـاهـدـ الشـاعـرـةـ لـدـرـجـةـ ثـوـقـعـهاـ عـلـىـ الـأـرـضـ .. يـهـرعـ المـطـربـ
لـرـؤـيـةـ مـاـذـاـ حدـثـ لـلـشـاعـرـةـ .. يـقـومـ المـطـربـ بـإـيقـافـ وـاحـضـانـ الشـاعـرـةـ التيـ
انـخـرـطـتـ فـيـ بـكـاءـ حـارـ .. نـاهـدـ جـامـدـةـ كـالـتـمـثـالـ لـاـتـدـريـ مـاـذـاـ فعلـتـ .. الكـاتـبـ
ورـفـعـتـ يـتـبـالـانـ النـظـرـاتـ .. المـخـرـجـ يـبـتـعدـ بـنـظـرـاتـهـ عـنـ الـآـخـرـين~**

الـكـاتـبـ مـحـمـودـ: "يـقـاطـعـ حـالـةـ الصـمـتـ، وـالـنـهـوـلـ .. بـنـظـرـةـ طـوـلـيـةـ لـنـاهـدـ"
"نـادـيـةـ" كـانـتـ تـقـصـدـ إـيـهـ بـالـكـلامـ دـهـ يا "ناـهـدـ"؟

ناـهـدـ: "بكـاءـ، وـتـوـجـهـ حـدـيـثـهـ لـلـشـاعـرـةـ" اـنـتـيـ مشـ زـىـ يا "نـادـيـةـ" ..
وـعـمـرـكـ ماـ هـتـكـونـيـ زـىـ .. اـنـتـيـ مـمـكـنـ حـسـيـتـيـ بـالـحرـمـانـ وـالـأـلـمـ .. بـسـ مشـ
قـدـيـ .. اـنـاـ أـكـثـرـ سـتـ فـيـ الدـنـيـاـ حـسـتـ بـالـحرـمـانـ وـالـأـلـمـ .. كـفـاـيـةـ إـنـيـ اـتـحـرـمـتـ مـنـ
أـغـلـىـ كـلـمـةـ .. كـلـمـةـ "مامـاـ" .. اـنـتـيـ مـتـطلـقـةـ يا "نـادـيـةـ" .. لـكـنـ اـنـاـ أـرـمـلـةـ .. أـيـوـةـ
أـرـمـلـةـ .. مـتـسـتـغـرـبـوـشـ أـوـيـ كـدـهـ .. اـنـاـ طـوـلـ حـيـاتـيـ بـتـصـرـفـ وـكـانـيـ أـرـمـلـةـ ..
أـعـمـلـ كـلـ حـاجـةـ لـوـحـدـيـ .. أـرـوـحـ الـحـفـلـاتـ لـوـحـدـيـ .. أـدـفـعـ الـعـوـاـيدـ لـوـحـدـيـ ..
أـشـتـرـيـ هـدـوـمـيـ لـوـحـدـيـ .. وـلـمـاـ يـرـجـعـ "جاـبرـ" السـاعـةـ 3ـ بـعـدـ نـصـ اللـيلـ ..
أـفـتـكـرـ إـنـيـ سـتـ مـتـجـوزـةـ وـجـوزـيـ عـاـيـشـ عـلـىـ وـشـ الدـنـيـاـ .. لـكـنـ دـهـ مـيـدوـمـشـ

ل ساعات كتير.. لاته ثاني يوم بيسبب البيت على الساعة 7 الصبح وأنا نايمة عشان يروح شغله.. كنت فعلاً بتععد إني مشفوش عشان مش عايزة أفتكر إني حرمته من كلمة "بابا" زي ما حرمت نفسي.. كنت بعمل أي حاجة عشان أبان سعيدة قدام الناس.. لكن أنا كل يوم مبنمش إلا وأكون معيبة.. الحفلات والنوادي اللي سمعتني عنهم يا "نادية" فعلاً بروحها.. عارفة ليه؟.. عشان بس أحس إني انسانة.. مطلوبة.. مش مجرد جسم بيختلف ويرضع ويستنى لما يجرب عيال تاني.. هو حرام لما أخرج.. هو حرام لما أهرب.. على الأقل أسمع أي حاجة من أي حد بدل ما أفكارى تخنقنى وتحاصرنى.. أنا عمري ما كنت زوجة وحشة بتخون جوزها زي ما بي Shawfni الناس.. وعمري ما كنت زوجة متكبرة ومتسلطة زي ما بيقول "جابر".. أنا زوجة عادية جداً.. زوجة زي أي زوجة في الدنيا.. زوجة مبتكونش عايزة غير زوج يقف جنبها.. زوج يحبها زي ما يحب نفسه وشغله.. زوج يحبها لجوهاها مش لبراها

** يظلم المسرح بهدوء.. تتركز الإضاءة على الممثلة.. موسيقى ناعمة، تتبعث من لا مكان.. تنظر إلى الأفق، وتتذكر الماضي البعيد **

الممثلة هيا: تعرف لما بمثل بحس بایه؟.. بحس إني عاملة زي النجمة.. نجمة ميدرش الواحد يمسكها باليديه، ويحافظ لو مسكتها ايديه تحرق من كثر النور اللي بتتشعره في الدنيا كلها.. النجمة العالية اللي بتتشوف الناس من فوق، وتبقى عاملة زي رموز الحق والخير والجمال.. لكن.. لكن لو النجمة اتخدشت في ماضيها أو حاضرها.. نورها ينطفئ.. والناس اللي كانت تتمنى تمسكها تحرقها عشان تمحيها من الوجود

** يخفت الضوء المركز على الممثلة تدريجياً لنصل إلى مرحلة الإظام التام، مع استمرار الموسيقى الناعمة **

الفصل الثاني



المشهد الأول

** يضاء المسرح تدريجياً، ويكون ذلك مصاحباً لصوت رفعت **
 ص رفعت: مرت عدة ساعات ونحن هنا.. لقد صرنا في الخامسة بعد
 منتصف الليل، ورغم ذلك فما زلت أفكر فيما صنعه بنا "جابر" .. لعبة
 "جابر" .. تلك اللعبة التي قامت بتجريد ثلاثة أشخاص ها هنا من كل ما
 لديهم .. "سمير" .. "نادية" .. "ناهد" .. لا أعلم من الذي سيكون الجالس
 على كرسي الإعتراف في المرة القادمة؟.. لكن هناك جزء من لعبة "جابر"
 فمت بالتفكير فيه أكثر من مرة.. لقد كان "جابر" يكره هولاء القوم.. لقد
 حسبهم سخفاء، مُملين، لكنني في تلك النقطة أرى عكس ذلك .. هولاء ليسوا
 بالسخف، ولا التفاهة، ولا الإملال الذي حسبة "جابر" .. يمكنك أن تحب أي
 إنسان إذا أمضيت معه وقتاً كافياً، وسمحت لوجهه البشري أن يلمس
 روحك.. كل هولاء يحملون طاقة إنسانية ما، وحين تدنو منهم تدرك أنهم
 ضحايا كسواهم.. وفي ظل هذا التفكير، وهذا الحفل الذي لم يعد حفلأ.. لم
 أكن أدرى ما الذي ستتحمله لنا الساعات القادمة

** يضاء المسرح لنجد خمسة أشخاص متواجدين به.. رفعت الجالس
 على الأرض، بالقرب من الأريكة.. ناھد الجاسة على الأريكة، بجانب
 الممثلة، وبجانبها زجاجة خمر، وفي يدها كوب.. المخرج في ركن المسرح
 شارد، يجلس على المقعد الوثير.. الكاتب يجلس شارداً هو الآخر على
 المقعد الوثير في الركن الآخر من المسرح.. رفعت ينظر لناھد، ومن ثم
 يتجه ناحيتها ليجلس بجانبها، وتصبح بينهما الممثلة **
 رفعت: أنتي كويسة يا "ناھد"؟

ناھد: "باقتصاب.. تنظر إلى الأرض" أحسن

** لحظة صمت **

ناھد: "تشير إلى الممثلة" هي أخبارها إيه؟

رفعت: "مَتَنْهَلًا" مش عارف.. بس أتمنى نخرج من هنا عشان نقدر
نويها للمستشفى

** ناهد تنظر لرفعت، ثم تنظر للأرض مرة أخرى **
ناهد: هو "سمير" راح فين؟

رفعت: "يَبْتَعِدُ بِنَظَرَاتِهِ عَنْ نَاهِدَ، وَيَنْظُرُ إِلَى الْأَرْضِ بِدُورِهِ" نزل مع
"نَادِيَة" عشان يهديها.. طبت منه كده عشان خايف عليها لو سبناها
لو حدها ممكن تعمل في نفسها حاجة
ناهد: مكنتش أعرف

رفعت: كنتي اتنى في المطبخ.. يعني وكنتي عاملة تعطي..
ناهد: "مَقْاطِعَةً" تأخذ كاس؟

** تمد ناهد يدها للتلتقط الزجاجة **
رفعت: "يَقْاطِعُ اتِّجَاهَ يَدِ نَاهِدَ" لا.. اعفيوني
** تنظر ناهد إلى يد رفعت، ثم تنظر إلى وجهه **
ناهد: تعرف يا "رفعت" أنا عاملة زي إيه؟
** رفعت ينظر إلى ناهد، ولا يجد ما يقوله **

ناهد: أنا ولا حاجة.. أنا عمري ما كنت زوجة بتخاف على جوزها..
وعمرى ما كنت ألم.. أنا مش عارفة أنا إيه؟.. عشان كده بقولك أنا ولا
حاجة.. ولا حاجة

** رفعت ينظر إلى ناهد محاولاً استكشاف ما بداخليها.. تخفت الإضاءة
لتتركز على الكاتب.. الكاتب ينظر إلى الأفق، ويتذكر صوتاً من الماضي
البعيد **

ص رحل: للأسف يا أستاذ "محمود".." كل الفحوص بتثبت إن المرض ده

عندك.. أنا مش عارف أقولك إيه؟.. لكن انت راجل مؤمن.. وعارف إننا ملك الله سبحانه وتعالى، ده غير إن العلم كل يوم بيتطور وأكيد هيوصلوا للعلاج وكمان..

** يخفت الصوت تدريجياً لخفت معه الإضاءة المركزية على الكاتب..
نسمع صوتاً آخر، وتتركز الإضاءة هذه المرة على المخرج **

ص شاب: ليه يابا هما عندهم كل حاجة وإننا معندناش أي حاجة؟

ص رجل كبير: يا "حسين" يا ابني اللي بيصل حاجه في إيد غيره عمره ما هيرضي

ص شاب: عمره ما هيرضي؟!.. أنا كل اللي بقوله ليه؟.. ليه هما عندهم وإننا معندناش؟.. ليه يلبسوا أحسن مننا؟.. ليه أغنى مننا؟.. ليه؟.. ليه؟

** يُضاء المسرح مع مقاطعة رفعت لأفكار المخرج **

رفعت: "حسين"؟!.. "حسين"؟!.. "خطيب"؟!

** يُنتبه المخرج إلى رفعت **

الخرج حسين: في حاجة يا "رفعت"؟!

رفعت: لا أبداً.. شوفتك سرحت فحببيت أفوتك

** ينظر المخرج إلى رفعت، ثم ينظر إلى الكاتب الشارد **

الخرج حسين: "يسير بيده نحو الكاتب" فهو سرحان زيبي أهو..
مفوتفوش ليه؟

** رفعت ينظر إلى الكاتب، ثم يعاود النظر إلى المخرج **

رفعت: يمكن عشان مخدتش بالي منه

الخرج حسين: "شارداً" طب ليه؟.. ليه؟

رفعت: انت بتقول حاجة يا "حسين"؟

** المخرج ينتبه لما قاله .. ينظر إلى رفعت، ولا يجد ما يرد به عليه .. في تلك اللحظات يدخل المطرب إلى مكان الحفل من الباب الذي يدخل ويخرج منه الضيوف .. رفعت ينتبه لدخول المطرب، فينهض ليتجه إليه .. يقنان وراء الأريكة بعيداً عن ناهد، وبجانب الباب الذي يدخل ويخرج منه الضيوف **

رفعت: سبت "نادية" لوحدها ليه؟

الطرب سمير: متلقاش "نادية" قاعدة تحت .. هي بس طلبت مني أسبها لوحدها شوية

رفعت: بس كده ..

الطرب سمير: "مقاطعاً" فلتاك متلقاش يا "رفعت" .. هي الحمد لله أحسن .. صدقني .. متلقاش انت بس

** رفعت ينظر إلى وجه المطرب **

رفعت: "مستسلماً" طيب .. ماشي يا "سمير" .. هعتمد على كلامك

** يتجه رفعت إلى مكان جلوسه بجانب الممثلة وناهد .. يُقاطع المطرب رفعت قبل توجهه إلى مكانه **

الطرب سمير: "رفعت" .. أنا ..

** رفعت ينظر إليه متسائلاً **

الطرب سمير: الصراحة كنت عايزة أقول حاجة

رفعت: "مشيراً إلى الجميع" طب ما تتكلم قدامهم ولا انت ..

الطرب سمير: "يُقاطع رفعت مجدداً" أيوة .. أنا مش عايزة أتكلم قدامهم ..
ويا ريت الكلام ده ميطلعش بينا .. جايزة كل الكلام اللي كنت بفكري فيه برة لاما
كنت مع "نادية" مجرد ... لحظة صمت" مش عارف !!

** رفعت ينظر إلى المطرب، ثم ينظر إلى الجميع خوفاً من أن يسمعهما أحد **

رفعت: "يعود بنظراته إلى المطرب" اتكلم يا "سمير" .. اتكلم

** المطرب ينظر إلى الأبطال بدوره، ثم يتوجه بنظراته لرفعت **

المطرب سمير: الحقيقة يا "رفعت" .. مش عارف الموضوع إزاي جه في دماغي .. لكن يمكن يكون ده هو الحل ونخرج من هنا خصوصاً....

رفعت: "مقاطعاً.. بنفاذ صبر" أرجوك يا "سمير" .. قول في إيه؟

** ينتبه المخرج لما يدور بين رفعت والمطرب **

المطرب سمير: "يتنهى" هي مجرد ملاحظة.. طبعاً أنت فاكر شريط "جابر" اللي سبھولنا هنا

رفعت: ماله؟

المطرب سمير: الشريط ده اتكلم عن ناس موجودين هنا.. ناس بيكرهم "جابر"

رفعت: أيوة.. اتكلم عن "نادية" و "ناهد"

المطرب سمير: لا يا "رفعت" .. ده اتكلم عن ثلاثة

رفعت: بس أنا كل اللي فاكرة إن الشريط اتكلم عن "نادية" و "ناهد"

المطرب سمير: "بنفاذ صبر" أيوة.. الشريط فعلًا اتكلم عن "نادية" و "ناهد"، لكنه كمان اتكلم عن

الخرج حسين: "يقف مقاطعاً" عن "حسين أبو النجا"

** ينتبه المطرب ورفعت إلى أن المخرج يتلخص عليهمَا، ومن ثم ينظران إليه **

الخرج حسين: الشريط اتكلم عنِ أنا

** المطرب ينظر بقلق تجاه المخرج.. ناھد تتنبه لما يقال.. الكاتب لا يزال على حالة الشروق كالممثلة.. رفعت ينظر إلى المخرج، ثم يتوجه إليه

**

رفعت: فعلاً.. هو قال إنك ..

الخرج حسين: "يُقاطعه.. يابتسامة ساخرة" شخصية وسخة.. تعرف لو كان "جابر" لقى شتائم أو سخ من دي كان قالها

** ينظر الجميع بما فيهم الكاتب إلى المخرج.. عدا الممثلة **

رفعت: "بعد لحظة الصمت" إيه سبب العداوة بينك وبين "جابر"؟

** تختفي الإبتسامة الساخرة من على وجه المخرج *

الخرج حسين: "بتوتر" راجل قليل الأدب.. تقول إيه بقى

ناھد: "تقف بعصبية" هي حصلت تقول كده يا "حسين"؟!

الخرج حسين: "يُكمل، وكأنه لا يسمعها" أنا معرفش يا "رفعت" هو ليه بيكرهني.. روح اسئله عن السبب

رفعت: صعب أروح أسئله لإنه مش موجود معانا.. أنا بسألك انت

الخرج حسين: "بتوتر، وبصيحة هادرة" أنا معرفش.. معرفش

ناھد: مش جايز تعرف يا "حسين"

** الجميع ينظر إلى ناھد.. الممثلة في ملوكٍ آخر.. المخرج ينظر إلى ناھد مذهولاً، مذعوراً **

ناھد: "تتظر إلى المخرج، وتتقدم بخطواتها تجاهه" ولو كنت ناسي أفكرة

الخرج حسين: "يبعد عنها.. توتر.. صيحة هادرة" اخرسي.. اخرسي

** المخرج ينظر إلى الجميع في توحش وترقب.. المخرج ينظر في عيني

ناھد التي كانت تود قول شيئاً ما **

الخرج حسين: "يقاطع ناهد بصيحة هادرة" فلذلك اسكنى
ناهد: "ترمي كوبها بعصبية.. بصيحة هادرة.. بكاء" لحد إمتهى
هخرس؟!.. لحد ما أموت؟!

** المخرج ينظر إلى الأرض.. يتنفس بتوتر.. رفعت ينظر إلى المخرج
غير مصدق.. الكاتب ينظر بدوره إلى المخرج، ويبعد عنه بخطوات بطيئة
**

الكاتب محمود: "يرد" مش ممكن.. مش ممكن
** المطرب ينظر إلى المخرج، ويندفع لا ارادياً حتى يكون بين ناهد
والمخرج.. المطرب ينظر إلى ناهد، ثم إلى المخرج **
المطرب سمير: "بتوتر.. خائفاً من أن يسائل" هو في إيه بينك وبين
"ناهد"؟

ناهد: "بكاء" هو انت بالسرعة دي بتتسى الأوقات اللي بنقضيها سوا؟!
** يظلم المسرح فجأة لتركيز الإضاءة على الممثلة.. الممثلة تنظر إلى
الأفق بعيد.. تتذكر شيئاً.. صوتاً.. صوت رجل.. صوت رجل في حالة
نشوة، مختلطًا بصوت بكاء فتاة.. يتصاعد الصوت.. يتصاعد معه احساس
الممثلة بالخوف.. تحاول الممثلة تغطية أذنيها لكي لا تسمع أكثر.. يرتفع
الصوت أكثر فأكثر.. تصرخ الممثلة.. يُضاء المسرح مع دخول الشاعرة
التي تسارع بإحتضان الممثلة **

الشاعرة نادية: "بهفة" مالك يا "هيام"؟.. ردِي عليا.. مالك؟.. مالك؟
** تنظر الشاعرة إلى الجميع، وهم ينظرون باندهاش للمخرج، وكأنهم
لم يسمعوا صرخة الممثلة **

الشاعرة نادية: "يعتاب" مسمعونش "هيام"؟!.. مالكم؟.. واقفين كده
ليه؟!

رفعت: "ينظر إلى الخارج، وكأنه لا يسمعها" مش ممكـن.. مش ممكـن
الشاعرة نادية: "تنظر لرفعت.. متواتر" هو في إيه يا "رفعت"؟!.. في
إيه؟!

المطرب سمير: "وكأنه لا يسمعها" طب ليه يا "حسين"؟!.. ليه؟
الخرج حسين: "يرفع وجهه من الأرض لينظر إلى المطرب" كلمة "ليه"
أنا اللي كنت دائمـاً بقولها يا عم "سمير"؟!.. ليه؟!.. ليه؟
الكاتب محمود: مكنش نافقك حاجة

الخرج حسين: "ينظر إلى الكاتب" لا كان نافقـني كـثير.. كـثير.. وكـثير
أوي كـمان
ناهد: "بكاء" طب وأنا؟!

الخرج حسين: مش ذنبي يا "ناهد"!.. انتي كنتي عجبـاني و... .
ناهد: "تقاطـعـه بـصـلـمة" عـجـبـاك؟!

** نـاهـد تـنـظـرـ إـلـىـ المـخـرـجـ.. المـخـرـجـ يـبـتـعـدـ بـنـظـرـاتـهـ عـنـهـ.. نـجـدـ المـطـربـ
يـسـيرـ لـأـرـادـيـاـ، يـبـتـعـدـ عـنـهـماـ، يـكـادـ لـاـ يـصـدـقـ ماـ يـسـمعـهـ.. يـصـلـ إـلـىـ رـكـنـ
الـمـسـرـحـ، يـلـفـتـ بـوـجـهـهـ تـجـاهـ المـخـرـجـ *
المـطـربـ سـمـيرـ: طـبـ لـيـهـ؟!.. لـيـهـ؟

الـخـرـجـ حـسـيـنـ: اـنـتـ الـلـيـ بـتـقـولـ كـدـهـ؟!.. اـنـتـ الـلـيـ ظـرـوفـكـ زـيـيـ بـتـقـولـ
كـدـهـ؟!.. اـنـتـ الـلـيـ حـسـيـتـ بـمـرـارـةـ الـفـقـرـ وـالـجـهـلـ وـالـحرـمـانـ الـلـيـ مـحـاوـطـكـ
بـتـقـولـ كـدـهـ؟!

** المـطـربـ يـنـظـرـ إـلـىـ المـخـرـجـ ذـاهـلـاـ، مـتـواتـرـاـ **

الـخـرـجـ حـسـيـنـ: أـيـوـةـ أـنـاـ عـارـفـ إـنـكـ مـنـ الـفـلاـحـيـنـ.. وـعـارـفـ إـنـكـ هـرـبـتـ مـنـ
عـيـلـتـكـ عـشـانـ تـيـجيـ هـنـاـ مـصـرـ وـتـقـنـيـ وـتـشـتـهـرـ

*المطرب ينظر إلى المخرج، ثم ينظر إلى الجمهور.. يتذكر صوّاً من عليه من قبل **

ص فلاحة: انت ليه يا ولدي بتفكر تهرب؟!.. ليه يا ولدي؟!

الطرب سمير: أنا معاك إني هربت.. أيوة هربت.. بس صدقني أنا عمري ما حسيت بالراحة.. مش عيبى إني دائمًا بحلم أيقى نجم.. مش عيبى إني ضحيت بأغلى شئ وكل شئ عندي.. ضحيت بأرضي.. وعياتي.. وأمي.. لكن.. لكن مكنتش عارف إني سبت نفسى هناك.. كنت كل يوم أصحى على شروق الشمس هناك.. وهذا.. هنا أصحى على طلة الشوارع الزحمة المخنقة.. كنت كل يوم أصحى على الزرع الأخضر الجميل اللي بيصبح على الشمس ببسملة صافية رقيقة.. وهذا.. هنا أصحى على وشوش الناس الحزينة الكتبية كان الشارع مرأية ليهم ولحالتهم.. هو يعني كفرت لما حبيت أقب على وش الدنيا؟!.. هو يعني كفرت لما حبيت أيقى نجم وأيقى فوق كل الناس؟!.." يستدرک، ويتجه تجاه المخرج" .. لكن عمري ما خنت صاحبي .. واعتدت على حرمة بيته .. زي ما أنت عملت

الخرج حسين: ومنين قالك إن "جابر" صاحبي؟!.. ومنين قالك أساساً إن كان ليه أصحاب زمان أو دلوقتي؟!.. أنا عمري ما كان ليه أصحاب.. كان كل اللي أعرفهم ابن المكوجي وابن الكمسي.. عارفين ليه؟.. لاني ابن.. ابن راجل على باب الله

** يتداول الجميع النظارات عداناً هد والممثلة الشاردة **

الخرج حسين: أيوة ابن البواب.. عم "شكري" البواب اللي كان الكل يدوسه برجليه وبهزأوه لو عمل أبسط غلطة.. عم "شكري" اللي كان يصحى مع شروق الشمس عشان يمسح عربية لده، ويجبب فطار لدبي، ويودي جرنان لدوκها.. عم "شكري" اللي كان بيستنى حسته على الباب

وكابنه شحات جه يشحت منهم.. عم "شكري" اللي الناس عمرها ما قدرته.. عمرها ما قدرته "يشير إلى نفسه" وعمرها ما قدرت ابنته.. كان أمهات العيال العليوي بتحذر ولادها مني.. وكنت لما آجي ألعب معاهم

** لحظة صمت.. المخرج يتذكر شيئاً ما **

ص امرأة: أنا مش قلتاك كذا مرة أبعد عن ابن البواب

الخرج حسين: "يُقاطع أفكاره.. بصيحة هادرة" طب ليه؟.. ليه؟.. أنا عملت فيهم ليه؟.. أنا ليه ذنبي لما اتولدت لأب على باب الله !!!.. أنا ليه ذنبي أتعامل على أساس حاجة مش بيادي !!! حاجة معمليهاش.. لكن أنا عمري ما شغلت نفسي كتير بالأسئلة دي.. لأن كان كل همي إزاي أوصل.. إزاي أهرب من الفقر والحرمان اللي محوطني.. كنت بحب السيماء.. يمكن عشان بلاقي فيها الشاطر حسن يتجوز ست الحسن.. الحدوة اللي مفرقة الأقلام اللي شاحج منها السوق في أرض الواقع.. اتعلمت.. واجتهدت.. وقولت أنا عمري ما هبقى غير مخرج.. وزى ما بيقولوا المعاناة بتخلق يا مجرم يا مبدع.. والمعاناة خلقتني مخرج

الشاعرة نادية: "ترك الممثلة لتواجهه الخرج" بس مش مبدع.. مخرج آه..
لكن مخرج بيتجار بشهوة الناس.. بيتجار بضعفهم.. بغيريزتهم

أعز صديقاتك
الخرج حسين: "ياستهزء" إيه يا سـت "نـادـيـه"؟!.. انتـي نـسيـتـي نـفـسـكـ وـلاـ
إـيهـ؟!.. مشـ اـنتـي لـسـهـ مـنـ شـوـيـةـ مـعـتـرـفـةـ بـالـسـرـقـةـ.. وـسـرـقـةـ إـيهـ.. سـرـقـةـ زـوـجـ

** الشاعرة تنظر إلى المخرج بتوتر، ثم تشيح بوجهها عنه **

الخرج حسين: وعلى العموم هجاوبك على اللي فلتنيه.. أنا يا "نادية"
هاتم عارف إن الكل بيهاجمني، وأولهم النقاد اللي بيتهمنوني بالسطحية

والنفاهة.. لكنني ببساطة ابن سوق.. راجل قدر يفهم الجمهور.. ويقدر ينجز أي فيلم بخلطة سرية محدث يقدر يحبكها غيري.. والمعادلة بسيطة جداً.. بتعتمد على جريمة.. حب.. بطولة حلوة.. بوس وأحضان.. رقصة وشوية دلع.. جريمة.. والنهاية السعيدة والجواز.. جواز مين؟.. جواز البطل والبطلة طبعاً.. أنا عارف إن مفيش أي فيلم من أفلامي هيفوز في مهرجان برلين.. بس بقدر أحق أرباح كبيرة للم المنتج وللممثل وللعبد لله رفعت: "يتجه ناحية المخرج غير مصدق" مش ممكن.. مش ممكن.. أرباح !!! بتفكر في الأرباح قبل ما تخلق فنك؟!

المخرج حسين: ومين قالك إني عاوز أكون زي "ديفيد لين" أو "صلاح أبو سيف" أو "كمال الشيخ" .. مين قالك إني عايزة أكون أحسن مخرج؟!!.. أنا عايزة أكون أنجح مخرج والأهم من ده كله أغنى مخرج
المطرب سمير: طب والناس؟!!.. الناس اللي بتنتذيم بفك

المخرج حسين: واشمعنى أنا اللي دانما بتنتذى؟!!.. اشمعنى دانما بيعاملوني وكاني حيوان ملوش أي شعور أو احساس.. وبعدين يا عم "سمير" إحنا هنا مش في هوليود عشان نصنع سيماء.. إحنا معندناش الوقت عشان نقدر ونحضر ونخلي الممثل يفكر ويحلم ويتنفس زي بطل الفيلم.. كل ده في الهجايس.. إحنا هنا بننجز كل حاجة في السريع.. كل حاجة.. و 3 أسابيع فترة كافية جداً لتصوير أي فيلم.. وصدقني الكل بيدخل وهو عارف إن الفيلم في لقطة كذا و كذا.. يعني بيدفع فلوسه وهو عارف هي Shawf إيه.. مش زي.. مش زي.. دفع سنين عمره على حاجة ملهوش ذنب فيها.. والكل بيطلع مبسوط.. ياما مبسوط بالسبوبة.. ياما مبسوط بالفرجة.. يبقى مين اللي هيشكى حاله غير النقاد والناس المعقدين اللي من عينة "نادية" هام اللي بيتكلموا كتير و فعل مفيش

ناہر: طب و أنا؟!

** ينتبه الجميع.. الكل ينظر إلى ناهد.. ناهد تقف في مواجهة الأبواب
الثلاثة.. تلتفت لمواجهة المخرج **

الخرج حسين: متكرش إنك انبسطي بكل وقت قضيناه سوا
ناهد: بس أنا كنت مبسوطة أكثر ياحساسك بيا.. أنا قبل ما أسلمك جسمى
سلمتاك روحي.. سلمتك قلبي.. كيانى

الخرج حسين: "يكرر عبارته" متنكريش إنك انبسطتي بكل ليلة قضيناها
سواء

"ناهـ.. بغضـ.. بـقـهـرـ" مـفـيـشـ فـاـيـدـهـ.. كـلـمـ زـيـ بـعـضـ.. كـلـمـ جـنـسـ وـاحـدـ..
"جاـبـرـ" فـكـرـ فـيـاـ كـأـرـنـبـةـ عـشـانـ الـعـيـالـ اللـيـ هـيـشـيلـوـ اـسـمـهـ.. وـانتـ فـكـرـتـ فـيـاـ
عشـانـ.. عـشـانـ شـهـوـتـكـ وـأـنـانـيـكـ.. وـوـسـاخـتـكـ.. يـاـ وـسـخـ يـاـ اـبـنـ الـ..ـ.

** ناحد تهم بصفع المخرج .. المخرج يمسك يدها قبل أن تصفعه **
الخرج حسين: "يتوحش" أنا مش زي "نادية" يا حلوة.. أنا مش زي أي حد.. فاهمة؟.. العملية كلها مصالح.. انتي جيتني تقضي وقت لطيف معانا، وأنا نفس الكلام.. ايه المشكلة بقى؟.. ايه الجريمة اللي عملتها؟.. كل ده يعني عشان شوية مساعدات؟!.. طب و ايه يعني؟!.. الغاية تبرر الوسيلة..

ده غير إنك كنتي كل يوم بتاخدي حقها.. ولو كنتي نسيتي أو قاتنا الحلوة
أفكراك

** الكاتب يُسارع، للفصل بين المخرج ونادر.. نادر ترتمي في أحضان
الكاتب لتبكى بحرارة.. الكاتب يجلس نادر **

الكاتب محمود: "بنظرة تفليس بالكراء للخرج" أنت شخصية حفيرة..
حفيرة.. حفيرة

** المخرج يتوجه إلى الكاتب، يواجهه، تتلاقي العينان **
الخرج حسين: "ياستهزاء" ما بلاش أنت بالذات يا عسل.. لحسن بابك
يتفتح قدامهم

** تتحول نظرات الكاتب من الكراء للقلق.. المخرج ينظر إلى
الكاتب بتواضع.. رفعت يتقدم، يقف بينهما.. رفعت ينظر إلى الكاتب، ثم إلى
الخرج، ثم يعاود النظر إلى الكاتب.. لحظة صمت **
رفعت: "بتوتر" إيه اللي لسه مستخبي؟

** الكاتب ينظر إلى الأرض، ثم يسير ببطء متوجهًا نحوية الأريكة التي
تجلس عليها الممثلة.. عيون الجميع تتبع الكاتب عدا نادر والممثلة..
يجلس الكاتب ليصبح بالقرب من نادر التي لا تزال تبكى والممثلة بينهما..
الكاتب يجلس، نظراته تجاه الأرض.. لحظة صمت **

رفعت: "ينظر إلى الكاتب، ثم إلى المخرج" إيه اللي مخبيه يا "حسين"؟
** المخرج ينظر إلى رفعت، ثم ينظر إلى الكاتب باستهزاء.. يتوجه
المخرج إلى الكاتب **

الخرج حسين: "بسخرية" طبعاً لكم عارفين "الأستاذ الكبير والعظيم ا
محمد عوني".." الصحفي الكبير، وصاحب أشهر قلم في الهجوم على
قضية اللادين واللاحرث.. الصحفي الهمام اللي بيطالينا نحارب في كل

وقت.. جبهته أساساً ضعيفة.. وهو أول واحد قال يلا نفسي

* المطرب ينظر إلى رفعت.. رفعت يبادله النظارات.. كلامها لا يفهم شيئاً

**

الخرج حسين: "يُكمل، ويتجه ناحية الطرف" وانت يا عم "سمير"
عمال تقولي الناس اللي بتتنذى من فنك.. الناس اللي بتتنذى من فنك.. طب
بدمتك يا شيخ مش المفروض وانت بتهاجم إنك تهاجم صح.. مفيش أي
حاجة في الدنيا ملهاش أساس.. وأساس أي فيلم الورق المكتوب.. المصدر
اللي فيه كل البهاريز

الطراب سمير: "بعدم فهم" قصدك إيه؟

الخرج حسين: "يُضحك" إيه يا عم "سمير"؟.. ده أنا كنت بقول عليك
ذكي ولماح.. "يبعد عن الطرف" خلونا نوضح الصورة أكثر.. متهدالي
محدش فيكم يعرف إنني بحضر فيلم مع "هيام" دلو قتي
رفعت: "يُقاطعه" لكن أنا عارف

** الجميع ينظرون إليه بدهشة بما فيهم المخرج عدا الكاتب والممثلة
وناهد.. رفعت ينظر إلى الممثلة، ثم يعود النظر إلى المخرج **
رفعت: "هيام" قالتلي عليه لما كان في الحفلة

الخرج حسين: "يعود لرنة السخرية والخبث، ويتجه لرفعت" طب
ومقلاتكش إن الفيلم ده من نوعية أفلامي؟

رفعت: "ينظر إلى الخارج.. بعلم فهم" أنا مش فاهم تقصد إيه.. أنا
مبروحش سينما لأن معظم الوقت بقضيه في البيت..

الشاعرة نادية: "تقاطع رفعت" أنا فاهمة هو يقصد إيه يا "رفعت"..
قصده إن الفيلم ده من نوعية الأفلام اللي.. اللي اتكلم عنها من شوية..
فيها.. فيها يعني لقطات كثيرة مش كويستة

** ينظر رفعت إلى الشاعرة مذهولاً، ثم ينظر إلى الممثلة، ثم ينظر إلى المخرج في النهاية **

رفعت: "لا يصدق" لكن.. لكن.. .

المخرج حسين: "مقاطعاً" لكنك مكنش متوقع إن "هيايم" ممكن تكون من النوع ده

الطرب: "يغمغمه، وهو غير مصدق كرفعت" مكنش أفتر إنها كده
المخرج حسين: "يُكمل، وكأنه لم يسمع الطرب" لا صدق.. وعارف إيه
كمان.. دي هي مُنْتَجَة الفيلم.. صدق أي شئ وكل شئ بيحصل في مجالنا
د.. .

رفعت: مش ممكن.. مش ممكن

المخرج حسين: عموماً ده مش موضوعنا لإتي زي ما قلت لو كنا عايزين
نحاسب حد يبقى نحاسب الكل.. وأساس الشر كله في الورق

** الجميع ينظرون إلى بعضهم البعض، ولا يفهمون شيئاً. المخرج
يتجه إلى الكاتب، وينظر إليه باستهزاء، ثم ينظر إلى الجميع **

المخرج: "يُكمل" الفيلم اسمه "كارثة فوق السطح" .. وهو اسم في
الهجايش زي كل حاجة في الفيلم.. وما دام عرفتم مين بطنته ومين مخرجه
يبقى أن الآوان نعرف مين اللي كتبه.. الاسم على الأفيشات "محمود
عزمي"، لكن الاسم في البطاقة هو.. .

** الجميع في ترقب.. توتر **

المخرج حسين: "بحبّت" الاسم في البطاقة هو.. .

الشاعرة نادية: "تنظر إلى المخرج، ثم إلى الكاتب، وكأنها تخاف أن تسأل"

"محمود عونى"؟!"

الخرج حسين: بالضبط

* لحظة صمت **

• الطرف سمير: مش معقول؟!.. مش معقول؟!

** رفعت يتجه إلى الكاتب.. الكاتب ينظر إلى الأرض.. المخرج يبتعد عن المكان الذي يقف فيه ليحتله رفعت.. يتجه المخرج إلى ركن المسرح، وينظر إلى الكاتب بانتهاء.. رفعت يجلس على ركبتيه بجوار الكاتب، وينظر إليه **

رفعت: "غير مصدق" أنت سامع "حسين" بيقول إيه يا "محمود"؟

** الكاتب يرفع رأسه لينظر إلى رفعت، ثم يعاود النظر إلى الأرض مرة أخرى **

الكاتب محمود: "بحفوت" أية.. سامع

رفعت: "غير مصدق" طب ومبتردش ليه؟!

الخرج حسين: هيرد ويقول إيه؟!.. هو عارف كويس إن كل كلمة قلتها صححة 100 %

الشاعرة نادية: "باستنكار.. إلى الكاتب" معقوله؟!.. معقوله أنت اللي تكتب الفيلم ده؟!.. طب إيه اللي ناقصك؟!.. شهرة؟!

الخرج حسين: "بسخريـة" شهرة؟!.. هو ناقص شهرة؟!.. ده "محمود" مشهور لدرجة إن مفيش حد في البلد إلا وبيقرى مقالاته.. مقالاته اللي بينادي فيها بالمثالية وشيل السلاح عشان نواجه بيها عدونا

الكاتب محمود: "يقف، ويقاطع الخرج بعصبية" بس لازم الأول تكون بطنه شبعانة عشان تقدر تشيل السلاح.. ومش بطنه بس.. لازم تكون بطنه عاليك وأمهem شبعانة عشان تقدر تحارب بدون ما تبص وراك.. أية أنا قررت أتنحى عن مبادني مش عشان الشهرة.. لا.. ده عشان الفلوس..

الفلوس اللي تقدر تشتري وتبيع أي حاجة حتى المبادى.. وأنا.. وأنا ملقتش غير قلمي عشان أبيعه

رفعت: قصدك ملقتش غير نفسك عشان تبيعها.. الإنسان كلمة و فعل.. والكاتب حياته كلها في محارب الكلمة.. وما دمت بعت كلمتك.. يبقى بعت حياتك.. يبقى بعت نفسك.. والإنسان اللي باع نفسه يقدر بيع أي حاجة ثانية حتى عياله، وكل ده مش عشان غيره.. لا.. ده عشان نفسه.. نفسه وبس

الكاتب محمود: "بياستنكار" بعت كل شئ عشان نفسي؟!.. نفسي وبس؟!.. مش عشان ولادي؟!.. "بصيحة هاردة" لا.. لااااه.. محدش فيكم يقدر يحس بالألم والحرمان قدي.. بألم الأب قدي.. لا حد فيكم ولا حتى انت يا "رفعت"

* رفعت يشعر بالألم عند سماعه الجملة الأخيرة من الكاتب.. ينظر إلى الأرض منكسرًا، حزيناً.. الجميع يتبع ما يقوله الكاتب *

الكاتب محمود: "يانكسار" ألم.. الأب.. قدي.. الأب اللي بيلافي ولاده كل يوم عايزين طلبات.. والأب الغبان ميكونش في ايده حاجة عشان يكفي طلبات ولاده.. فكان لازم أي أب في مكانه يبيع أي شئ.. بيع قبل ما ينزل تتر النهاية

* المطرب يتجه إلى الكاتب، ويمسكه من كتفه ليجعله في مواجهته **
المطرب سمير: بيع قبل ما ينزل تتر النهاية؟!

* الكاتب ينظر إلى الأرض، ثم يرتفع برأسه لنجدته يبكي.. يترك المطرب، ويذهب إلى ركن المسرح، ينظر إلى الأفق البعيد *

الكاتب محمود: عارفين الأب بيكون احساسه إيه لما يجيده طفل.. بتكون الدنيا كلها مش سيعاه من الفرحة.. بيحس إنه ساب لاسمه نبتة هنطэрخ

فروع من بعده.. والشجرة كل ما عمرها بيقدم كل ما النبتة ما بتخضر وتكبر وتطلع للنور والدنيا.. ده طبعاً ما بيتمش من يوم وليلة.. كل ده بياخد أيام.. شهور.. سنين.. لغاية لما النبتة تبقى شجرة.. وطول المدة دي الشجرة الأم تحوط على النبتة بظلها وحנתها.. أكيد الشجرة في ساعات كثير بتبقى قاسية على النبتة، لكن كل ده عشان خايفه عليها.. وصدقوني كل ما الشجرة بتزعل النبتة كل ما صدرها ينقبض وتحس إن قلبها هيطلع منه.. قلب الشجرة.. لكن لو المدة قصرت.. والناس قالت إن الشجرة لازم تتقطع من جدورها.. ساعتها الشجرة هتعمل إيه.. الشجرة هتعمل إيه غير إنها تدي كل اللي عندها عشان النبتة تطرح وتكبر.. تعمل أي حاجة عشان النبتة تكون مترعية وحاسة بالأمان حتى لو مكنتش الشجرة موجودة.. موجودة في مكانها

الخرج حسين: "بياستهزاء" شجرة؟!.. ونبتة؟!.. هو إحنا قربنا على عيد الفلاح ولا إيه؟!

الكاتب محمود: "ينظر إلى الخارج.. بكاء" فاكر يا "حسين" لما جتاك من خمس شهور وقتلتك إني مستعد أكتب أي حاجة بس الفلوس تكون مدفوعة كاش.. ده أنا حتى كتبتلك عشر أفلام.. بس كل ده كان بشرط واحد إن فلوس كل فيلم تكون جاهزة وعلى الترابيزة

الخرج حسين: طبعاً فاكر!.. ده انت حتى قبضت كل فلوس الأفلام دي من قبل ما أخرجهم

الكاتب محمود: أهو قبل الخمس شهور دول كنت انسان محترم زي ما بتقولوا.. لكن في يوم حسيت بتعب.. قلت أروح للدكتور أكشف وأعمل تحاليل وأشوف عندي إيه.. لقيت الدكتور.. لقيت الدكتور قال.. قال إن الشجرة قربت تموت

** الجميع بما فيهم المخرج غير مصدقين لما يسمونه **
 الكاتب محمود: "بكاء حار" أنا قربت أموت

ناهد: "تصرخ، وتنتفض من مكانها" بس كفاية.. كفاية.. كفاية

الشاعرة نادية: "تجه إلى الكاتب.. بقلق" هو انت عندك إيه يا "محمود"؟؟

الكاتب محمود: مش مهم الأسامي.. مش هترق.. كل الأمراض الخطيرة نهايتها واحدة.. لكن أنا مرضتش أحرم ولادي من حاجة نفسهم فيها.. أنا مكتشن عايز غير إني أعيشهم في أحسن مستوى.. عارف إني غلطت.. لكن.. لكن أنا بياديها إيه أعمله؟.. كان بياديها أموت وأسبلهم اسم يشرف، لكن الفقر كان هيقرصهم، وكانتوا هيلعنوا الاسم ده في نومهم وصحيانهم.. وكان قدامي أسبلهم الفلوس.. أسبلهم الوجاهة الإجتماعية.. واخترت الطريق الثاني.. أنا عارف إني لما أموت مش هسبلهم غير معاش ميكفيش العيش الحاف.. اوعوا تفكروا إني بحكم ما أنا مشهور ببقى عندي الألوقات.. بالعكس.. أنا وقلمي منسوبيش ثلاثة أبيض في سوق بلدنا.. فكنت لازم.. لازم أقلب أرجوز عشان أسوى.. بهلوان بيزفوه زي "حسين"..
 بس عايش.. أدينني عايش

** يبكي الكاتب.. ناهد تجلس بجانب الممثلة، وعيناها بهما أثر الصدمة والدموع.. رفعت ينظر إلى الأرض.. المطرب ينظر إلى المخرج.. المخرج لا يجد شيئاً يقوله.. الشاعرة تنظر إلى الكاتب.. الممثلة ترتجف *

الممثلة هيا: "صوت واهن" هو إحنا مش هنخرج من هنا؟

* الشاعرة تتجه بسرعة إلى الممثلة لتحتضنها *

الشاعرة نادية: "بدموع غزيرة" متلقفيش يا حبيبي.. هنخرج من هنا.. هنخرج.. صدقيني.. هنخرج

** ناھد تجلس بالقرب من الشاعرة وبينهما الممثلة .. ناھد تنظر إلى الشاعرة .. الشاعرة تحضن الممثلة، ولكنها سرعان ما تتبه لنظرات ناھد .. ناھد تنظر إليها بتوتر.. بكاء ودموع .. الشاعرة تبادلها النظارات .. يخفت ضوء المسرح بطريقة ناعمة، ويتركز على الشاعرة وناھد .. صوت يأتي من بعيد .. صوت موج البحر .. ضحكات .. ضحكات فتاتين بالتحديد .. تلعبان .. تلهوان .. تركضان وراء بعضهما البعض **

ص فتاة 1 : مش هتقدرى تمسكيني يا "ناھد"

ص فتاة 2 : لا هقدر يا "نادية"، وهتشوفى

** تستمر صرخات وضحكات الفتاتين .. يخفت الصوت تدريجياً، يسطع ضوء المسرح تدريجياً أيضاً .. تنزل الدموع من عيني ناھد .. تمتد كف الشاعرة، تمسح دموعها .. تمتد كف ناھد، ثربت على رأس الشاعرة .. تبتسم كل منها للأخرى، ثم تقوم الإثنتان باحتضان الممثلة .. في تلك اللحظة يكون المسرح كامل الإضاءة .. ينظر المخرج إلى الكاتب القابع في أحد أركان المسرح .. يتوجه المخرج إلى الكاتب بخطوات بطيئة .. في نفس الوقت الذي يتوجه فيه رفعت إلى الركن الآخر من المسرح .. المطرب يلاحظ أن رفعت بمفرده، فيتجه إليه ليترك الكاتب والمخرج بمفردهما .. الكاتب يجلس على أحد المقاعد الوثير، الموجودة في ركن المسرح .. رفعت يجلس على الأرض شارداً .. المخرج يقف بجانب الكاتب .. المطرب يجلس على الأرض بجوار رفعت .. المخرج يرفع وجهه من الأرض، وينظر إلى الكاتب الذي أصبح في عالم آخر **

الخرج حسين: "بصوت خفيض" أنا آسف .. مكتش أعرف

الكاتب محمود: "دون أن يلتفت إلى المخرج .. بصوت منكسر" ولا يهمك

** المخرج ينظر إلى الكاتب، وفي عينيه نظرة ندم .. ينظر إلى الأرض،

ثم ينظر إلى الكاتب.. يجلس المخرج في النهاية على الأرض مثلاً فعل المطرب مع رفعت.. ينظر المخرج إلى الكاتب الذي يعلوه، فهو جالس على مقعد وثير عكس المخرج.. الكاتب ينظر إلى الأفق.. يقوم المخرج هو الآخر بالنظر إلى الأفق **

المخرج حسين: تعرف.. مرة رحت شقة بتديراها واحدة من إياهم للقمار.. وكانت الشقة زحمة ولا سوق الخضار.. قعدت على تربزة عليها حوالي 10 أشخاص.. كان 9 منهم ولاد شر.. "ينظر إلى ناهد، والشاعرة خوفاً من أن يسمعه أحد.. يتنهى" حلال.. ولاد حلال.. كل واحد فيهم عنده زكائب فلوس تسد عين الشمس.. ما عدا واحد بس.. واحد منهم كنت أعرفه كويس.. تعرف كان بيشتغل إيه؟.. كان عامل في الاستديو اللي بخرج فيه أفلامي.. كان متوتر جداً، وخايف إني أعرفه.. بس أنا عرفته وعملت نفسي مش واحد بالي.. هتقولي إزاي عامل وبيلعب كونكان؟.. أقولك علمي علمك.. لكن كنت حاطط في دماغي إني أكسبه فلوس من الحيتان اللي محوطانة ديها.. وفعلاً بشوية هابرا كادبرا قدرت أخليه يكسب كل اللي في جيوبنا.. تعرف أنا كسبته الفلوس دي ليه مع إنه كان حمار في الكونكان؟

الكاتب محمود: "ينظر إلى المخرج" ليه؟

المخرج حسين: "لأيزال ينظر إلى الأفق" لاتي كنت عارف إن مراته حامل.. وكانت عارف إنه حاول كتير يجيب فلوس من الاستديو عشان مصاريف الولادة.. لكن مقدرش.. فأكيد قال طب ما أجرب حظي.. جايز.. يمكن البالية تلعب معايا وأنط لفوق، وأقدر أدخل مراتي المستشفى عشان تخلف

الكاتب محمود: وإزاي عرفت حكايتها؟

المخرج حسين: "ينظر إلى الكاتب" انت ناسى إني منهم، فأكيد ههتم بأحوالهم

** الكاتب والمخرج يتبدلان النظارات.. يعود الكاتب للنظر إلى الأفق **
الكاتب محمود: انت ليه قولت الحكاية دي؟

الخرج حسين: "ينظر هو الآخر إلى الأفق" عشان العامل ده فكرني بوالدي، وفكري بنفسي.. فكرني بأبويا البواب.. العامل البسيط اللي مسرقش أو اغتصب حق مش حقه.. الناس بقى كافنته بایه.. "ابتسامة باهته" ولا حاجة.. بالعكس دول بقوا يعايروه كأنه ارتكب ذنب.. وفي نفس الوقت العامل ده فكرني بنفسي.. لما كنت أهل.. طبيبيبي.. وبرضه الناس كافنتي بایه.. "ابتسامة باهته" برضه ولا حاجة.. بالعكس دول كانوا بيستغلوا أي فرصة عشان يضحكوا عليا وعلى مهنة والدي.. عارف ليه هما بيعملوا كده؟

الكاتب محمود: "ينظر إلى الخارج" ليه؟

الخرج حسين: "لا يزال ينظر إلى الأفق" عشان أنا جدري ضعيف.. شجرة جدرها ضعيف.. جدري بواب.. على الأقل أنت يا "محمود" جدرك قوي.. كل عيلتك من بتوع الحسب والنسب.. أما أنا.. أنا.. أنا.. أنا ولا حاجة

الكاتب محمود: بس الثورة لغت الطبقية

الخرج حسين: "بسخرية" يمكن.. جايز.. بس تقدر تقولي ايه بقى اللي بنسمعه ده؟.. المدير بيتحقق على الموظف عشان الموظف الغلبان بيأخذ رشوة والمدير محمود ودمه حامي.. بس دمه كان هيبعد بسرعة لو كان الموظف اتقاسم معاه في الرشوة.. الموظف بيطلع غله في الموظف الأصغر منه لأن الموظف مش لاقى حد يطلع غله عليه.. وإن عنى تقولي المدام لأن المدام ما بتصدق تلاقي الموظف راجع من شغله عشان هاتك يا خناق.. الأسعار غليت.. والرز شاحن من السوق وغيره وغيره.. الكبير بيأكل الصغير والصغير بيأكل الأصغر منه والأصغر منه بيأكل الأصغر منه..

هي دي حياتنا

الكاتب محمود: "حانقا، مبتعداً بنظراته عن المخرج" كل ده مش مهم دلوقتي.. لأن قدامنا عدو صهيوني لازم نحرر أرضنا منه

الخرج حسين: "ينظر إلى الكاتب" عندك حق.. بس مش من الأولي إننا نحرر نفسنا الأول من الحاجات الغلط.. من حاجات عفى عليها الزمن..

صدقى عمر ما الأرض هتتحرر إلا لما يتحرر أصحاب الأرض نفسهم

* * الكاتب يلتفت تجاه المخرج.. لحظة صمت.. ينظران إلى بعضهما البعض *

الكاتب محمود: "مبتسماً" تعرف.. عندك حق

الخرج حسين: "مبتسماً هو الآخر" تعرف انت بقى.. أنا عمري ما اتكلمت مع حد.. أصلى.. أصلى معنديش أصحاب

الكاتب محمود: "يتردد" يمكن عشان انت...

الخرج حسين: "يُقاطعه" إنسان مش كوييس.. أنا عارف

الكاتب محمود: "يبتسِم" بس بيجي منه

* * ينهض الكاتب من المقعد الوثير الذي يجلس عليه.. المخرج ينظر إليه، ولا يزال جالساً على الأرض.. الكاتب يبتسم، يجلس بدوره على الأرض بجوار المخرج.. يبتسم المخرج.. على الجانب الآخر بركن المسرح يجلس رفعت على الأرض مستنداً برأسه على المقعد الوثير.. رفعت ينظر إلى الأفق البعيد.. المطرب يجلس بجواره على الأرض، وينظر إلى رفعت

**

المطرب سمير: في حاجة مضيقاك يا "رفعت"؟

** رفعت كانه انتبه لوجود المطرب معه، ينظر إليه، ثم يعود بنظره

للافق **

رفعت: "بصوت خفيض" لا أبداً

* المطرب ينظر إلى رفعت، ويحاول سبر أغواره *

رفعت: "شارداً.. ينظر إلى الأفق" تعرف.. "محمود" عنده حق.. أي شجرة في الدنيا يهمها إيه غير سعادة النبتة.. يهمها إيه غير إنها تشو夫 النبتة مبسوطة.. الشجرة لازم تعمل أي حاجة عشان تفضل البسمة مطبوعة فوق ورق النبتة

المطرب سمير: "ينظر إلى رفعت" لكن سرقة الناس والضحك على دقونهم بالشعارات حرام

رفعت: "ينظر إلى المطرب" بس الحرامي هيقولك إنه كل اللي عايزه يشبع ولاده يوم أو يومين، وهتلاقيه بيقولك طب روح شوف الحرامية الكبار اللي بيسرقوا قوت الشعب تحت اسم العدالة أو المساواة

المطرب سمير: و"محمود" مختلفش عنهم.. ده غير إن في رموز في حياتنا زي الحق والخير والجمال لازم نراعيها لأنها مقاييس كل شئ

رفعت: الرموز مبقتش في زمانا مقاييس.. دامماً الإنسان بيقابل ظواهر ملهاش أي تفسير.. مفيش دلوقتي حاجة أساسية تقدر تأخذها مقاييس وتقيس عليها كل شئ.. خذ عندك الأخ اللي المفروض يحوط على اخواته وعيلته.. فجأة تسمع أو تقرى عن آخر بيقتل أخيه

المطرب سمير: مش ممكن يا "رفعت"!.. انت عارف معنى كلامك إيه؟!.. معنى كلامك إن حياتنا مبقاش فيها رموز.. حياتنا كلها بقت شعارات فاضية.. حياتنا كلها بقت مجرد كلام في الهوا

* لحظة صمت.. ينظر رفعت إلى المطرب *

رفعت: "يعود لشروعه.. ينظر إلى الأفق" مش عارف.. لكن متهميالي إن دي البداية، وإن الزمن اللي جاي هيكون مليان بالمتناقضات اللي ملهاش

أي تفسير

** المطرب ينظر إلى رفعت.. رفعت ينظر إلى الأفق.. لحظة صمت..
المطرب يضع يده على كف رفعت **
المطرب سمير: مالك يا "رفعت"؟

رفعت: "شارى" عمرك ما بصيت على الناس والدنيا من فوق؟
المطرب سمير: "بصوت خافت، متعجب" من فوق؟!
رفعت: همم.. هتلaci الناس حاجة صغيرة جداً.. تافهة جداً.. يمكن يكون
هو ده السبب اللي خلى "جابر" يفكر ينتقم مننا.. لإنه مبقاش زينا.. هو
دلوقت بيبيص علينا من فوق، وعارف قد إيه إحنا صغيرين وتافهين
** لحظة صمت.. المطرب ينظر إلى رفعت، ثم ينظر إلى الأفق بدوره **
المطرب سمير: وعرفت إزاي إنه بيصلنا من فوق دلوقت؟.. مش جايز
تحصل معجزة والعملية تنجح

رفعت: زمن المعجزات انتهى.. أنا عارف لإني بسمع اللي فوق.. بتكلم
معاهem

المطرب سمير: "ينظر إلى رفعت.. بياستنكار" تسمع؟!.. وتتكلم؟!
رفعت: ده مش غريب على واحد زيبي.. واحد ليه جزء منه فوق.. فوق
في السما

المطرب سمير: "ينظر إلى الأفق" في السما؟!
** المسرح مضاء.. صوت الطائرات يخترق السحاب، مختلطًا بجزء من
أغنية "عدى النهار" .. الكل يتجمد.. تنتهي الأصوات لتعود الشخصيات مرة
أخرى إلى الحياة**

المطرب سمير: "يردد آخر كلمة بشروق" السما؟!

رفعت: "لا يزال على حالة الشروق" تعرف الأب عامل زي إيه.. الأب زي السماء.. السماء بتحوط على ناسها.. والأب بتحوط على ولاده.. أو زي ما قال "محمود" عامل زي الشجرة.. الشجرة بتحوط على نبتتها.. خايفه عليها من الريح والمطر.. يمكن تكون خايفه عليها من نفسها.. ويوم ورا يوم النبتة تكبر وتبقى شجرة.. والنبتة اللي بقت شجرة تعمل مع نبتتها زي ما عملت الشجرة الأم معها.. هي دي سنة الحياة.. سنة الحياة

** المطرب ينظر إلى رفعت **

رفعت: "يُكمل" الشجرة عارفة إنها في يوم من الأيام هتموت.. النبتة بقى كبيرة.. صغيرة.. دي حاجة مش في ايدها.. أجلنا مش في ايد أي حد.. أجلنا.. أجلنا كلنا مش في ايد أي حد.. حتى النبتة.. أجلها مش في ايد أي حد.. "ينظر إلى المطرب.. دموع" لكن الشجرة في ايدها إيه تعمله لما يجين أجل النبتة.. هي عارفة إنه مش في ايديها أي حاجة تعملها.. بس هتعمل إيه مهو زي ما الأجل مش باليديها.. الحزن برضه مش باليديها

* المطرب ينظر إلى رفعت بتاثير *

رفعت: "يعود بنظراته إلى الأفق" تعرف لما بنبكى على واحد عزيز علينا.. مبنبيش عشان هو بس عزيز علينا.. إحنا في نفس الوقت بنبكى على حالنا من بعده.. يا ترى هنعمل إيه من غيره؟.. يا ترى حياتنا هتستمر زي ما كانت ولا الشعور بالنقص هيخلني حياتنا صعبة من بعده؟.. أنا عارف كويس إن الحياة هتستمر، وإن الشمس هتلع من تاني عشان الدنيا مبتفتش عند حد.. لكن.. لكن أنا بيكلم عن جزء مني.. جزء مني كان بيتحرك ويلعب ويكبر قدام عينيا.. جزء مني كان فاهمني طول الوقت، وكان بيكلم معايا دائمًا.. تعرف مع إني انطوانى إلا إني لما يكون معاه بنسى نفسي.. حقيقي بنسى نفسي.. وأضحك والعب وأجري وانتظرت كأن الزمن

رجع بيا لورا من تاني.. كاني بقىت شاب في نفس سنه بالضبط.. أنا بشوف نفسي فيه.. لكن زي أي حدوتة لما بتبتدي بكان يا ما كان بنتهي.. لازم تنتهي

* رفعت يبكي.. المطرب ينظر إيه باشفاق *

الطرب سمير: من إمته يا "رفعت"؟.. من إمته؟

رفعت: "يُكمل وكأنه لا يسمعه" زمان كان هو دائمًا بيتص للسماء، وكان يقعد يحلم بأنه بقى بجناحين ريش يقدروا يخلوه يلف العالم والدنيا بحالها.. وفي يوم الجناحين الريش دول بقوا جناحين بلاستيك.. بقت لعبة بجناحين بلاستيك.. وقعدت الأيام تجري وتجري.. تطير.. وتتبخر في الهوا.. ولسه الطير حلمه بالسماء متغيرش.. وأخيرًا قدر الطير يوصل للسماء بجناحين حديد.. يمكن الجناحين الحديد مش في نفس ليونة جناحين الريش، لكن قدوا يوصلوا الطير لهدفه.. السماء.. السماء اللي كانت كل غرضه من الدنيا.. ومن يوم ما الطير وصل للسماء مبقاش اسم "محمد رفعت اسماعيل" يتقان من غير اللقب.. لقب الطيار

الطرب سمير: "رفعت"؟

رفعت: تعرف كان "محمد" دائمًا بيقول إيه عن حياتنا.. حياة الناس كلها.. بيقول إننا كانا عاملين زي الطيارات.. أيوة.. الطيارات.. كلنا بأجنحة ومحركات نفسها تطير فوق.. فوق في السماء.. وبمرور الزمن الطيارة تقدم وتشيخ.. محركها يعطّل.. مرة.. واثنين.. وعشرة.. يحاولوا في الأول يمشوها.. لكن الطيارة ذات نفسها عارفة إن عمرها الإفتراضي انتهى.. وبتسنني الساعة.. اللحظة اللي هتيجي عشان تنفك وتتابع حت.. حت.. وأكيد هيجي مكانها طيارة أحدث تكمل المشوار.. المسيرة.. الحياة.. "يأفعوال.. ينظر إلى الطرب" بس تقدر تقولي ليه.. ليه طيارة زي الفل

ولسه بعافتها تنفك؟.. ليه طيارة تقدر توصل للسماء تحطم وهي على الأرض؟.. ليه؟.. ليه؟

المطرب سمير: "يحتضن رفعت.. يانفعال" استغفر ربك يا "رفعت" ..
استغفر ربك

* ينتبه المخرج والكاتب، ويتوجهون بالفعل ناحية رفعت والمطرب **
الكاتب محمود: في إيه؟

الخرج حسين: ماله "رفعت"؟

* رفعت في حالة غريبة.. المطرب يحتضن رفعت، وينظر ناحية الكاتب
والمخرج.. تنتبه ناهد والشاعرة لما يجري، فتقفان، وترسلان نظارات
متسائلة *

المطرب سمير: مفيش حاجة.. مفيش حاجة.. يا ريت تسيبونا لوحدنا شوية
* يتبادل الكاتب والمخرج نظارات تحمل حالة الفلق التي تعتمل داخلهما،
لكنهم لا يجدان مفرأً سوى الرجوع لمجلسهما السابق.. المطرب يرسل
نظارات مُطمئنة لナاهد والشاعرة.. ناهد والشاعرة تنظران إلى بعضهما
البعض، تجلسان مرة أخرى بجانب الممثلة.. من الواضح أن الجميع يتتابع
ما يقوله رفعت على الرغم من ابتعادهم عنه والمطرب **

المطرب سمير: "يبعد رفعت عنه.. ينظر إليه، ويربت عليه" أهدى يا
"رفعت" .. أهدى.. استغفر ربك.. استغفر ربك

رفعت: "ينظر إلى المطرب.. بكاء حار" أنا ما كفترت يا "سمير" .. صدقني
عمرى ما كفرت بالله.. أنا مؤمن بقضاء ربنا.. أنا كفرت بالشعارات.. بالأمل
الزائف اللي بيوزعوه على الناس.. ليه يا "سمير" عملوا فينا كده؟..
ليه؟.. ليه؟

المطرب سمير: أرجوك يا "رفعت" أهدى.. من فضلك أهدى.. أنا مش فاهم

ايه اللي حصل بالضبط.. لكن أنا حباب أسمعك.. من فضلك افتحلي قلبك،
وخليني أعرف اللي جواه.. من فضلك

** المطرب ورفعت يتبادلان النظرات.. لحظة صمت.. يبتعد رفت
بنظراته عن المطرب لينظر إلى الأفق **

رفعت: 5 يونيو 67.. يوم ميتمحيش من الذكرة.. يوم اتنقش بحروف من
الدم في مشاعر الأمة.. ومشاعري أنا شخصياً.. 5 يونيو عيد ميلادي وميلاد
ابني اللي اتولد في نفس اليوم.. يمكن عشان كده كنا قريبين من بعض في
كل شئ.. في كل حاجة.. لو شفتي أنا وابني تقول علينا اثنين اصحاب..
استحاللة تفكير إن ده ابن وأبوه.. كنا بنكمel بعض في كل حاجة.. كل أسرارنا
مع بعض.. أحزاننا.. أفراحنا.. كل حاجة بنعيشها سوا.. كان "محمد"
مطلق.. يحب يعيش اللحظة.. وأنا بطبيعتى كنت عامل زي كانن وحيد
الخلية على رأي "جابر"، لكن كنت بنسى نفسي وأنا بقربه.. كنت بحس
إني بتولد من جديد وأنا معاه.. وأنا معاه.. "ينظر إلى المطرب" لما كنت معاه
** المطرب ينظر إلى رفت **

رفعت: "يُكمل، ويعود بنظراته إلى الأفق" 3 يونيو 67.. جه "محمد"
استدعاء.. مكنتش متصور إننا داخلين على حرب.. كنت قلقان جداً، لكن
"محمد" طمني وقالي إن كل القيادات بيأكدوا على انتصارنا لأننا أقوىاء
وعندنا أحدث المعدات والأسلحة.. 4 يونيو 67 انقطعت أخبار "محمد" .. 5
يونيو 67.. في اللحظة اللي كنا بنطفي فيها الشمع.. كان العدو بيولع الدنيا
من حولينا بالنار.. نار.. نار في كل مكان.. العدو بيحتفل بانتصاره على
تورته كبيرة.. وبiolع التورته بشموع على شكل عظم.. عظم ولا الدنيا.. في
الوقت ده كنا بنسمع الراديو.. راديو بلادنا

* يتجمد الجميع عند سماع صوت الراديو.. تختلط الأصوات مع بعضها

البعض **

منديع 1: قامت قواتنا المسلحة بأسقاط خمسين طائرة من طائرات العدو
 منديع 2: قواتنا المسلحة تقترب بجيوشها من الحدود الإسرائيلية
 منديع 3: قامت قواتنا المسلحة بخداع الشعب المصري، ولهم منا جزيل
 الشكر على تصديقكم لنا

** ينتهي الأصوات لتعود الشخصيات إلى الحياة مرة أخرى *

رفعت: "بكاء حار" كان عندنا الأمل.. وكان عندي ابني.. ليه كل ده راح
 بسرعة؟.. ليه أصدروا قرارهم بتنحية ابني عن الحياة؟

** تتجدد الشخصيات عند سماع صوت الرئيس جمال عبد الناصر وهو
 يخطب جزء من قرار تنحية عن السلطة **
 عبد الناصر: أقول بكل صدق.. إنتي على استعداد تام لتحمل المسئولية
 كلها.. إنتي قررت أن أتنحى عن كل منصب رسمي، وأن أعود إلى صفوف
 الجماهير

** ينتهي الخطاب لتعود الشخصيات للحياة مرة أخرى *

رفعت: ليه حرموني من الإنسان الوحيد اللي كنت بعيش معاه الدنيا؟..
 ليه خلوه يفوتني ويسيبني أنا للعذاب والعيشة الميتة؟.. ليه يضحكوا عليه
 علينا ويقولونا وعد هما مش قادرین ينفذوه؟.. ليه الطيار يتضرب قبل ما
 يحلق بجناحه؟.. ليه كل ده؟.. ليه؟.. ليه؟.. ليه يقلعوا العيداد لميتم؟.. ليه
 عملوا فينا كده؟.. ليه؟.. ليه؟.. ليه؟

** يُربّت المطرّب على ظهر رفعت.. يتحرك الكاتب ناحية رفعت ليُربّت
 عليه.. يفعل المخرج الشى ذاته، وكذلك الشاعرة وناهد.. الممثلة تنظر إلى
 رفعت لتجد الجميع يُواسونه.. تقوم الممثلة ببطء، تتجه ناحية رفعت.. ينظر
 لها الجميع بدھشة.. تجلس بجوار رفعت.. تمد يدها، تمسح دموع رفعت،

وتداعب خصلات شعره **

ناهد: "يا بتسامة باهنة" حمد الله على السلامة يا "هيم"

الممثلة هيم: "زبول" أجي جملتك يا "ناهد" لغاية لما كلنا نخرج من هنا

** يتبدل الجميع النظارات، ثم يطرقو بوجوههم إلى الأرض وكأنهم
تذكروا الآن ما هم فيه **

المطرب سمير: "ينظر إلى الأرض" تعرف يا "رفعت" .. أنا النهاردة بس ..
دلو قتي بس حنيت لأبويا أوبي .. أوبي

** يرفع الجميع وجوههم ليتابعوا ما يقوله المطرب .. نظارات عدم الفهم ..
رفعت ينظر إلى المطرب **

الطرب سمير: "يكمل" كان أبويا راجل صعيدي .. كان جامد أوبي .. فاسى
جداً .. كان كل يوم يموتنى من الضرب .. لكن مع انه شديد وفاسى إلا انى
كنت بحس ان ليها جدر .. ظهر اتسند عليه .. ليه لا؟! .. مش أبويا؟! .. بس من
كتر الضرب كان في حيطة بتتبني بيني وبينه .. كنت بكرهه أوبي .. أوبي ..
ولما مات كان عندي وقتها عشر سنين .. منتصورش قد ايه فرحتي .. كنت
أقدر العب مع العيال براحتي .. أزوج من فلاحة الأرض بدون ما يحاسبني
حد .. كنت ملك نفسي لأن الملك الحقيقي مات .. ولما كنت ببين الفرحة من
إن أبويا الميت مش هيقدر يمد ايده عليا تاني .. كانت أمي هي اللي تقوم
بالدور ده .. كانت ايديها جامدة بس مش أجمد من أبويا، وكانت تقولي
والدموع في عينيها اني حمار وإنى معرفش قد ايه أبويا بيحبني .. "ينظر
إلى رفعت .. عيناه مليئة بالدموع .. رفعت يبكي هو الآخر" بس تعرف يا
"رفعت" لما قولتلي على حكاية "محمد" عرفت ساعتها أمي كانت تقصد
ايه .. أنا فعلًا كنت حمار.. وزي أي تلميذ عرف غلطه يتمنى انه يروح
لأستاذ عشان يصلحه .. يتمنى .. حقيقي بيتمنى

** رفعت والمطرب بيكيان.. الجميع في حالة شجن.. يمسك المطرب رفعت من كتفه، ينهضان ويقفن معاً.. يطبع المطرب قلبة على جبهة رفعت

**

المطرب سمير: "ينظر إلى رفعت" صحيح ابنك تتحى عن الحياة.. بس ده مكنش بياده.. أي فيلسوف أو شاعر بيؤمن بمبدأ بيوموت عشانه.. وابنك مامتش بقرار منهم.. ابنك زي ملايين الشهداء اللي ماتوا عشان أكبر وأعظم مبدأ في الدنيا.. مبدأ الحرية.. مش ابنك بس اللي تتحى عن الحياة في اليوم ده.. دي الأمة بحالها تحت عن الحياة في نفس اليوم

** رفعت بيكي **

المطرب سمير: "بيتسن وسط دموعه" أرجوك.. من فضلك تعتبرني ابنك من النهاردة.. ولا مينفعش أكون ابنك؟

** لحظة صمت.. تتلاقي فيها عينا المطرب بعيني رفعت.. بيتسن كل منها للآخر.. رفعت يحتضن المطرب.. الابن يحتضن والده **

الخرج حسين: "يحاول مقاومة تأثره بما يحدث مثل الجميع" إيه يا جماعة؟!! إحنا قلبناها دراما كده ليه؟!!.. بقولك إيه يا "سمير" ماتقتلنا.. أهي حاجة تفرحنا بدل الدراما اللي عايشنها دي

المطرب سمير: "يمسح دموعه" ده هيحصل لو بابا "رفعت" وافق على الكلام ده

** رفعت يمسح دموعه، ويهز رأسه علامه الموافقة **

المطرب سمير: "يجلس على القعد الوثير" بس أنا عاوز عود عشان أغتنكم ناهد: "يا بتسمامة باهته" بس كده؟!!.. ثواني وأجلبك العود

** تلتف ناهد ناحية الأبواب المغلقة لحضور العود، لكنها تتوقف فجأة..

ظهرها في مواجهة الجمهور **

الشاعرة نادية: "تتجه إلى ناھد" في إيه يا "ناھد"؟.. مالك؟!

ناھد: "تلتفت بوجهها ناحية الجمهور.. تنظر إلى الجميع بتوتر" أبداً..
أصلی اتذكرت إن العود موجود في أوضة السينما، ودي من الأبواب اللي
اتكلم عليها "جابر"

** تنتقل عدوی التوتر من ناھد إلى الجميع **

الكاتب محمود: "يحاول تغيير رفة الحديث ليتهي حالة التوتر" "سمير"
انت ممكن تقفي بدون عود.. انت تقفي وإحنا نقف معاك

** لحظة صمت.. المطرب ينظر إلى الجميع حتى يتتأكد من رغبتهم في
سماع الغناء.. رؤوس تشجعه، لكنها ثوترة في نفس الوقت **

المطرب سمير: "يغنى، والكل يصفق عدا الممثلة" إمتنى الزمان يسمح يا
جميل؟.. إمتنى الزمان يسمح يا جميل؟.. وأسهر معاك على شط النيل

** يعني الجميع وراءه نفس المقطع بشكل غير موزون **

المطرب سمير: إمتنى الزمان يسمح يا جميل؟.. "يسرد" إمتنى الزمان يسمح
يا جميل؟

** الكل يُصفق، ولكنهم يلاحظون شرود المطرب وتوقفه عن الغناء..
يتوقفون عن التصفيق، يتبدلون النظارات **

المطرب سمير: "ينظر إلى الجميع.. بتوتر" إمتنى "جابر" يسمحنا نخرج
من هنا؟

** الفلق.. الكل يتبدل النظارات.. تبتعد الممثلة عن الجميع لتجه إلى
منتصف المسرح.. تنظر إلى الأفق.. تتجمد الشخصيات.. المسرح مضاء..
الممثلة تتذكر شيئاً ما **

ص رجل: صدقيني حتى لو جبنالك "فرويد" ذات نفسه هيقف قدامك
عاجز.. عارفة ليه؟.. لأنك مش عايزة تفتحيله قلبك.. مش عايزة تفتحيله

بابك .. انتي كل اللي بتذكريه النتيجة اللي وصلت عليها حالتك .. بدون ما تهتمي بالكلام عن السبب .. أنا عارف إن الكلام صعب .. خصوصاً إن اللي حصلك مينو صفش .. لكن هتعملني إيه؟ .. فتح بابك هو الدوا بتاعك حتى لو كان طعمه مر

** ينتهي الصوت لتعود الشخصيات للحياة مرة أخرى **

الكاتب محمود: "بيأس" أنا مش شايف أي أمل

الخرج حسين: "يقطّعه" بالعكس .. لازم منيأسش .. أنا معакم إنه اختبار صعب بس منيأسش ..

الشاعرة نادية، وأنا مع "حسين" أنا شايفة ..

** نجد الجميع يستمع إلى الشاعرة، بل ويتناقشون مع بعضهم البعض دون صوت .. الممثلة شاردة.. تترك ناهد الجميع، ثم تتجه ناحية الممثلة، ثُربت عليها لثوقيتها من شرودها **

ناهد: "يا بتسامة باهتهة" اللي واخد عقلك

** تتبه الممثلة لناهد .. ناهد تنظر إلى مكان تجمع باقي الأبطال، ثم تعود بنظراتها للممثلة **

ناهد: زي ما انتي شايفة .. كإنه اجتماع الزعماء العرب .. بس معاهم حق هما عايزيين يخرجوا من هنا .. تعرفي بالرغم من اللي سببهولنا "جابر" إلا إني بشكره .. كفاية إله خلاني لليلة واحدة أقضيها مع بنى آدميين .. أتكلم معاهم .. مش مع عفش وفرش .. لكن .. لكن المشكلة إنكم هتخرجوا من هنا وهبقي لوحدي تاني

** الإشراق في عيون الممثلة **

ناهد: أنا عارفة إنكم أكيد هتلعنوا اليوم اللي جيتوا فيه هنا، وأكيد مش

هترجعوا هنا تاني

الممثلة هيا م: "تمسک بكتف ناهد" ومين قالك؟!.. مش جايز نحب نرجع
عشان نشوفك

ناهد: "بلهفة" بجد؟!

الممثلة هيا م: بجد.. بس في الأول ادعلي نطلع من هنا على خير
ناهد: يا رب يا "هيا م" .. يا رب

الشاعرة نادية: "قطع الحوار الدائر بين الممثلة وناهد" أنا مش شايقة
حل تاني

** تنتبه الممثلة لما يقال، لذا تترك ناهد، تخطو تجاه هذا التجمع **
الطرب سمير: يبقى الحل اللي قاله بابا "رفعت" هو أنساب الحلول.. يمكن
أسرارنا توصلنا للحل

الكاتب محمود: أنا برضه مش شايف أي أمل في الحل ده
** لحظة صمت **

الممثلة هيا م: "قطع لحظة الصمت" أنا شايقة أمل
** الكل يتوجه بنظراته نحو الممثلة.. نظرات عدم الفهم **
ناهد: تقصدني إيه؟

** تلتفت الممثلة لتواجه ناهد.. لحظة صمت.. تبتعد الممثلة بنظراتها عن
ناهد، تخطو عدة خطوات لتبتعد بها عن ناهد وعن باقي الأبطال **

الممثلة هيا م: "دون النظر إلى أي شخص" أنا سمعت "رفعت" وهو بيقول
إن أسرارنا ممكن توصلنا لبر الأمان
** دهشة **

الطرب سمير: لكن.. لكن انتي كنتي..

الممثلة هيا م: "تقاطع الطرب، وتنظر إليه" عارفة.. تقربياً مكنتش معакم

لاني كنت في حالة.... تقدر تقول إنها غيبة.. والحالة دي بتحصل لي لما تكون جوه أي مكان مفهول.. لكن ده معنعنيش إني أكون معاك
 ** رفعت ينهض من مكانه، ينظر إلى الممثلة، يتذكر حديثها عن الباب المغلق في الحفل**

ص الممثلة هيا، يعني.. أنا بتخنق من أي مكان مفهول حتى العربية مبسقةاش إلا لو كانت كل شبابكها مفتوحة حتى لو كنا في عز البرد
 رفعت: "بعد تذكره لحديث الممثلة، ينظر إليها" لكن ليه؟
 ** يلتفت إليه الجميع.. نظرات بها الكثير من التساؤلات.. الممثلة ترمق رفعت **

رفعت: ليه بتخافي من أي مكان مفهول؟
 ** الممثلة تنظر إلى رفعت بقلق.. رفعت يبادلها بنظرات متسائلة.. الجميع يريد أن يفهم **

الممثلة هيا، "بصوت خفيض" كلمة ليه بتتقاذ عشان يجاوب بيه عن أسئلة كتير في الكون.. لكن ليه ده حصل ومحصلش لحد تاني؟.. ولديه بقى كده؟.. دي الأسئلة اللي ملهاش اجابة

الخرج حسين: إيه اللي حصلتك؟.. وبقىتي إيه بالضبط؟
 الممثلة هيا، "تنظر إلى الخرج" عشان أجابوك لازم في الأول اعتذرلك يا "حسين"

الخرج حسين: تعذريللي؟!
 الممثلة هيا، أكيد
 ** لحظة صمت.. الكل لا يفهم شيئاً **
 الممثلة هيا، طبعاً انت عارف إن الفيلم اللي بحضره معاك دلو قتي واللي

أنا بطلته من انتاجي، لكن الحقيقة غير كده.. الحقيقة إن الفيلم ده مش من انتاجي

* لا يزال هناك عدم فهم *

الخرج حسين: "يفهم.. لا يصدق ما سمعه، لذا ينطاف أذنيه لكي يسمع بشكل أفضل" نعم؟!.. انتي قولتي ايه بالضبط؟!

الممثلة هياام: "بتوتر" اللي سمعته.. الفيلم ده مش من انتاجي
الخرج حسين: "يلدهاش" مش من انتاجك؟!.. أمال من انتاج مين
بالضبط؟!

الممثلة هياام: "بتوتر.. تردد" الفيلم ده.. الفيلم ده من انتاج
"جابر"

* الكل لا يصدق ما يسمعه.. لحظة صمت.. موسيقى صدمة *
ناهد: "بدهشة" انتي قولتي ايه؟.. "جابر"؟!
الشاعرة نادية: "جابر" يعمل كده؟!
الكاتب محمود: طب ليه؟

الممثلة هياام: "تنظر للكاتب" أنا لسه قايلة يا "محمود".." ليه دي متجموبيش على أسئلتي لإلها ببساطة مش هتقدر تجاوب عليها
الخرج حسين: "يواجه الممثلة، وفي عينيه نظرة شرسه" أمال أنهو مفتاح
يقدر يجاوب على أسئلة سعادتك؟

الكاتب محمود: "يفصل بين الخرج والممثلة" "حسين".." ميصحش كده..
اهدى

الممثلة هياام: سيبه يا "محمود".." هو له الحق يعمل أكثر من كده.. أنا
هقولك يا "حسين" ليه "جابر" عمل كده

** الكل في ترقب **

الممثلة هيا م: "تنظر اليهم، تسير ببطء، تتجه إلى الأريكة، تجلس عليها" كل اللي أعرفه يا "حسين" إن "جابر" كان كارهك جداً، لكن عمره ما قالى على السبب.. اتفق معايا إننا نلعب اللعبة دي عليك.. أنا آجي أنتج باسم "جابر" وانت تخرج.. وشوية شوية تكون انت معتمد علينا اعتماد كلي لأن العقد كان بيحدد إنك متخرجش غير فيلم واحد في السنة.. ويكون من انتاجي.. أقصد من انتاج "جابر" .. وكان الاعتماد على شركة الانتاج اللي ماسكها "جابر" من الباطن هيدمرك لإنه كان معتمد على إن محدث يتفرج على الفيلم اللي هتخرجه لأن الفيلم مكنش هيظهر للنور

الخرج حسين: "يندفع ناحية الممثلة" مش فاهم!.. تقصدي إيه؟!

الممثلة هيا م: يعني انت هتلسم نسخة الفيلم الأصلية من هنا للشركة، و"جابر" كان هيختفيها، وبعدها يقول إنه مستلمش منك حاجة، ويرفع عليك قضية، ويبوظ سمعتك كمخرج عشان مفيش أي شركة ترضى تتعامل معك بعد كده.. متنساش إن نسخة الفيلم الأصلية كان لازم تسلمها لشركة الانتاج بدون عمل أي نسخة ثانية أو حتى تحفظ بالنسخة إلا بمعرفة الشركة، وده كان بند من بنود العقد اللي انت وقعت عليه

رفعت: مش ممكن!!.. مش ممكن!!.. ده تفكير شياطين مش بني آدميين الممثلة هيا م: لا ممكن يا دكتور.. "جابر" كان مرتب كل حاجة في دماغه.. كان متتأكد إن "حسين" بعد كام فيلم هيوافق يتعاقد مع شركته الانتاجية، ويكون "جابر" هو الوحيد اللي هينتج أفلام "حسين"، وفي نفس الوقت "حسين" ه يكون ملزם يانه ميخرجش أي أفلام لشركات ثانية منافسة.. و ساعتها يلعب "جابر" لعبته ويشوه سمعة "حسين" ويضيع

مستقبله

الخرج حسين: "بعصبية.. ووحشية" طب ليه؟.. ليه؟
 ناهد: "بوحشية" مش انت كنت بتخونه !.. كنت مستني منه ايه؟!.. كان
 عندي شك انه عرف باللي بینا.. لا.. ده دلوقتي أنا اتأكدت انه عرف اللي
 بینا.. وأكيد كان ناوي يدمرنى زي ما هيدمرك

الخرج حسين: "وكانه لم يسمع ناهد.. يمسك بكتف الممثلة.. بوحشية"
 وانتي يا هانم.. اتفقتي معاه ببساطة كده؟!.. ليه؟.. فاكراني كروديا؟!..
 كنتي عايزة تدمرينى يا سافلة.. نسيتى.. قوام نسيتى ابى أنا اللي كبرتك..
 وخليتك من نجوم الصف الأول يا آنسة.. ليه تعملى فيا كده؟!.. ليه؟
 المطرب سمير: "يفصل بين الخرج والممثلة.. يمسك بالخرج" مি�صحش كده
 يا "حسين"!.. انت نسيت نفسك ولا ايه؟!

الخرج حسين: "بوحشية" لا منتشش.. انت الظاهر اللي نسيت نفسك
 ** يصفع المخرج المطرب.. صمت.. الكل لا يصدق ما يحدث.. المطرب
 يرفع وجهه بيضاء لينظر إلى المخرج بوحشية.. يتوجه رفعت، يقف في
 مواجهة المخرج **

رفعت: "بوحشية" إزاي تمد ايديك على ابني؟.. إزاي؟
 ** يقوم المطرب بابعاد رفعت، يصبح هو في مواجهة المخرج.. ودون
 سابق انذار يشتباك المطرب مع المخرج.. فتال.. يحاول الجميع فض
 الاشتباك.. الممثلة تتجه إلى المطبخ، تعود بعد لحظات وفي يدها سكين..
 تقف الممثلة في مواجهة الجميع.. في تلك اللحظة يستطيع الباقي ابعد
 المطرب والمخرج، ولكنها يحاولان العودة إلى القتال مرة أخرى **
 الممثلة هيا م: "بعصبية" لو اتخانقتم تاني هموت نفسى هنا.. وفوراً
 ** الكل ينظر إلى الممثلة بذعر عدا المخرج والمطرب.. من الواضح أن
 تهديدها قد خمد حماسهما للقتال قليلاً **

رفعت آنسة "هيايم" أرجوكي مفيش داعي لـ....

الممثلة هيايم: "تقاطعه" ومين قالك إني آنسة؟!

** صمت .. الكل لا يصدق ما قالته الممثلة .. المطرب يلتفت ناحيتها وهو لا يصدق ما يسمعه **

الطرب سمير: انتي بتقولي إيه يا "هيايم"؟!

الممثلة هيايم: "بتوتر" بجاوب على سؤال "حسين" .. أنا ليه اتفقت مع "جابر" انه يدمرك .. لأن "جابر" كان هيدمرني .. وكنت لازم أضحي ياما بنفسي ياما بيتك .. وروحى مبقتش ناقصة يحصلها أى حاجة تانية .. ملقتش غير إني أضحي بيتك

** صمت **

الممثلة هيايم: "بتوتر.. رموع" "جابر" كان عارف عنى حاجة مش من الساهم إنها تتقال .. أنا عارفة يا "حسين" إنك فاكرنى خائنة وغدارة .. لكن صدقني لو كنت مكانى .. لو كنت عشت اللي عشتته مكتنش هتقدر تستحمل تواجه بيها أى حد .. مكتنش هتقدر .. مكتنش هتقدر

** عند تلك النقطة كانت الممثلة قد انهارت، يسقط من يدها السكين، تسقط على الأرض .. تتجه إليها ناھد، تحتضنها، تتجه بها ناحية الأريكة، تجلسها، وتسارع بإحضار كوب ماء وسط ذهول الحاضرين بما فيهم المطرب والمخرج.. تحاول ناھد أن تسقى الممثلة، لكنها ترفض .. تقوم الممثلة من مجلسها **

الممثلة هيايم: "توقف .. وسط رموعها" أنا النهاردة فررت أفتح بابي أو الصندوق اللي مكتنش بحاول أقربله طول عمري .. أنا خايفه .. خايفه أفتح الصندوق تطلعلي منه أشباح الماضي تخذقني وتعذبني .. أنا مش ناقصة عذاب .. كفاية اللي أنا فيه

** الممثلة تبكي.. رفعت يتجه ناحيتها، يربت عليها، يجلسها مرة أخرى على الأريكة.. يجلس رفعت بجانبها، يمسك يدها ل يجعلها تطمئن **
رفعت: "يا بتسمة.. حنان" احكي.. احكي كل اللي جواكي.. كلنا جنبك متخفيش

** تلتفت الممثلة إلى رفعت.. تنظر إلى الأفق.. تتذكر صوًّا ما.. صوت تذكرته من قبل **

ص. امرأة قاسية: أصلك لازم تتربي

المثلة هيام: "وسط شرودها، ودموعها" بيكولوا إن الحوادث اللي بتحصلنا وإحنا صغيرين عاملة زي الخدوش اللي بتسبب أثر في نفوسنا.. ولما نكבר الخدوش دي عمرها ما تتمهي أبداً.. بيكولوا إن كل عُقدنا وإحنا كبار بدأت لما كنا أطفال صغيرين.. وعمالين يقولوا ويقولوا.. كله كلام في كلام.. بس الغريبة إني بدأت أصدق أن الكلام ده صحيح 100%.. كنت طفلة زي أي طفلة.. وزي أي طفلة ممكن أي حاجة تقع مني.. طبعاً مش فاكرة إيه اللي وقع مني بالضبط.. كل اللي فاكراه إن عمني شدتني من إيدي وبدون أي مناقشة دخلتني الأوضنة الظلمة، وقتلـت عليا الباب

** الممثلة تبكي.. تتذكر صوتا آخر تذكرته من قبل **

ص فتاة: "تبكي، وتحاول فتح أحد الأبواب" خلاص يا عمني مش هعمل
كده تانى.. خلاص يا عمني.. أرجوكي افتحي الباب .. افتحي الباب

الممثلة هيا مهاتر: "بكاء حار" كانت الأوضاع ظلمة زي الليل كان النور ذات نفسه خاف يدخلها.. قعدت أصرخ.. أصرخ.. أضرب الباب بكل اللي قدرت عليه.. ايدى.. رجلى.. أي حاجة.. وفجأة.. لقيت نفسي مشلولة.. كل شئ اتجمد.. حتى العاو اتجمد من الخوف.. بالنسبة للأطفال مفيش احساس بال الوقت.. هما سابوني هنا.. يبقى هيسبونني هنا على طول.. عشان كده

مكنتش عارفة هقدر قد ايه في الأوضة.. يوم؟.. يومين؟.. ولا سنة؟..
وفجأة تفكيري اتشل

* الممثلة تتذكر صوتاً آخر.. أصوات مختلطة بمعنى أصح تذكرتها من قبل.. صوت فتح باب.. بكاء.. وقع أقدام.. عراك.. أثنين.. أصوات غير واضحة المعالم *

الممثلة هيا้ม: "تكمـل" كان في صوت ورا الباب.. صوت غريب.. تقريراً صوت حد بيجرـي.. بيـخط حاجة.. ولا يكونـش بيـضرـب حد؟.. نـادـيت على عـمـتي.. مرـة.. اـثـنـيـن.. ثـلـاثـة.. وفـجـأـة استـقـبـلت الرـد

* الممثلة تتذكر صوتاً آخر *

صـرـحـلـ: "بـخـبـثـ، وـجـبـونـ" تـعـالـيـ يا كـتـكـوـتـةـ.. خـايـفـةـ منـيـ لـيـهـ؟ـ.. خـايـفـةـ منـ عـمـ؟ـ

الممثلة هياـمـ: "انـهـيـارـ" استـقـبـلت الرـدـ علىـ صـوتـ حدـ بيـفتحـ بـابـ الأـوضـةـ عـشـانـ تـفـتـحـ عـيـنـيـاـ عـلـىـ صـورـةـ شـخـصـ غـرـبـ عنـ الـبـيـتـ.. صـورـةـ رـاجـلـ بيـقـرـبـ منـيـ.. وـنـظـرـةـ عـيـنـيـهـ عمرـىـ ماـ هـنـسـاـهـاـ أـبـدـاـ.. كـاتـتـ نـظـرـةـ مـسـعـورـةـ.. مـسـعـورـةـ.. نـظـرـةـ خـدـرـتـنـيـ.. خـدـرـتـ كـلـ حـوـاسـ الإـذـارـ عـنـديـ

* تتذكر الممثلة صوتاً آخر.. صوت رجل في حالة نشوة، مختلطًا بصوت بكاء فتاة*

الممثلة هـيـاـمـ: "بـكـاءـ" صـحـيـتـ.. لـقـيـتـ نـفـسـيـ فـيـ المـسـتـشـفـىـ.. وـالـدـيـ جـنـبـيـ.. عـيـنـيـهـ مـلـيـانـةـ بـالـدـمـوعـ.. حـاـولـتـ أـعـرـفـ هـوـ لـيـهـ بـيـعـيـطـ.. مـرـدـشـ عـلـيـاـ، وـرـاحـ خـدـنـيـ مـنـ لـيـدـيـ.. رـجـعـتـ الـبـيـتـ مـعـاهـ عـشـانـ مـلـقـيـشـ عـمـتـيـ.. سـأـلـتـ وـالـدـيـ هـشـوـفـهـاـ تـانـيـ وـلـاـ.. رـدـ وـقـالـ إـنـهـاـ سـافـرـتـ حـتـةـ بـعـيـدةـ أـوـيـ.. حـتـةـ مـيـقـدـرـشـ أـيـ حدـ هـنـاـ يـوـصـلـهـاـ.. مـنـ يـوـمـهـاـ عـمـرـىـ مـاـ نـسـيـتـ الحـادـثـةـ دـيـ.. وـالـلـيـ فـيـ نفسـ سـنـيـ يـوـمـهـاـ يـنـسـاـهـاـ إـزـاـيـ.. الـبـنـتـ أـمـ صـفـاـيرـ وـالـلـيـ عـنـدـهـاـ 11ـ سـنـةـ

تنسهاها إزاي.. أنساها إزاي في سن خطر زي السن ده.. سن المراهقة.. سن الأمل.. بعد كده الكل عرف إنني مبستحملش يتنقل أي باب عليا.. في الفصل كنت بصرخ لو كل زميلاتي خرجوا وسابوني لوحدي.. ولما كنت بدخل الحمام كنت بخلي الباب متوارب بالرغم من إن ده ميلقش بنت محترمة، لكن فكرة الخوف من الأماكن المفولة كانت بتتحدى أي كسوف.. كنت لوحدي.. والدتي متوفية.. وعمتي.. عمتى ماتت في نفس يوم الحادثة.. الظاهر إن الرجل الغريب لقى وقت كبير أوي عشان يستمتع.. ومش كده وبس.. لا.. زي ما الغريب استمتع مع السيدة الغلبانة اللي رفضت الجواز استمتع صاحبه مع البنت اللي كانت معاها.. البنت أم ضفائر، واللي عندها 11 سنة.. البنت اللي حاولت تحدن نفسها زي ما بيحدن الفار نفسه وهو بين أنبياء القط

** الممثلة تبكي.. شرود.. بكاء.. تتذكر الماضي.. لحظة صمت.. ناهد تحضن الممثلة **

ناهد: "تقاوم دموعها" كفاية يا "هيام".." أرجوكي كفاية.. بس كفاية يا حبيبي.. كفاية

رفعت: "بصوت خفيض" أنا آسف جداً يا آنسة "هيام".." قصدي..."

الممثلة هيام: "تقاطع رفعت، وتنظر إليه بمراارة" آنسة؟!

رفعت: "يبعد بنظراته عنها.. وبصوت خفيض" صدقيني فهمت.. فهمت كل حاجة

** الممثلة تدفن وجهها في صدر ناهد.. الممثلة تبكي بحرقة.. الشاعرة تتجه إلى أحد الأركان، تخرج علبة التبغ، وتحاول اشعال سيجارة.. لكن التوتر والخوف يجعل السيجارة تسقط منها.. يقوم الكاتب بالتقاط السيجارة، يعطيها للشاعرة **

الكاتب محمود: "بتوتر" معكش سيجارة تانية؟

الشاعرة نادية: "بتوتر" أنا عارفة إنك مبتدخنش.. ده غير إن صحتك...*

* الكاتب محمود: "مقاطعاً" الظاهر إنه جه الآوان عشان أدخل

** يتبادل الكاتب والشاعرة النظرات.. توتر.. الشاعرة لا تجد مفرأً سوى أن تعطيه علبة التبغ بأكملها.. المطرب والمخرج يتجهان ناحية الممثلة.. المخرج يجلس على ركبتيه، بجانب ناهد التي تجلس على الأريكة.. المطرب يفعل مثلما فعل المخرج، بجانب رفت الجالس على الأريكة.. الممثلة لا تزال تبكي في صدر ناهد **

المخرج حسين: "يندم" أنا آسف جداً يا "هيام"

الطرب سمير: أرجوكى متعمليش في نفسك كده

الممثلة هيام: "بشرود.. بكاء حار" كنت أتمنى أصحى من النوم.. كنت طول الوقت فاكرة إني نايمه.. إني في كابوس هصحي منه على حضن أمي.. كنت حقيقي محتاجلها أوي.. أوي.. كانت كل يوم توحشني.. بس النهاردة هي وحشاتي أكثر من أي وقت فات

ناهد: "تحتضن الممثلة بقوه.. بدموع غزيرة" الوقت لسه ما فاتش يا "هيام" .. أنا أمك يا حبيبتي.. سامعة؟.. أنا أمك.. أنا صحيح مبخلش.. بس أنا عندي مشاعر أي أم تانية.. خصوصاً الأم اللي معندهاش ضنا.. متتصوريش قد إيه هي بتتعذب.. بتموت ألف مرة، ومحدش بيحس بيه غير اللي اتحرمت زيها.. "تمسك بوجه الممثلة بين كفيها" بصي في عينيا يا "هيام" هتعرفي قد إيه أنا حاسة بيكي.. والأم بس هي اللي بتحس بضناها.."تحتضن الممثلة مرة أخرى" الأم بس يا بنتي.. الأم بس

** ناهد والممثلة تبكيان.. ينضم الكاتب ومعه الشاعرة، يقفن خلف الأريكة.. الكل يحاول مقاومة تأثره **

ناهد: "وسط دموعها" أنا أمك يا "هياام" .. نامي يا حبيبتي.. نامي..
 نامي.. متخافيش من الكابوس.. الكابوس عمره ما هيرجع تاني طول ما أنا
 جنبك.. نامي يا حبيبتي.. نامي.. هوه.. هوه.. ننا.. نام.. وأدبحلك جوزين
 حمام.. هوه.. هوه.. ننا.. نام.. وأدبحلك جوزين حمام.. هوه.. هوه

** موسيقى رقيقة، تُعبر عن أغنية ناهد للممثلة.. يخفت الضوء تدريجياً
 مع الموسيقى الناعمة لنصل إلى مرحلة الإظلام التام **
 اظلام



** يضاء المسرح تدريجياً لتنبيئ ما حدث.. من الواضح أن الكل نائم عدا رفعت الجالس بعنصف المسرح، يُدخن، أمامه علبة التبغ.. الكاتب نائم على المقعد الوثير الموجود بركن المسرح، وبجواره المخرج نائم على الأرض.. الشاعرة نائمة على المقعد الوثير الموجود بركن المسرح الآخر.. الممثلة نائمة على الأريكة، وناهد نائمة وهي تجلس على الأرض، ومستندة برأسها على جائب الأريكة كأنها وسادة.. رفعت يُفكِّر في شئ ما.. يدخل المطرب من الباب الذي يدخل ويخرج منه الضيوف، يرى رفعت، فيتجه إليه، ويجلس إلى جواره.. رفعت لا ينتبه للمطرب **

المطرب سمير: "ينظر إلى رفعت" منمتش؟

رفعت: "انتبه إلى المطرب في تلك اللحظات" انت كنت بتقول حاجة يا "سمير"؟.. "تم ينتبه مرة أخرى" هو انت صحيت إمتي؟
المطرب سمير: "يارهاق" صحيت من نص ساعة ورحت الحمام ورجعت لقائك صحيت

رفعت: "يفرك عينيه.. ارهاق واضح" الحقيقة إنني منمتش أصلًا.. الواحد يجيله النوم إزاي في وضعنا ده؟!

المطرب سمير: زي اللي نايمين هو علينا دول.. إحنا برضه في نفس المركب بس نمنا

رفعت: "بسخرية" صدقـت إنهم نايمين؟!.. لو حد فينا نام يبقى أكيد نائم بنص عين ونص قلب.. بنص قلب بسبب التوتر والخوف من الثاني، وبنص عين لأن الوضع قالق الكل لـنه محصلش لحد قبل كده

المطرب سمير: "بصوت خفيض" هو ده السبب اللي خلاك تقول "الناهد" و "نادية" و "هيام" إنهم يناموا هنا

رفعت: "يطلق تنهيدة حارة" أكيد.. مينفعش أخلي "هيام" تنام لوحدها

لأنك عارف السبب كويس.. وكمان مينفعش أخلي واحدة ست وضرتها
يناموا مع بعض لوحدهم.. كفاية اللي إحنا فيه.. مش عايزين الليلة تقلب
ليلة دم

المطرب سمير: للدرجة دي؟!

رفعت: وأكتر.. السست على قد ما تحب على قد ما تكره.. و "ناهد" كانت
كارهة "جابر" لأنها حاسة إنه بيضحي وإنه مخليةها على ذمته كنوع من
الشفقة.. لكن كلنا اكتشفنا إنه اتجوز.. وانقلب الشفقة لخيانة.. ودي أكتر
حاجة بتكررها السست في أي راجل

المطرب سمير: بس أنا شايف إن العلاقة بدأت بينهم تتحسن

رفعت: ولو.. ساعتها هتجمعهم أربع حيطان هينسوا صداقتهم.. وكل اللي
هيفتكروه بس إنهم اثنين ستات بيتخانقوا على راجل واحد.. وساعتها تقوم
الحرب العالمية الثالثة

المطرب سمير: معقوله !!

رفعت: مش بقولك الكل نايم بنص عين ونص قلب.. الإحساس بالأمان
مهم جداً عشان الواحد ينام

المطرب سمير: "يأخذ علبة التبغ الخاصة برفعت" أنت صحيح مقولتش
كنت بتفكر في إيه؟

رفعت: واحد زبى في الوضع ده هيفكر في إيه؟!

المطرب سمير: "بعد أن أشعل سيجارة" فكرت هنخرج من هنا إزاى?
رفعت: الحقيقة مبقتش عارف.. "يطلق تنمية حارة" مبقتش عارف
"جابر" عاوز يوصل لإيه

** لحظة صمت.. المطرب ينظر إلى الأفق **

الطرب سمير: يعني.. بشرود"

خايف من الدنيا أحسن تقدر و تسيبني وحيد
 و ساعتها أنا هضعف مش هقدر غير أبقى بعيد
 ده أنا كل ما أحاول أتغير.. الأقيني أتمنى أبقى صغير
 وأبعد عن كل اللي باعوني.. و الدنيا بتؤمر مش بتخير
 جربت أسلais و أداري.. كل اللي في قلبي المتداري
 و أرسم على وشي أجمل بسمة.. و أسيب الجرح يقيد ناري
 و الناس حواليا دي ديابة.. مافيهاش دنيا للي غلابة
 و أنا لازم اكون زي الباقيين.. أحسن ما أموت وسط دي غابة
 ** رفعت ينظر إلى المطرب.. لا يدرى ماذا يقول **

الطرب سمير: بشرود "تعرف.. أول ما سمعت الأغنية دي.. مكنتش
 فاهمها.. مكنتش عايز أفهمها.. يعني مين اللي هيقدر يقدر بيا ويسيني
 وحيد هنا؟!.. هنا.. أنا مليش حد هنا.. كل اللي أعرفهم يا شعراً.. يا
 معجبين.. معجبات.. مفيش حد كان بيسألني عن "سمير القرموطي" .. الكل
 كان بيسألني عن "سمير الصياد" .. كنت في أوقات كثير بتمنى حد يتكلم
 معايا وينسى أنا مين.. وفي اللحظات دي بالذات كنت بتذكر أمي.. حتى أبويا
 اللي كنت كارهه.. أهلى.. دول اللي كانوا هيلكمونى بدون ذواق.. بس كنت
 بضغط على نفسي عشان أنساهم وأركز في الشغل أكثر وأكثر.. وأكبر أكثر
 وأكثر.. لكن.. اللي عمله" جابر "النهاردة فوقى.. قلت لو كان أهلى
 موجودين هنا.. مش كانوا هيلقيوا الدنيا عشان يلاقونى.. وكنت خرجت
 وارتخت

** رفعت ينظر إلى المطرب.. لحظة صمت **

الطرب سمير: ينظر إلى الأفق.. بشرود "تفكر إحنا هنخرج من هنا زي ما دخلنا؟"

* رفعت: "ينظر إلى الأفق بدوره" لو تعرف اللي جوايا ناحيتك مكتش غنيت الأغنية دي

** ينظر المطرب إلى رفعت.. رفعت ينظر إليه.. دموع المطرب هي التي تتحدث.. المطرب يجد نفسه مندفعاً ليحتضن رفعت **

الطرب: "يبكي بحرارة" أنا محتاجك أوي

** رفعت يُحاول مقاومة دموعه.. يُبعد المطرب عنه، يمسح بيده دموع المطرب في رقة **

رفعت: إياك تقول الكلام ده ثاني.. أنت فاهم

** المطرب يهز رأسه ببطء.. يبتعد رفعت بوجهه عن المطرب حتى لا يرى أي أثر لدموعه.. المطرب يمسح وجهه بقوة من أثر البكاء.. لحظة صمت **

رفعت: تعرف بالرغم من كل الساعات اللي عدت علينا إلا إن في جملة قالتها "ناهد" لسه فاكرها لغاية دلو قتي

** تستيقظ الممثلة، تتبه لما يقوله رفعت.. رفعت والمطرب لا ينتبهان لها **

رفعت: ناهد قالت إن ما دام "جابر" كان بيهم بحكايات هایفة زي حكاياتك أنت والملحن "عزت عبد الحميد" يبقى دي ثعتبر من نقط ضعفه.. وما دام هو بيهم بأسرارنا يبقى بيهم نقط ضعفنا لأن عمرك ما هتلافي حد بيختبي سر إلا وبيختبي حاجة مُخجلة عن نفسه.. وما دمنا بنتكلم عن نقط ضعف "جابر" يبقى لازم نتكلم عن نقط ضعفنا.. يعني لو غيرنا صيغة السؤال من إيه السر اللي يوصلنا للحل الصحيح؟ لإيه النقص اللي عند

"جابر"؟.. ممكن ساعتها نوصل للحل
المطرب سمير: وإيه الفرق؟

رفعت: في فرق كبير.. السؤال الأول إحنا بنتكلم فيه عن نفسنا عشان
نوصل للحل.. أما الثاني فبنتكلم عن "جابر" اللي هيوصلنا للحل
** لحظة صمت **

رفعت: "يتنهد" أنا مش هاممني السؤال.. أنا اللي هاممني بجد إزاي
نخرج من هنا، لكن للأسف "جابر" حاطط الأسئلة اجباري، وحاطط
الإختيارات كمان اجباري، إحنا مقدمناش غير إننا نكتب الحل في ورقة
الإجابة

المطرب سمير: بس الحمد لله إنه سبلنا الوقت مفتوح
رفعت: حتى في دي ما أضمنش "جابر" .. إيه اللي أكداك إن الوقت
مفتوح؟.. إزاي نثق في راجل ضحك على مراته وخلالها جوه لعبة سخيفة
خطيرة محدثش عارف آخرتها إيه
المطرب سمير: "بصوت خفيض" بس متنساش إنها ضحكت عليه برضه
بدليل خيانتها مع "حسين"

رفعت: ولو.. كان ممكن يموتها ويموت "حسين" معاها، لكن إنه يدخل
ناس ثانية في اللعبة ملهمش أي ذنب.. بيبقى هو عمل إيه غير إنه حب
يتسلل على حسابنا وعلى حساب اللي خاتوه

المطرب سمير: "يطلق تنهيدة حارة" والحل؟
رفعت: "يتنهد هو الآخر" مبقتش عارف.. أديني بفكر وأسائل نفسي.. فين
القص اللي عند "جابر"؟.. إيه المفترض نكمله ونقدر من خلاله نوصل
الحل؟.. مبقتش عارف أفك.. مبقتش عارف أي حاجة

الممثلة هيا مصطفى: "تقاطع رفعت" أنا عارفة إيه القص اللي عند "جابر"

** يُفاجئ المطرب ورفعت بما قالته الممثلة .. ينظر كل منها إلى الآخر، وسرعان ما يتجهان ليجلسا بجانب الممثلة .. تستيقظ ناهد **

ناهد: "تفرك عينيها" هو في إيه بالضبط؟

رفعت: "بلهفة .. إلى الممثلة" إيه هو؟ .. أرجوكي اتكلمي

** تستيقظ الشاعرة **

الممثلة هيام: "بتردد، وتنظر إلى رفعت" النقص اللي عند "جابر" ...

** يستيقظ الجميع .. الكاتب هو الوحيد الجالس على المقعد الوثير، ومن الواضح أنه متعب للغاية **

الممثلة هيام: النقص اللي كان عنده.. النقص في الإنقاذ

** صمت .. الكل لا يفهم **

الممثلة: "بتوتر" "جابر" لسه منتقمش مننا

الطرب سمير: قصدك إيه؟

ناهد: "بشروع" أنا أقولك قصدها إيه

** النظارات تتجه لناهد .. ناهد تنھض، تتجه إلى منتصف المسرح .. ناهد تفكّر بعمق **

ناهد: "بتوتر" متھيألي عرفت أوصل للحل، لكنه مخيف .. مخيف

** يقف الجميع، يتداولون النظارات، وسرعان ما يلتلون حولها عدا الكاتب **

الطرب سمير: اتكلمي يا "ناهد" .. اتكلمي.. أهو حل بدل اللي إحنا فيه ده

ناهد: "تنظر للوجوه المختلفة حولها .. لحظة صمت" "جابر" معندهوش أي نقص في حياته .. بالنسبة لحكاية "هيام" دي متهموش لأن طفولته كانت سعيدة بعكس "هيام" .. الجواز قدر يأخذ كفايته منه، وكمله بجوازه من

"نادية" .. يمكن عشان كان عايز ينتقم مني بجواز أحسن صديقة عندي .. زي ما خنته مع صديق ليه .. أو اللي كان متصروره صاحبه .. كان عنده فلوس كتيرة أو ي .. والهيلمان .. والبرستيج .. والشهرة .. والحساب والنسب .. باختصار كانت حياته Perfect .. حياته كاملة .. مفيهاش أي خلل .. مفيهاش أي نقص

الشاعرة نادية: أمال النقص فين؟

ناهد: "بشير و" النقص كان عنده بعد كده .. إحنا اتكلمنا عن حياته، لكن متكلمناش عن مماته .. كانت عنده أمنية .. قالها في الشريط .. الأمنية دي هتخلي مماته perfect زي حياته بالضبط .. مفيهاش أي نقص .. الأمنية دي هي الإنتقام مننا رفعت: إزاى؟

ناهد: "حسين" استندل عشان لقى نفسه محبوس ومزنوق فقال أطلع سر "محمود" يمكن يكون هو ده الحل ونخرج من هنا .. النتيجة كره "محمود" "الحسين" ويكون مستعد لعمل أي شئ معاه عشان ميطلعيش السر ده لناس ثانيين .. حتى لو الأمور وصلت للقتل

* ينظر الجميع إلى ناهد.. دهشة.. عدم تصديق *

ناهد: "تكمـل" أنا عرفت إن "نادية" الزوجة الثانية "جابـر" .. فممـكن انتقم منها أو حتى أقتـلها عشـان متورـش معاـيا في "جابـر" .. "هـيـام" قـالت على حـكاـية حـصلـتها وـهي صـغـيرـة عـشـان نـفـسيـتها تـدـمـر .. باختـصار "جابـر" كان هـيـنتـقم منـنا بـطـرـيقـة مـبـكـرـة .. هـيـخـلي كلـ واحدـ منـ السـبـعـة يـخلـصـ على الثـانـي .. هـيـخـلي كلـ واحدـ يـدـمـر نـفـسـه بـنـفـسـه .. الـتـعـلـيمـات اللي قـالـها "جابـر" مـكـنـتش تعـلـيمـات لـخـروـجـنا مـنـ هـنـا دـي كـانـت تعـلـيمـات لـقـتـل بـعـضـنـا .. تعـلـيمـات للـإـعـادـاـم .. وبـكـده "جابـر" هـيـقدـر يـكـمل الـPuzzle .. هـيـقدـر يـكـمل اللـعـبـة ..

لعبة الأخيرة

** يشيق الجميع.. الكل يتداول النظارات.. لا أحد يعرف ما ينبغي فعله **
 ناهد: "بصوت كالفحيج" انتقام "جابر" ملوش حدود.. انتقام كامل..
 "جابر" قدر يحقق اللي محققوش أكبر مجرم في العالم.. قدر يحقق
 الجريمة الكاملة

الطرب سمير: "يُفَكِّر" بس الانتقام ده مكنش قاصدي ولا قاصد "رفعت"
 ولا " محمود" ولا "هيايم"

ناهد: "تنظر للمطرب" الانتقام فعلاً مكنش يقصدك انت.. ده كان يقصدني
 ويقصد "حسين" و "نادية" .. هو قالها.. قال إن عمره ما كره "رفعت"
 هو بس مكنش طايقه.. ويمكن يكون شعوره من ناحيتك هو نفس شعوره
 ناحية "رفعت" .. بمعنى واحد زيكم وزى "رفعت" و " محمود" و "هيايم"
 مجرد كومبارس يكمل بيهم عدد الحفلة والسلام.. ميهموش بقى إذا كنتم
 هتتخذوا في الرجلين ولا لا.. المهم إنه حق انتقامه من ناس معينين..
 ومش مهم بقى مين بقية الصحايا

** لحظة صمت.. الكل مُندَهش مما يُقال **

رفعت: "بنهول" طب والحل؟.. والكلام اللي قاله "جابر" اللي معن
 يوصلنا لحل نخرج بيها من الأزمة؟.. كل ده كان إيه؟.. كذب؟!.. وإحنا
 إيه؟.. كومبارس؟!.. كومبارس يموتوا عشان "جابر" يتسلى؟!

ناهد: هو ده اللي وصلتلها يا "رفعت" .. أنا مش عارفة نعمل إيه غير إننا
 نخرج من هنا.. نجرب نختار أي باب وإحنا وحظنا

رفعت: "بتزد.. ينظر لناهد" ممكن.. جايز.. جايز كلامك مش صحيح يا
 "ناهد"

المخرج حسين: "بحزم" صدق "ناهد" يا "رفعت" .. هي تعرف "جابر"

أكثر مني ومنك ومن اللي موجودين هنا.. أنا اتعلمت حاجات كتير في الدنيا.. اتعلمت إن كتر المعرفة بتولد الكراهية.. ده شئ معروف.. أبوابنا كلها افتحت على بعض.. كانت النتيجة إيه؟.. كره ليا.. احتقار "المحمود".. غيبة "الهيايم".. عداوة بين "نادية" و "ناهد".. بياختصار موت وخراب ديار.. بقينا عايشين في خوف.. خوف من إننا نفتح الباب.. ومش هنكسر الخوف ده بغير الخروج من هنا
الشاعرة نادية، طب إحنا ممكن نقعد هنا ونستنى... .

الممثلة هيام: "تقاطع الشاعرة.. توتر" إحنا لسه هنسنن؟!.. أنا مبقتش قادرة أستحمل أكثر من كده.. أنا مش هعيش طول عمرى مستتبة الفرج من براء.. إحنا لازم نخرج.. لازم نهرب.. نهرب من المدبح اللي عملناه.. إحنا شقيننا صدور بعض وخرجنا اللي جواه.. كفاية كده.. كفاية كده ونمسي بقى.. نمشي

** لحظة صمت.. الكل ينتبه إلى رفعت الجالس على المقعد الوثير بأحد أركان المسرح **

رفعت: "بنهول" مش ممكن اللي أنا بسمعه ده.. مش ممكن ناهد: "تقرب من رفعت، تجلس بجانبها" أرجوك يا "رفعت".." أرجوك نخرج من هنا.. كفاية اللي حصل.. كفاية

رفعت: "ينظر إلى ناهد، يبتعد بنظراته عنها.. يشروع" مش عارف.. أنا خايف.. خايف.. اختيار واحد وغلطة واحدة توصلنا للموت ناهد: ويمكن اختيار واحد وحل واحد يوصلنا لبر الأمان

رفعت: "يشروع" المشكلة في الحل.. الحل فين؟.. الحل في أي باب؟.. في أي باب؟

** فجأة يسمع الجميع صوت جسم ثقيل يسقط خلف أحد الأبواب الثلاثة..

لحظة صمت.. الكل يتبادل النظرات.. من الواضح أن الخوف هو سيد الموقف **

* ناهد: "بحذر" الصوت ده جاي من أوضة المكتب.. يبقى أكيد في حد هنا المثلة هياام: "بتسرع" يبقى تعلوا نشوف إيه اللي ورا الباب ده رفعت: "يستوقف الشاهرة" أرجوكى بلاش التسرع ده.. إحنا لازم نفكر بهدوء.. ليه ده ميكونش كمين.. نسمع الصوت ده والكل يجري يدخل الأوضة و... ..

** الكل يتبادل النظرات.. خوف.. الكل يحاول تصور الكارثة.. الممثلة تنكمش أكثر على نفسها **

الشاعرة نادية: أنا خايفه

الخرج حسين: "بنفاذ صير" الحكاية طولت أووي، ولازم يكون في نهاية..
لازم كلنا نخرج من هنا

رفعت: "للمخرج" يبقى لازم نفكر بهدوء عشان نقدر... .
الخرج حسين: "مقاطعاً" الباب اللي اختاره هو باب السينما لأن معظمنا هنا فنانين ولهم علاقة بفن السينما.. يبقى أكيد هو عاوز يقول إن الفن هو خلاصنا الوحيد لأنه هو قارب النجاة اللي هيوصل بينا لبر الأمان
ناهد: وليه ميكونش العكس؟

** الكل ينظر لناهد **

ناهد: "تكميل" "جابر" كان دائمًا بيترأ عليكم وببيكره افتعالكم وجشعكم للفلوس والشهرة.. تنظر للمخرج.. بكل حقد" زي ما أنا بكرهكم دلوقتي، وأكيد هو حط حاجة في الأوضة دي بالذات عشان يخلص علينا * تتلاقى العينان.. عينا ناهد في مواجهة عيني المخرج **

رفعت: أفتكر إن ده كلام معقول.. وما دام الرجال مثقف بيقى أكيد هنختار
باب أووضة المكتب

ناهد: "تتجه إلى رفعت" انت برضه مش فاهمني.. أنا بختار باب أووضة
السفرة.. مادام هو فاكر إنه شهيد الحياة الزوجية بيقى أكيد عايزة يقول إن
خلاصنا الوحيدة موجود جوة الباب اللي بيضمن حياة منزلية سعيدة

الشاعرة نادية: أنا بضم صوتي لصوت "رفعت".."الدكتور جابر"
مثقف وعالِم وأكيد إن أووضة المكتب مقدسة بالنسبة له
الطرب سمير: أنا شايف...
ناهد: "تقاطعه، وكأنها تذكرت شيئاً" استتوا.. رقم سبعة.. الرقم اللي
بيتفاينل بييه "جابر".."تفكير" بباب السينما فيه سبع كراسى.. أنا فاكرة إني
مرة دخلت على "جابر" وهو بيترج على فيلم من الأفلام، وفي يومها
سألته أشمعنى فيه سبع كراسى في الأووضة دي؟.. ليه ميكونوش ستة أو
ثمانية؟.. قالى إن رقم سبعة مهم جداً في حياته

رفعت: وده معناه إيه؟.. ندخل ولا لا؟

ناهد: ودي عايزة سؤال.. هو بيتفاينل بالرقم سبعة.. بيقى ندخل طبعاً
رفعت: بالعكس.. الأووضة فيها سبع كراسى، بيقى في احتمال إن نهايتها
في الأووضة دي لأن عدتنا سبعة

الشاعرة نادية: أنا لسه عند رأيي.. باب أووضة المكتب هو الحل.. أنا مرة
دخلت لمكتب "جابر" ولقيته محتفظ بكتاب اسمه "أعمدة الحكم السبعة"
للمغامر الشهير "لورانس".." دي رسالة واضحة جداً.. الحل في أووضة
المكتب

ناهد: "بسخريـة، وخضـب" ويـاتـرى مـعـذـتـيش عـلـى أوـضـةـ النـومـ فـيـ سـكـتكـ؟

* * الشاعرة ثرمق ناهد بنظرية نارية *

الخرج حسين: طب ولية ميكونش قصده فيلم "لورانس العرب"؟.. أنا عارف إن المُغامر "لورانس" له لقب مشهور بيه جدًا هو "لورانس العرب".

الطرب سمير: "بنفاذ صبر" أنا شايف إن الموضوع أتفه من كل ده.. إحنا سمعنا الصوت الغريب ده منين؟

ناهد: من أووضة المكتب

الطرب سمير: ببقى هي دي الأووضة اللي لازم ندخلها
** لحظة صمت.. الكل يتتبادل النظرات **

الكاتب محمود: "يقف.. يقاطع الصمت.. بصوت متعبع" وبضحكة ساخرة "بتفكروا مين اللي هيفتح الباب الأول؟.. مش كده؟"

** سرعان ما يجلس الكاتب على المقعد الوثير مرة أخرى من كثرة التعب.. الكل يُسارع للإلتلاف حوله **

الخرج حسين: "بقلق" مالك يا "محمود"؟

الكاتب محمود: "بضحكة ساخرة.. ارهاق" هيكون مالي يعني يا حمار؟.. أنا بس قربت أموت

** الكل يتتبادل النظرات.. قلق.. توتر **

رفعت: "يحاول أن يفحص الكاتب" اهدى بس يا "محمود".." خليني أشوف مالك

الكاتب محمود: "يبعد يد رفعت عنه.. بنفاذ صبر.. من الواضح أنه متعبع للغاية" يووه.. هو انت ما صدقـت.. "بسخرية" تلاقيك بتقول في سرك أهو كويـس إن الحفلة جـت بـفائـدة.. جـت بـزـبـونـ مـيت

** قلق.. توتر **

الكاتب محمود: "يُكمل.. ابتسامة" بس هحاول أخرج من هنا برضه.. أنا مش عايز تكون الفيللا دي قبرى.. أنا مش عايز غير قبر برة المكان الكتيب
٥

** لحظة صمت **

رفعت: "بحزم" وأنا هحققلك أمنيتك دي يا "محمود".." ينظر إلى الجميع" أنا أول واحد هيفتح الباب.. على الأقل هحاول أخرج "محمود" من هنا

** لحظة صمت **

الطرب سمير: "يوجه كلامه لرفعت" أرجوك ..

رفعت: "يقطّعه، ينظر للمطرب" أرجوك يا "سمير".." متحاولش تخليني أتخلى عن قراري.. أنا.. ..

الطرب سمير: "يقطّعه" أنا جاي معاك

** لحظة صمت **

رفعت: انت هتبقى هنا عشان

الطرب سمير: "يقطّعه مرة أخرى" أنا مش عايز أخسر أبويا ثانى

** لحظة صمت.. التأثر على وجه المطرب **

رفعت: وأنا مش عايز أخسر ابنى ثانى

** لحظة صمت.. التأثر على وجه رفعت **

الطرب سمير: "دموع" يبقى لازم تكون مع ابنك عشان تحميه.." لحظة صمت" مش كده برضه؟

** دموع رفعت هي التي تتحدث **

** جميع العيون تلتفت إلى المخرج.. رفعت يمسح دموعه وكذلك المطرب.. رفعت والمطرب ينظران إلى المخرج.. لحظة صمت.. المخرج ينظر إليهم، ثم ينظر إلى الكاتب، ثم إليهم مرة أخرى **
الخرج حسين: ده عشان.. عشان..

الكاتب محمود: "يُقاطعه.. ابتسامة.. ارهاق" عشان ييجي منك ** المخرج ينظر إلى الكاتب.. نظرة فرق الصديق على صديقه.. المخرج بيتسنم بهدوء بدوره **

الشاعرة نادية: وأنا برضه هاجى معاكم

** الكل ينظر إلى الشاعرة متسائلاً عن سر موقفها *

الشاعرة نادية: إحنا عشنا هنا مع بعض ساعات كتير وبقى مصيرنا واحد، وما دمنا عشنا مع بعض يبقى هنموت أو هنكمي حياتنا مع بعض
برضه

** لحظة صمت *

الممثلة هيا م: وأنا كمان معاكم

** التساؤل في عيون الجميع *

الممثلة هيا م: "بخجل" أنا بس مخنوقة، ومش قادرة أستحمل أكثر من
كده.. ونفسى.. نفسى أخرج من هنا

** الكل يتطلع إلى الممثلة.. اشفاق.. تتوجه النظرات لناهد *

ناهد: دي فيلاتي.. وأنا ممكن أقعد فيها.. لكن البيت مش مجرد حيطان
وطوب.. البيت ده ذكريات.. وذكرياتي مع البيت ده هتخنقني عشان كده
هطلع من هنا

الخرج حسين: "يتقدم ناحية ناهد" أنا آسف يا "ناهد"

** لحظة صمت.. ناهد تنظر إلى المخرج **

المخرج حسين: "بتتأثر" آسف على كل الألم اللي سببتهولك.. أنا مش عارف إذا كنا هنخرج ولا هنموت هنا بس في الحالتين أنا بعرض عليكي الجواز

** لحظة صمت **

ناهد: "بتتأثر" أنا مفكريش أخرج من هنا عشان الموضوع ده يا "حسين" .. لو انت كنت غلطان قيراط أنا غلطانة عشرة.." تتجه ناحية الممثلة، تحضنها" أنا مفكريش أخرج من هنا غير عشان بنتي ** الممثلة تنظر إلى عيني ناهد.. الأم وابنتها.. الممثلة لا تشعر بنفسها إلا وهي تحضن ناهد **

الشاعرة نادية: "بتتأثر" ونبيتي صاحبتك؟!

ناهد: "تنظر إلى الشاعرة.. ترك الممثلة.. توجه كلامها إلى الشاعرة بتتأثر" أنا عمري ما نستها.. أنا بس اللي خايفة تكون نبيتي ** لحظة صمت **

الشاعرة نادية: "بتتأثر" أنا آسفة يا "ناهد"

ناهد: "بتتأثر واضح" أنا مش زعلانة منك عشان "جابر" .. كفاية إننا ضحيتين لراجل واحد.." بيا تسامة.. دموع" متهدلاني ده كفاية أو ي

** الكل يتتبادل نظارات.. التأثر لوحه مرسومة بدقة على وجوهم **

الكاتب: "توجه كلامه للمخرج" وبكله اتحرر أصحاب الأرض يا "حسين"

** المخرج يبتسم هو الآخر **

** الكل ينظر إلى رفعت.. لحظة صمت.. العيون بها تصميم على الخروج من الفيلا.. رفعت يتجه إلى غرفة المكتب ببطء وهدوء.. الكاتب يستند على رفعت والمخرج.. المطرب بجوار رفعت.. ناهد والشاعرة والممثلة متحاورين خلف تلك المجموعة.. يمسك رفعت بمقبض الباب.. يهم بفتحه.. فجأة يسمع صوت وقع أقدام تقترب.. الكل يبتعد في رعب وعدم نظام لدرجة أن الكاتب يسقط على الأرض لتقع معه على الأرض.. الكل خائف **

الممثلة: "بخوف" مين هنا؟

الخرج حسين: "يقترب من الكاتب" انت كويس يا "محمود"؟

** الكاتب يهز رأسه في تعب.. هناك وقع أقدام يأتي من الدور الأرضي للفيلا.. صوت وقع الأقدام يقترب أكثر فأكثر.. شئ ما.. شخص ما قادم.. لا أحد يدرى **

الخرج حسين: "بتتوتر" افتح الباب يا "رفعت" .. افتحه

رفعت: "ينظر إلى الخارج" الظاهر مفيش فعلاً حل غير كده

** الكل يتجمع مرة أخرى للدخول إلى غرفة المكتب.. ناهد تقف بخوف، ثرّهف السمع لصوت وقع الأقدام**

الممثلة هيا: "تلاحظ حالة ناهد.. بخوف" مالك؟

ناهد: "بنذر" دي أصوات ناس جايin لهنا.. ناس معرفهمش

** لحظة صمت.. الكل يلتفت لناهد.. الكل لا يفهم **

ناهد: "تنظر إلى الجميع" إحنا مسألناش نفسنا مين اللي قطع النور أول مرة؟

** لحظة صمت **

ناهد: "بنذر" الناس اللي جايin دول دخلوا إزاي؟.. أكيد في حد فتح لهم

من برة أو ادله المفتاح

* لحظة صمت *

ناهد: لو غيرنا السؤال من ايه اللي وقع ورا الباب؟ لمين اللي وقع حاجة ورا الباب؟.. متھيالي نقدر نوصل لإجابة

رفعت: "بتوتر" انتي عايزة توصللي لإيه يا "ناهد"؟

ناهد: "وكانها لم تسمع رفعت" الواحد لو عايزة يخلி انتقامه Perfect يبقى لازم يتتأكد من إن انتقامه اتنفذ فعلاً

الخرج حسين: "بهلخ" قصدك إيه؟

* لحظة صمت *

ناهد: "ترتجف" يعني "جابر" عشان يتتأكد من إن انتقامه اتنفذ.. يبقى مستحيل يكون مسافر

* لحظة صمت.. وقع الأقدام يقترب أكثر فأكثر *

ناهد: أكيد "جابر" ...

جابر: "يقطّع ناھد، يخرج من أحد الأبواب الثلاثة" موجود هنا

* الكل يتجمد من الرعب *

جابر: "يكمّل" ومش أنا وبس

* الكل خائف.. الكل يتراجع ببطء *

جابر: "بوحشية" أنا كمان معايا فرقـة اغـتـيـالـات

* تظـهـرـ مـجـمـوعـةـ مـلـثـمـةـ عـلـىـ المـسـرـحـ لـتـحـيـطـ بـالـأـبـطـالـ *

جابر: "بصـوتـ كـالـفـحـيجـ" الحـفلـةـ هـتـبـداـ دـلـوقـتـيـ

* يتـراجـعـ الجـمـيعـ عـدـاـ نـاـھـدـ الـتـيـ تـحـاـولـ الوـصـولـ إـلـىـ أـيـ بـابـ لـتـفـتـحـهـ ..

* لكنـ يـدـ جـابرـ كـانـتـ الأـسـيقـ *

جابر: "يمساك بـشعر ناـهد بـقسوة" هتروـحـي فيـن ياـ حـلـوة؟
 ** نـاـهـد تـنـفـض.. تـبـكـي.. الرـجـال المـلـمـون يـتـقـدـمـون لـيـحـيـطـوا بـالـأـطـال..
 لكن جابر أشار بيـدـه لـيـتـوـقـفـ هـوـلـاء **

جابر: "لا يـزـال يـمـسـكـ بـشـعـرـ نـاـهـدـ" إـيـهـ ياـ شـبـابـ؟!.. اـنـتـ تـحـاـصـرـواـ الـبـاقـيـ
 آـهـ" يـتـقـدـمـ ثـلـاثـةـ مـلـمـينـ لـمـيقـفـواـ أـمـامـ الـأـبـوـابـ الـثـلـاثـةـ" لـكـنـ العـمـيلـ بـتـاعـيـ لـ
 الـطـرـبـ سـمـيرـ" بـصـوتـ خـفـيـضـ" عـمـيلـ؟!"

** جابر يـلـقـيـ بـناـهـدـ إـلـىـ رـكـنـ الـمـسـرـحـ معـ باـقـيـ الـأـبـطـالـ لـتـسـتـقـبـلـهاـ
 الشـاعـرـةـ بـأـحـضـانـهاـ.. الـإـنـتـنـانـ تـبـكـيـانـ.. جـابـرـ يـنـفـضـ يـدـهـ **

جابر: "بـكـلـ هـدـوـءـ" اـنـتـ مـقـاتـلـهـمـشـ يـاـ"رـفـعـتـ" وـلـاـ إـيـهـ؟"
 ** لـحظـةـ صـمتـ.. الـجـمـيعـ يـبـتـعـدـ عنـ رـفـعـتـ.. الـكـلـ يـنـظـرـ إـلـىـ رـفـعـتـ، بـيـنـماـ
 رـفـعـتـ يـنـظـرـ إـلـىـ جـابـرـ.. رـفـعـتـ يـتـقـدـمـ بـبـطـءـ تـجـاهـ جـابـرـ **

رفـعـتـ: قـولـتـهـمـ عـلـىـ إـيـهـ؟!
 ** يـضـحـكـ جـابـرـ فـجـأـةـ **

رفـعـتـ: بـخـضـبـ" أـنـاـ مشـ عـمـيلـ لـحدـ
 ** يـتـوـقـفـ جـابـرـ عـنـ الضـحـكـ **

جابـرـ: يـتـكـلـمـ بـهـدـوـءـ.. يـلـوـرـ حـولـ رـفـعـتـ الـوـاقـفـ بـمـنـتـصـفـ الـسـرـحـ" وـمـينـ
 قـالـ إـنـكـ عـمـيلـ؟!.. اـنـتـ مشـ عـمـيلـ.. اـنـتـ قـرـيـنـ
 رـفـعـتـ: قـرـيـنـ؟!

جابـرـ: لا يـزـالـ يـلـوـرـ حـولـ رـفـعـتـ" النـاسـ بـرـضـهـ بـتـقـولـ عـلـىـ الشـيـطـانـ
 قـرـيـنـ.. الشـيـطـانـ قـرـيـنـ فـعـلـاـ.. قـرـيـنـ خـبـيـثـ.. وـأـنـاـ بـرـضـهـ قـرـيـنـ خـبـيـثـ بـسـ
 جـوـاـكـ

رفـعـتـ: قـرـيـنـ؟!.. جـوـاـيـاـ؟!

جابر: زى ما انت قرين جوايا

الطرب سمير: "يتقدم، يقاطع جابر" انت عايز توصل لإيه بالضبط؟

* * يتوقف جابر عن الدوران حول رفعت **

جابر: "يتقدم ببطء تجاه المطرب.. عيناه في مواجهة عيني المطرب " يهمك تعرف فعلاً؟

الطرب سمير: انت عايز توصل لإيه بالضبط؟

* * تلاقى العينان.. يلتفت جابر برأسه لينظر إلى رفعت، ثم يعاود النظر إلى المطرب، ثم يبتعد عنهما ليخطو بخطوات بطينة يصل بها إلى الركن الآخر من المسرح بعيداً عن باقي الأبطال الموجودين في ركن المسرح الآخر منذ البداية.. المطرب ورفعت ثابتان في مكانهما **

جابر: "ينظر إلى الجمهور، والأبطال ينظرون إليه بدورهم" حقيقي عايز تعرف يا "سمير"؟.. "لحظة صمت".." عشان تعرف يبقى لازم ترجع فلاش باك.. ترجع للعبة من بدايتها
** لحظة صمت **

جابر: "فجأة، وبدون مقدمات" تقدر تقولي مين أول واحد نصحكم إنكم تفتحوا أبوابكم على بعضها؟

* * لحظة صمت.. عباره جابر أضاءت شيئاً ما في عقل المطرب.. ينظر المطرب إلى رفعت، ثم ينظر إلى ناهد ليجدها هي الأخرى تتذكر شيئاً مثله.. ينظر الإثنان إلى رفعت، يتذكراً صوتاً ما **

صرفت: "جابر" يقصد إيه بالجملة دي؟.. هو "جابر" يقصد إن ده هو الحل لخروجنا من هنا؟.. مبقتش عارف.. مبقتش عارف دماغي هتوصلنا لفين

* * رفعت وكأنه تذكر الشئ نفسه.. يستدير لمواجهة رفaque **

جابر: "يوجه حديثه للمطرب" تقدر تقولي مين أول واحد نصحك إنك تتكلم؟.. تفتح باب جواك حاولت انت دائمًا تعمل نفسك مش واخذ بالك منه
* * المطرب يقترب من رفعت *

المطرب سمير: "يتحدث بيطء" صدقني يا "سمير" .. أنا مش عارف إزاى الاستنتاج ده وصلى.. لكن كل اللي أعرفه إننا لازم نخرج من هنا بأى طريقة والا هيحصلنا حاجة.. أنا مش عارف إذا كان اللي بره أحسن من اللي جوه.. أكيد الدنيا بره وحشة.. لكن هنا أوحش كثير
* * لحظة صمت *

المطرب سمير: "بسشك" مش ده كلامك برضه.. يا "دكتور"؟!
جابر: وانتي يا "ناهد" مش فاكرة حاجة?
* * ناهد تنظر بخوف إلى جابر، ثم إلى رفعت، ثم إلى الجمهور.. ناهد تتذكر شيئاً ما *

ص رفعت: يا ترى "جابر" كان سعيد معاكي يا "ناهد"؟
* * لحظة صمت *

"ناهد": تنتقل بنظراتها من الجمهور إلى رفعت.. خوف.. شاء "رفعت"؟!
* * لحظة صمت *

ناهد: "رفعت"؟!

المطرب سمير: ينلتفع نحو جابر، وهو لا يرىك تصديق أي شئ" بس أنا أول واحد خذ بالله من كرهك "الحسين"
جابر: يمط شفتيه " وماله؟!.. "رفعت" القاها فرصة متتعوضش..
صدقني كان هيحاول يفتح الباب بأى طريقة ثانية.. لكن سعادتك سبقت..

** لحظة صمت **

الشاعرة نادية": و كانها تحدث نفسها.. والكلام موجه لجابر "ولما" رفعت "فتح باب علاقتك" "بناهد" ده فتح باب علاقتي بيك جابر: استنتاج عقري.. أخيراً يا "نادية" .. أخيراً بدأتي تشغلي مخ الشاعرة نادية": تنظر إلى جابر لكن "هيام" ...

** جابر يُقاطع الشاعرة بضحكاته.. الشاعرة تصمت.. الكل ينظر إلى جابر عدا رفعت الذي ينظر إلى الأرض منذ بداية هذا الحديث **
جابر: آآه.. قصدك "هاميس" .. هي "هاميس" مقلتكمش على اللي بینا ولا ايه؟

** لحظة صمت.. الكل ينظر إلى هيام عدا رفعت.. الكل يبتعد عنها تلقائياً

**

الممثلة هيام: "يإنفعال.. دموع" انت بتتصولي كده ليه؟ .. "لحظة صمت.. صراغ" بتتصولي كده ليه؟.. صدقوني.. أنا مش وحشة.. والله ما عملت حاجة غلط.. والله ما عملت حاجة غلط

** الممثلة تضع يديها على وجهها لتسقط على الأرض بعد نهاية جملتها الأخيرة.. تتحب بشدة.. تبكي بعنف **

الخرج حسين: "ينظر إلى جابر بوحشية" إيه اللي حصل بالضبط؟
الكاتب محمود: "وكانه لا يستطيع التنفس" "حسين"؟!
الخرج حسين: "وكانه لا يهمه شئ في الوجور" يهمني أعرف إيه اللي حصل بالضبط

** لحظة صمت **

جابر: "بابتسامة ساخرة" مفيش.. يعني انت عارف الرجال مننا عينيه

بتزوغ على واحدة.. وأنا عينيا زاغت على "هيام" .. جمال رباني مفيش زيه .. حبيت أذوقه .. لكن الشهادة لله كانت منيعة جداً.. اضطريت إني بقى ..
وهو بـ"ضحكة خبيثة" أكمل ولا كفاية؟

الممثلة هيام: "تصرخ" اسكت .. اسكت .. اسكت

جابر: "مستمتع" وبعدها عرفت ان "هيام" مش آنسة، والغريب إنها مكنتش متجوزة .. ودي الحاجة الوحيدة اللي خلتها تنفذ أو أمري من غير مناقشة

الممثلة هيام: "بكاء" والله العظيم أنا مش وحشة .. مش وحشة .. مش وحشة .. دول هما .. وهو .. أنا معملتش حاجة غلط .. معملتش حاجة غلط ..
والله ما عملت حاجة غلط

ناهد: "تلتفت إلى جابر.. تذهب إليه .. تبكي" خلاص .. نفذت انتقامك؟

* * جابر ينظر إلى ناهد ياحتقار *

ناهد: "تبكي" عشان خاطري .. سببهم يمشوا .. أنا مستعدة أقدم أي شئ
طلبه .. سببهم يمشوا وأنا هقدر معاك .. تعمل فيا اللي انت عاوزه .. بس
سببهم .. أرجوك سببهم

جابر: "استهزاء" و تستعطفيني أنا ليه؟!.. استعطفني" رفعت " .. هو اللي
في ايده الحل

* * ناهد تنتقل بعينيها و دموعها بين رفعت وجابر .. لا تدرى .. أصبح الكل
لا يعي شيئاً .. رفعت يرفع وجهه تجاه جابر *

رفعت: "بصوت خافت" انت مين؟

* * لحظة صمت .. يتحرك جابر ليواجه رفعت، ينظر إلى عينيه *

جابر: يهمك فعلاً تعرف أنا مين

** رفعت يهز رأسه علامة الموافقة **

جابر: برضه لسه مش مصدق؟

** رفعت لا يقول شيئاً **

جابر: بصوت كالفحيج هتصدق لو قلناك أنا "رفعت إسماعيل" برضه

** رفعت ينظر إلى جابر بخوف **

جابر: أنا انت.. وانت أنا

** رفعت يتراجع خطوة إلى الوراء **

جابر: برضه لسه مش مصدق إني صورتك السلبية؟

** رفعت يرتجف **

جابر: يبقى لازم تفتكر

** يرفع جابر يده وكأنها سهم ستتوجه لرأس رفعت.. تلمس يد جابر
جبهة رفعت، وب مجرد أن يلمسها تخنق الإضاءة لتتركز على رفعت.. رفعت
لا يزال يرتجف.. يحاول أن يفهم.. أن يعي ما يحدث.. يهدأ.. تسع عيناه
فجأة.. ينظر ناحية الأفق ويذكر مجموعة أصوات.. صدر رفعت يعلو ويهبط
**

ص زوجة رفعت: لا أبداً بتتأكد إنك كوييس.. أصل بقالنا فترة طويلة
مكناش فيها كوييسين زي النهاردة

ص رفعت: كلنا بنحاول ننسى أي ماضي أو ذكرى مؤلمة.. مش الفنان
بس.. صدقيني كلنا.. كلنا بنحاول ننسى

ص رفعت: أنا مبروحش سينما لأن معظم الوقت بقضي في البيت

ص زوجة رفعت: أنا مفترضاك أوي

ص رفعت: هتلaci الناس حاجة صغيرة جداً.. تافهة جداً.. يمكن يكون

هو ده السبب اللي خلى "جابر" يفكر ينتقم
ص رفعت: زمن المعجزات انتهى.. أنا عارف لاني بسمع اللي فوق..
بتكلم معاهם

ص رفعت: يا ترى حيانتنا هتستمر زي ما كانت ولا الشعور بالنقص
هيخلி حيانتنا صعبة؟

ص رفعت: أنا كفرت بالشعارات.. بالأمل الزائف اللي بيوزعوه على
الناس

ص رفعت: كان عندنا الأمل.. وكان عندي أبني.. ليه كل ده راح بسرعة?
** لحظة صمت **

رفعت: "يركع على الأرض ليخاطبها" عارف.. "لحظة صمت" كان
في كلام كثير أوبي كان نفسي أقولهلك.. بس الحرب.. الحرب خذلك مني
بدري.. بدري أوبي.. أنا كنت عايز أقولك قد إيه أنا بحبك.. عمري ما
قولتهالك.. أنا عارف.. بس كل حاجة كنت بعملها كانت بتقولك كده.. فاكر..
فاكر أول مرة قولتلي فيها إنك عايز تبقى طيار مع إني كان نفسي تبقى
دكتور.. فاكر.. فاكر يومها عملت إيه.. أنا كنت عارف إنك كنت مستعد تكتم
الرغبة دي جواك.. بس تعمل إيه في مامتك" ثريا .. هي اللي قالتلي..
يومها مزعلتش.. بالعكس فرحت أوبي.. فرحت جداً.. قولت بقى من صلبي
راجل يقدر يأخذ قراره.. وخليتك تدخل الطيران.. نجحت.. برضه كنت عارف
إنك هتنجح.. اللي يشوفك أكيد هيحس إنك انسان يعتمد عليك.. كنت انسان
معنی الكلمة يا" محمد" .. كنت عارف كل شئ عنك.. كنت عارف باللي
بنحس بييه حتى لو انت بعيد عنـي.. لكن اللي معرفتهوش إنك في اليوم ده
هتموت.. تصدق إنك خائن.. كنت لازم تقولـي.. كنت ساعتها هاجـي معـاك..
أصلـي هعيش أزـاي من غيرـك؟!!.. طـب بـذـمـتك كـدـه.. لو أنا اللي كنت مت..

كنت انت هتقدر تعيش من غيري.. مكنتش هتقدر طبعاً.. "لحظة صمت" نام.. نام واستريح مطرح ما انت موجود.. وانا هاخدلك حفتك.. أنا هاعرف أخدلك حفتك.. مش الحرب اللي موتتك يا" محمد ".. لا.. هما اللي موتوك يا" محمد" .. هما اللي موتوك

** تتركز الإضاءة عند جانب من جوانب المسرح ليظهر داخلها أحد الملثمين، لكنه تحول بالكامل إلى أحد المسؤولين، ملثم هو الآخر **
 الملثم: "د/رفعت" .. أحب أبلغك إن الجامعة قررت تستغنى عن خدماتك.. انت يا دكتور واسمحلي مبقتش زي زمان.. بقىت سرحان أغلب الوقت.. مبقتش معانا خالص.. نصحيتي إنك تشوف دكتور نفساني كويس عshan يقدر يعالجك

** الإضاءة المركزة على الملثم تخفي، تظل الإضاءة مركزة فقط على رفعت.. رفعت ينهض من مكانه.. يقف صامتاً.. الإضاءة تعود ببطء إلى صورتها الأولى.. رفعت مشوش.. عيناه أصبحتا كتلة من نار.. نار الانتقام

**

جابر: يقترب من رفعت ببطء" صدقت؟

** رفعت يهز رأسه ببطء علامة الموافقة.. رفعت لا يزال ينظر إلى الأرض **

جابر: مين اللي موت ابنك؟

رفعت: "يرفع وجهه ببطء شديد" الآتانية والغش والخيانة والطمع والشعارات والأمل الزائف والخداع.. خدعوا ابني.. خدعوا ابني

جابر: بصوت كالفحيج" وال حاجات دي موجودة فين؟

رفعت: "يشير إلى رفاقه" فيهـم

جابر: ومـين المسئول على اللي إـحنا فيهـ؟

** رفعت يدیر عينيه في وجوه رفقاء.. جابر بعدهما تأكّد من نظرة رفعت المسورة.. يدخل يده في جيّبه ليُخرج المسدس **

جابر: بصوت كالفحىح "يبقى نفذ"

** ينظر رفعت إلى جابر، تتنقل نظرته للمسدس، يرفع يده ببطء ليمسك بالمسدس الذي لا يزال في يد جابر.. ابتسامة شيطانية ترتسم على وجه جابر **

الخرج حسين: يندفع ناحية رفعت وجاير "انت ناوي تعمل إيه بالضبط؟"

** سرعان ما يمسك رفعت بالمسدس.. يأخذه من جابر بقوّة.. تنطلق الرصاصة في اللحظة التي يهم فيها المخرج بالتوجه ناحية رفعت وجابر.. تستقر الرصاصة في كتف حسين.. يقع حسين على الأرض غارقا في دمائه.. نظرة شيطانية في عيني رفعت.. الكل لا يصدق ما يحدث.. المطرد يتراجع ببطء ليُصبح في ركن المسرح مع رفقاء.. ناهد ترتجف في الركن الآخر من المسرح **

جابر: بصوت كالفحىح في أذن رفعت "نفذ.. اقتل

** موسيقى غريبة لا تنتهي لعلمنا **

جابر: بصوت كالفحىح "اقتل الخيانة والأنانية اللي فيهم

* رفعت يرتجف.. نظراته لا تزال شيطانية *

جابر: بصوت كالفحىح "اقتل الوحوش اللي جواهم

** رفعت يهتز بعنف.. الموسيقى يصاحبها أصوات سمعناها من قبل..

يقطع جابر بين كل جملة وأخرى بقوله: "اقتل" **

ص الشاعرة نادية: كنت لازم أخذ حقي في جابر

جابر: اقتل

ص ناهد.. هو انت بالسرعة دي بتنسى الأوقات اللي بنقضيها سوا؟

جابر: اقتل

ص الطرب سمير: أنا معاك إبني هربت

جابر: اقتل

ص الكاتب محمود: ملقتش غير قلمي عشان أبيعه

جابر: اقتل

ص الخرج حسين: أنا ببساطة ابن سوق

جابر: اقتل

ص المثلة هيام: اتفقتو مع "جابر" إنه يدمرك

جابر: اقتل

ص رفعت: أنا كفرت بالشعارات.. بالأمل الزائف اللي بيوزعوه على الناس

** الأصوات تتوقف.. لكن جابر لا ولن يتوقف **

جابر: بصوت كالفحيخ في أذن رفعت" اقتل

** رفعت وكأنه ينتظر اشارة جابر لتنطلق رصاصته الثانية، وتستقر في الكتف الآخر للمخرج.. الكل يرتجف.. المخرج يتأوه **

ناهد: "تصرخ" بس

** يلتفت جابر لناهد.. ابتسامة شيطانية ترتسم على وجهه وكأنه شخص ليس من عالمنا.. يتقدم ناحية ناهد ببطء.. ناهد تصرخ.. الفزع.. الخوف.. الدم.. القتل.. كل هذا يطفئ على أي صوت.. جابر يمسك بها وكأنه وحش وجد ضالته.. ناهد تبكي.. جابر يمسك بشعرها بقسوة، يجرها ناحية رفعت..

ناهد بين شباك رفعت وجابر.. يرفع رفعت يده الممسكة بالمسدس ببطء
لتحبّق فوهوته ملتصقة بجبهة ناھد.. ناھد تبكي.. ناھد ترتجف.. لا تحاول أن
تهرب.. الفزع يُكبل حركتها.. رفعت وجابر يبتسمان في نفس الوقت..

ابتسامة شيطانية **

جابر: "ببطء" نفذ

** الرصاصية تتطلق لتسقر في رأس ناھد.. ناھد تسقط بين رفعت
وجابر.. ماتت.. الأرانب الباقيه لا تزال في الركن تنتظر الصياد.. يتقدم
المطرب ببطء.. يجلس على ركبتيه أمام رفعت.. لا ينظر إلى رفعت **

الطرب سمير: "ببطء.. عيناه مليئتان بالدموع" نفذ

** يلتفت رفعت ناحية المطرب بسرعة البرق وكان هذه الكلمة أصبحت
مفتاحه السحري **

الطرب سمير: موت ابنك

** رفعت يُعيد شحذ مسدسه.. لكنه يتوقف فجأة.. ينظر إلى المطرب
الراکع أمامه.. رفعت مشوش **

الطرب سمير: "يُخنِي ببطء.. بكاء.. يحاول أن ينسى أنه سيقتل"

خايف من الدنيا أحسن تغدر وتسبيّني وحيد

و ساعتها أنا هضعف مش هقدر غير أبقى بعيد

ده أنا كل ما أحاول أتغيّر.. الأقيني أتمني أبقى صغير

** يد رفعت على المسدس.. ينظر إلى المسدس، ثم ينظر إلى المطرب
الراکع أمامه.. المطرب يرفع وجهه ببطء لينظر إلى عيني رفعت **

جابر: مسنتني إيه؟!

** رفعت مشوش.. ينظر إلى جابر، ثم إلى المطرب ببطء شديد.. رفعت

ينظر إلى الأفق.. يتذكر مجموعة أصوات.. أصوات تختلط مع بعضها البعض

**

ص الشاعرة نادية: جحيم مجتمع مبييتش غير على جسمى

ص ناهد: زوجة مكنتش عايزه غير زوج يقف جنبها

ص الطرب سمير: اعتبرني ابنك من النهاردة

ص الكاتب محمود: لازم أقلب أرجوز عشان أسوى في سوق بلدنا

ص المخرج حسين: اشمعنى دائمًا بيعاملوني وكأنني حيوان

ص الممثلة هيا م: الفار بيخرد نفسه وهو بين أنیاب القط

** لحظة صمت **

رفعت: "بشيرود" وأنا مش عايز أخسر ابني ثاني

جابر: "بغضب.. بإندهاش" بتقول إيه؟!

** يأتي الجواب لجابر على هيئة قوهه مسدس موجهة نحو بيته من قبل

رفعت.. جابر لا يصدق **

رفعت: "يرتجف" أنا مبقتش عارف.. أنا بقىت انت.. ولا انت بقىت أنا..

ولا مين بقى مين

** رفعت ينظر لوجه جابر.. جابر لا يزال غير مصدق لما يحدث.. ينظر

لقوهه المسدس، ثم تنتقل نظراته إلى وجه رفعت **

جابر: "بغضب" خلصوا عليهم

** يتقدم الملثمون ليحيطوا بالأبطال.. لكن رفعت كان الأسبق لأنه تراجع

بظهوره للوراء ليحمي الأبطال بجسده، يشهر المسدس في وجه جابر

والملثمين **

رفعت: "يرتجف" هقتاك يا "جابر".." هقتاك لو قربت

جاير: "بإبتسامة ساخرة" صدقني صعب يا "رفعت" .. صدقني صعب
** يتقدم الملثمون ببطء **

رفعت: "للملثمين" يمكن صعب أفلته لكن انتوا لا
** يتراجع الملثمون بخوف **

جاير: "بإبتسامة ساخرة" لغاية إمتي يا "رفعت"؟.. لغاية إمتي هتفقوا
هنا؟.. صدقني مفيش باب هتقذروا استخبا وراه
** الأبطال يرتجفون **

جاير: أنا كنت في قمم السنين اللي فانت دي جواك يا "رفعت" .. وانت
النهاردة خرجتني .. ومش هتقذر تدخلني ثاني
رفعت: "يصرخ" انت كده هتقذلهم .. هتموتهم

جاير: "يصرخ" أنا هقتل الآتانية والخيانة اللي جواهم، واللي موتوها
"محمد" .. ابنك

** يد المطرب على كتف رفعت .. يد الشاعرة فوقها .. الكاتب .. الممثلة ..
المخرج نهض بالفعل من مجلسه، يستند على الكاتب، بالأصح الإثنان
يستندان على بعضهما البعض، يضع المخرج يده هو الآخر.. الأيدي
ترتجف.. رفعت ينظر بطرف عينه للمطرب.. جيش رفعت.. جيش رفعت في
مواجهة جيش جاير **

جاير: مش هقدر
رفعت: هقدر

** لحظة صمت **

رفعت: "سمير"

** رفعت يقذف بالمسدس تجاه المطرب، ويقذف بنفسه تجاه جاير

وجيشه.. جابر لا يصدق ما يراه **

رُفعت: "يصرخ" اهربوا

** الأبطال يجرون في كل اتجاه لدرجة أنهم قد هبطوا من المسرح،
يجرون وسط الجمهور، وجيش جابر ورائهم.. المطرب يلتقط المسدس
الذي قذفه رفعت من الهواء، بيد مرتجفة يطلق رصاصة، تصيب هدفها
الممثل في أحد الملثمين.. الجميع يجري خلف بعضه البعض.. لا يبقى على
المسرح سوى جابر ورفعت يتصارعان.. المطرب يود يطلق رصاصة
أخرى، لكن أحد الملثمين كان قد سبقه بتوجيه لطمة لوجه المطرب، فيسقط
المسدس من يده.. المطرب يشتبك مع المعلم **

رفعت: "يصرخ" "سمير"

** الصراع على أشده.. قتل.. دم.. عنف.. صرخ.. موسيقى توتر
الأعصاب.. الإضاءة تتوجه **

رفعت: اهربوا

** تخفي الإضاءة فجأة.. بعد لحظات تتركز الإضاءة على أحد جوانب
المسرح حيث مكان المقعد الوثير.. نجد زوجة رفعت تجلس على هذا
المقعد.. آثار بكاء تظهر بوضوح على وجهها.. تنظر إلى الأفق.. يدخل
طبيب شاب في دائرة الضوء **

زوجة رفعت: "تنظر إلى الطبيب، ثم تنظر إلى الجمهور.. تبكي" شوقيه
بيصرخ في الأوضة.. ملقت حل غير إني أرجعه للمستشفى ثاني

** تبكي الزوجة بشدة **

الطبيب: "برقة" أرجوك يا مدام "ثريا" ..

زوجة رفعت: تقاطعه، وهي تبكي "ده" رفعت "يا دكتور.." "رفعت"
الطبيب: متنيش إن صدمة وفاة ابنكم في النكسة كانت شديدة عليه

** زوجة رفعت تبكي **

الطيبب: أنا آسف.. أنا افتكرت لما حرب أكتوبر قامت إنها خلته يحس إن كرامة ابنه اتزدلت من ثانية

زوجة رفعت: "تنظر إليه، وهي تبكي" أنا حاولت أكيف نفسي على الوضع ده.. لكن هو.. هوه "تبكي بشدة"

الطيبب: "ينهض الزوجة" أرجوكي يا مدام "ثريا".." أرجوكي تمالك نفسك.. افضلني حضرتك معايا.. أنا شايف إننا لو اتكلمنا في الإستراحة ده هيبقى

** زوجة رفعت تنهض مع الطبيب، الذي لا يزال يحاول تهدئة الزوجة.. يخفت صوته تدريجياً لتخفت معها الإضاءة، تستطع الإضاءة بصورة تدريجية في الركن الآخر من المسرح، نجد رفعت يجلس على الأرض، متكمشاً على نفسه.. ينظر إلى الأفق.. صوت أفكاره يتعدد.. موسيقى ناعمة تصاحب صوت أفكار رفعت *

ص رفعت: لم أحدد النهاية بعد.. لم أعد أعرف ما هي النهاية المناسبة لتلك القصة، فدخول "جابر" قد أربكني للغاية.. لم أكن أتصور أنني سأخوض صراعاً مع نفسي.. مع "جابر".." يصل إلى تلك الدرجة من الشراسة والعنف.." أعلم جيداً أن "جابر" من حقه الإنقاذه ممَّن خانوه.. من حقه بتر الفساد الداخلي الذي أوصل أبطالي إلى مرحلة عظمى من الأنانية والخيانة، لكن.. لكن في الوقت نفسه ليس "الجابر" الحق في أن يُنصب نفسه قاضياً على البشر يُعاقبهم ويُحاسبهم وكأنه الإله.." كما أنتي في الوقت نفسه أشفع على أبطالي، فكل منهم الحق في أن يبدأ صفحة جديدة، عسى أن يصفح عنهم رب ويرضى، لكن.. لكنهم مذنبين في الوقت نفسه !..

أعلم جيداً أن أبطالي ما هم إلا مجموعة من الخطأ، لكنني رغم ذلك أشفع

عليهم جميعاً.. نعم !.. أشفق عليهم، وأود بالفعل أن أقدم لهم فرصة أخرى، برغم الأخطاء التي ارتكبواها.. أعلم جيداً أن تلك الأخطاء ناتجة عن الضغوط.. لكن مهلاً.. لم تُعلق جميع أخطائنا على مشجّب يُعرف باسم "مشجّب الضغوط"؟!.. ضغوط.. ضغوط.. ضغوط.. أعلم أنها ليست بالشئ الهين، لكن هذا لا يعني نهاية المطاف..

يقولون: "أن الحياة عبارة عن أصابع بيانو، فالأصابع البيضاء تُعبر عما قدمناه من خير، أما الأصابع السوداء فتُعبر عما قدمناه من شر، ولكن نصنع سيمفونية يجب أن تلعب على جميع الأوتار، وأن نضغط على جميع أصابع البيانو" ..

لا أقصد بكلامي هذا أن ترتكب الأخطاء، ونقول أن هذه هي الحياة، وأن الله قد خلقنا ضعفاء أمام أيام ضغوط.. كل ذلك أعلمه جيداً وأكثر، لكنني أرجو أن تُحاول تقليل أخطائنا.. بالتأكيد سُخْطَنِي.. بالتأكيد سنقوم بأفعال لا نرضى عنها.. لأننا بشر.. خلقتنا من لحم ودم.. لكن دعونا نحاول بقدر المستطاع أن نقللها ولا نكرر الخطأ.. فهل من مُجيب؟..

يا الله !.. أين النهاية؟.. كل ما أعلمه حتى الآن أنتي حددت لتلك القصة موضوع لا وهو الرعب، ولعمري فإن نفوسنا هو أشنع شئ يمكن أن تلاقيه.. لكن لا يزال شريط الأسئلة يتواتي..

هل يستطيع "جابر" استرداد عقله قبل أن يفوت الآوان وأن يصفح عنهم جميعاً؟..

هل الجميع يستحقون فرصة أخرى؟.. أم أن آثامهم قد جعلتهم يستحقون تلك النهاية البشعه؟..

إن عقلى سينفجر، فلا يزال هناك الكثير من الأسئلة.. الكثير من علامات الاستفهام.. دون اجابة.. ودون الوصول إلى بُر الأمان

** تختفي الإضاءة ببطء.. الموسيقى الناعمة لا تزال تصاحبنا.. يشق
الظلم أغنية هادئة **

الأغنية:

الدنيا كلها أبواب..

باب لفرح..

و ألف باب لعذاب..

ولحد ما يوم تختار..

تفضل عايش محترل..

تقول عالباب ده جنة..

تفتح تلافي نار..

المعالجة والسيناريو وال الحوار / محمد عادل

قرأت المسرحية كعمل منفصل عن بالكامل.. وكما يقول أندريه موروا: "لقد ارتكبت الخطيئة، لكن هذا كان في بلد آخر مع امرأة أخرى!" .. اليوم هذا طفل.. صحيح أنه مختلف كثيراً عني ولا يعرفني. فقط أشعر ببرجهة وفخر خافت عندما أعرف أنه كان نتيجة عمل كتبته منذ أعوام..

كل الشكر لحمد على هذا العمل الممتع. أتمنى له حظاً سعيداً في القراءة والتمثيل . فإن نجاحاً مدوياً فهو فضل الإعداد الجيد الجاد المرهق، وإن لم يلق نجاحاً لا سمح الله فهذا يعود لعيوب في فكري ذاتها، ولأنني "قد ارتكبت الخطيئة، لكن هذا كان في بلد آخر مع امرأة أخرى" ! ..

التقديم لـ د. أحمد خالد توفيق

الناشران: دار ليلي و دايموند بوك